

মানুষ অসম্ভব স্মৃতিধর।

নব্বই বছরের এক জন মানুষও তার ছেলেবেলার কথা মনে করতে পারে। মস্তিস্কের অযুত নিযুত নিওরোনে বিচিত্র প্রক্রিয়ায় স্মৃতি জমা হয়ে থাকে। কিছুই নষ্ট হয় না। প্রকৃতি নষ্ট হতে দেয় না। অথচ আশ্চর্য, অতি শৈশবের কোন কথা তার মনে থাকে না। দু' বছর বা তিন বছর বয়সের কিছুই সে মনে করতে পারে না। মাতৃ গর্ভের কোন স্মৃতি থাকে না, জন্ম মুহূর্তের কোন স্মৃতিও না। জন্ম সময়ের স্মৃতিটি তার থাকা উচিত ছিল। এত বড় একটা ঘটনা অথচ এই ঘটনার স্মৃতি প্রকৃতি মুছে ফেলে। মনে হয় প্রকৃতির কোন বিশেষ উদ্দেশ্য এতে কাজ করে। প্রকৃতি হয়তো চায় না পৃথিবীর সঙ্গে প্রথম পরিচয়ের কথা আমরা মনে করে রাখি।

আমি যখন মন ঠিক করে ফেললাম ছেলেবেলার কথা লিখব তখন খুব চেষ্টা করলাম জন্মমুহূর্তের স্মৃতির কথা মনে করতে এবং তারো পেছনে যেতে, যেমন মাতৃগর্ভ। কেমন ছিল মাতৃগর্ভের সেই অন্ধকার? আমার খুব জানতে ইচ্ছে করল। এল এস ডি (Lysergic acid diethylamide) নামের এক ধরনের ড্রাগ না-কি মাতৃগর্ভ এবং জন্মমুহূর্তের স্মৃতি মনে করিয়ে দেয়। আমেরিকা থাকাকালীন সময়ে এই ড্রাগের খানিকটা জোগাড় করেছিলাম। সাহসের অভাবে যেতে পারি নি। কারণ এই হেলুসিনেটিং ড্রাগ প্রায়ই মানুষের মানসিক অবস্থায় বড় রকমের ডেউ তোলে।

আসল ব্যাপার হচ্ছে খুব পুরানো কথা আমার কিছুই মনে নেই। তবে জন্মের চার বছরের পর থেকে অনেক কিছুই আমি মনে করতে পারি। সেই সব কথাই লিখব, শুরুটা করছি শোনা কথার উপর নির্ভর করে। শোনা কথার উপর নির্ভর করাও বেশ কঠিন। একই গল্প একেক জন দেখি একেক রকম করে বলেন। যেমন একজন বললেন, 'তোমার জন্মের সময় খুব বড় বৃষ্টি হচ্ছিল'। অন্য একজন বললেন, 'তৈ না তো, প্রচণ্ড ঠাণ্ডা ছিল এইটা খেয়াল আছে, বড় বৃষ্টি তো ছিল না।'

আমি সবার কথা শুনে শুনে একটি ছবি দাঁড় করিয়েছি। এই ছবি খানিকটা এদিক ওদিক হতে পারে তাতে কিছু যায় আসে না। আমি এমন কেউ না যে আমার জন্মমুহূর্তের প্রতিটি ঘটনা ছবি লিখতে হবে। কোন ভুল চুক করা যাবে না। থাকুক কিছু ভুল। আমাদের জীবনের একটা বড় অংশ জুড়েই তো আছে ভুল এবং ভ্রান্তি।

আমার জন্ম ১৩ই নভেম্বর, ১৯৪৮ সন। শনিবার রাত ১০টা তিরিশ মিনিট। শুনেছি ১৩ সংখ্যাটাই অশুভ। এই অশুভের সংগে যুক্ত হল শনিবার। শনি-মঙ্গলবারও নাকি অশুভ। রাতটাও কৃষ্ণ পক্ষের। জন্ম মুহূর্তে দপ করে হারিকেন

নিভে গেল। ঘরে রাখা গামলার পানি উল্টে গেল। এক জন ডাক্তার যিনি গত তিন দিন ধরে মা-র সংগে আছেন তিনি টর্চ লাইট জ্বলে তার আলো ফেললেন আমার মুখে। ক্ষিপ্ত গলায় বললেন, এই জানোয়ারটা দেখি তার মাকে মেরেই ফেলছিল।

আমি তখন গভীর বিশ্বয়ে টর্চ লাইটের ধাক্কানো আলোর দিকে তাকিয়ে আছি। চোখ বড় বড় করে দেখছি — এসব কি? অন্ধকার থেকে এ আমি কোথায় এলাম? জন্মের পর পর কাঁদতে হয়। তাই নিয়ম।

চারপাশের রহস্যময় জগৎ দেখে কাঁদতেও ভুলে গেছি। ডাক্তার সাহেব আমাকে কাঁদাবার জন্য ঠাশ করে গালে চড় বসালেন। আমি জন্ম মুহূর্তেই মানুষের হৃদয়হীনতার পরিচয় পেয়ে আকাশ ফাঁটিয়ে কাঁদতে লাগলাম। ঘরে উপস্থিত আমার নানীজ্ঞান আনন্দিত স্বরে বললেন — বামুন রাশির ছেলে। বামুন রাশি বলার অর্থ প্লেসেন্টার সংগে যুক্ত রক্তবাহী শিরাটি বামুনের পৈতার মত আমার গলা পেঁচিয়ে আছে।

শিশুর কান্নার শব্দ আমার নানাজ্ঞানের কানে যাওয়ামাত্র তিনি ছুটে এসে বললেন, ছেলে না মেয়ে?

ডাক্তার সাহেব রহস্য করবার জন্যে বললেন, মেয়ে, মেয়ে। ফুটফুটে মেয়ে।

নানাজ্ঞান তৎক্ষণাৎ আধমণ মিষ্টি কিনতে লোক পাঠালেন। যখন জানলেন মেয়ে নয় ছেলে — তখন আবার লোক পাঠালেন — আধমণ নয় এবার মিষ্টি আসবে একমণ। এই সমাজে পুরুষ এবং নারীর অবস্থান যে ভিন্ন তাও জন্মলগ্নেই জেনে গেলাম।

নভেম্বর মাসের দুর্দান্ত শীত।

গারো পাহাড় থেকে উড়ে আসছে অসম্ভব শীতল হওয়া। মাটির মালশায় আগুন করে নানীজ্ঞান সৈক দিয়ে আমাকে গরম করার চেষ্টা করছেন। আশে পাশের বৌ-বিরো একের পর এক আসছে এবং আমাকে দেখে মুগ্ধ গলায় বলছে — ‘সোনার পুতলা।’

এতক্ষণ যা লিখলাম সবই শোনা কথা। মা-র কাছ থেকে শোনা। কিন্তু আমার কাছে খুব বিশ্বাসযোগ্য বলে মনে হয় না। কারণ আমি ঘোর কৃষ্ণবর্ণের মানুষ। আমাকে দেখে সোনার পুতলা বলে উচ্ছ্বাস প্রকাশ করার কিছু নেই। তাছাড়া জন্মমুহূর্তের এতসব কথা আমার মা’রও মনে থাকার কথা নয়। তাঁর তখন জীবন সংশয়। প্রসব বেদনায় পুরো তিন দিন কাটা মুরগীর মত ছটফট করেছেন। অতিরিক্ত রক্তের রক্ত ক্ষরণ হচ্ছে। পাড়াগাঁর মত জায়গায় তাঁকে রক্ত দেবার কোন ব্যবস্থা নেই। এই অবস্থাতেও তিনি লক্ষ্য করছেন তাঁর সোনার পুতলা গভীর

বিশ্বয়ে চারপাশের পৃথিবীকে দেখছে, কাঁদতে ভুলে গেছে, এটা বিশ্বাসযোগ্য নয়। আমার ধারণা মা যা বলেছেন তা অন্যদের কাছ থেকে শুনেই বলেছেন।

ঘরে নিচ্ছি মা যা বলেছেন সবই সত্য। ঘরে নিচ্ছি এক সময় আমার গাত্র বর্ন কাচা সোনার মত ছিল। ঘরে নিচ্ছি আমার জন্মের আনন্দ প্রকাশের জন্য সেই রাতে এক মণ মিষ্টি কিনে বিতরণ করা হয়েছিল। মিষ্টি কেনার অংশটি বিশ্বাসযোগ্য। নানাজ্ঞানের অখবিত্ত তেমন ছিল না কিন্তু তিনি দিল্ দরিয়া ধরনের মানুষ ছিলেন। আমার মা ছিলেন তাঁর সবচে আদরের প্রথমা কন্যা। বিয়ে হয়ে যাবার পরও যে কন্যার মাথার চুল তিনি নিজে পরম যত্নে আঁচড়ে দিতেন। এই অতি আদরের কন্যার বিয়ের সময়ও তিনি জমি টমি বিক্রি করে খরচের চূড়ান্ত করলেন। পিতৃ হৃদয়ের মমতা প্রকাশ করলেন দু’ হাত খুলে টাকা খরচের মাধ্যমে।

উদাহরণ দেই — মোহনগঞ্জ স্টেশন থেকে বর আসবে হাঁটা পথে পাঁচ মিনিটের রাস্তা। পাল্পিকর ব্যবস্থা করলেই হয়। আমার নানাজ্ঞান হাতীর ব্যবস্থা করলেন। সুসং দুর্গাপুর থেকে দুটি হাতী আনানো হল। যে লোক এই কাজ করতে পারে, সে তাঁর প্রিয় কন্যার প্রথম সন্তান জন্মের খবরে বাজারের সমস্ত মিষ্টি কিনে ফেলতে পারে।

আমার বাবা তখন সিলেটে। বিশুনাথ খানার ও সি।

ছেলে হবার খবর তাঁর কাছে পৌঁছিল। তাঁর মুখ অন্ধকার হয়ে গেল। বেচারার খুব শখ ছিল প্রথম সন্তানটি হবে মেয়ে। তিনি মেয়ের নাম ঠিক করে বসে আছেন। এক গাদা মেয়েদের ফুক বানিয়েছেন। রূপার মল বানিয়েছেন। তাঁর মেয়ে মল পায়ে দিয়ে ঝম ঝম করে হাঁটবে — তিনি মুগ্ধ হয়ে দেখবেন। ছেলে হওয়ায় সব পরিকল্পনা মাঠে মারা গেল। তিনি একগাদা ফুক ও রূপার মল নিয়ে ছেলেকে দেখতে গেলেন। পাঠক পাঠিকাদের জ্ঞাতার্থে জানাচ্ছি, এইসব মেয়েলি পোষাক আমাকে দীর্ঘদিন পরতে হয়। বাবাকে সন্তুষ্ট করার জন্যে মা আমার মাথার চুলও লম্বা রেখে দেন। সেই বেণী করা চুলে রঙ বেরডের রীবন পরে আমার শৈশবের শুরু।

বাবা-মা’র প্রথম সন্তান হচ্ছে চমৎকার একটি জীবন্ত খেলনা। এই খেলনার সবই ভাল। স্বপ্ননা যখন হাসে বাবা মা হাসেন। খেলনা যখন কাঁদে বাবা-মা’র মুখ অন্ধকার হয়ে যায়। আমার বাবা-মা’র ক্ষেত্রেও এর ব্যতিক্রম হল না। তাঁরা তাঁদের শিশু পুত্রের ভেতর নানান প্রতিভার লক্ষণ দেখে বার বার চমৎকৃত হলেন। হয়ত আমাকে চাবি দেয়া একটা ঘোড়া কিনে দেয়া হল, আমি সংগে সংগে ঘোড়া ভেৎগে ফেললাম। আমার বাবা পুত্রপ্রতিভায় মুগ্ধ, হাসিমুখে বললেন, দেখ দেখ ছেলের কি কৌতূহল। সে ভেতরের কল কঙ্কা দেখতে চায়।

হয়ত আমাকে খাওয়ানোর জন্য মা থালায় করে খাবার নিয়ে গেলেন, আমি সেই থালা উড়িয়ে ফেলে দিলাম। বাবা আমার প্রতিভায় মুগ্ধ— দেখ দেখ, ছেলের রাগ।

দেখ। রাগ থাকা ভাল। এই যে খালা সে উড়িয়ে ফেলে দিল এতে প্রমাণিত হল তার পছন্দ অপছন্দ দু'টিই খুব তীব্র।

এই সময় বই ছিঁড়ে ফেলার দিকেও আমার ঝোঁক দেখা গেল। হাতের কাছে বই পাওয়া মাত্র টেনে ছিঁড়ে ফেলি। এর মধ্যেও বাবা আমার প্রতিভার লক্ষণ দেখতে পেলেন। তিনি মাকে বুঝালেন — এই যে সে বই ছিঁড়ছে, তার কারণ বইয়ের লেখা সে পড়তে পারছে না, বুঝতে পারছে না। যে জিনিষ সে বুঝতে পারছে না সেই জিনিষ সে নষ্ট করে দিচ্ছে। এটি প্রতিভার লক্ষণ।

আদরে বঁাদর হয়।

আমি পুরোপুরি বঁাদর হয়ে গেলাম। এবং আমার প্রতিটি বঁাদরামিতে প্রতিভার লক্ষণ দেখে আমার বাবা-মা বার বার চমৎকৃত হতে লাগলেন। বাবা-মা'র সংগে যুক্ত হলেন বাবার এক বন্ধু গনি সাহেব এবং তার স্ত্রী। এই নিঃসন্তান দম্পতি তাঁদের বুদ্ধিমান হৃদয়ের সবটুকু ভালবাসা আমার জন্যে ঢেলে দিলেন। তাঁদের ভালবাসার একটা ছোট্ট নমুনা দিচ্ছি। একদিন বেড়াতে এসে দেখেন আমি চামচে করে চিনি খাচ্ছি। গনি চাচা বললেন, আরে এতো আগ্রহ করে চিনি খাচ্ছে। চিনি খেতে পছন্দ করে তাতো জানতাম না। তিনি তৎক্ষণাৎ বের হয়ে গেলেন। ফিরে এলেন পাঁচ সের চিনি নিয়ে। মেঝেতে পাটি শেতে আমাকে বসিয়ে দিলেন। আমার চারদিকে চিনি ছড়িয়ে দেয়া হল। গনি চাচা হুট চিন্তে বললেন, খা বেটা কত চিনি খাবি খা।

আমাকে ঘিরে বাবা-মা'র আনন্দ স্থায়ী হল না। আমার মা অসুস্থ হয়ে পড়লেন। কালান্তক জ্বর। টাইফয়েড। তখন টাইফয়েডের অধুধ বাজারে আসেনি। রুগীকে ভাণ্ডার হাতে ছেড়ে দিয়ে চুপচাপ বসে থাকা ছাড়া কিছুই করণীয় নেই। যতই দিন যেতে লাগল মা'র শরীর ততই কাহিল হতে থাকল। এক সময় দেখা গেল তিনি কাউকে চিনতে পারছেন না। এক গভীর রাতে বাবাকে ঘুম ভাঙিয়ে অত্যন্ত অবাক গলায় জিজ্ঞেস করলেন, আমার পাশে এই যে ছোট্ট ছেলেটা শুয়ে আছে এ কে?

বাবা হতভম্ব হয়ে গেলেন। মা বললেন, এই ছেলেটা এখানে কেন? এ কার ছেলে?

আমাকে পাঠিয়ে দেয়া হল নানাজানের কাছে। সিলেটের বিশুনাথ থেকে ময়মনসিংহের মোহনগঞ্জে। পিতৃমাতৃ স্নেহ থেকে পুরোপুরি বঞ্চিত হয়ে আমার দ্বিতীয় জীবন শুরু হল। আমার নানাজান আমাকে লালন পালনের ভার গ্রহণ করলেন। তখন তাঁর একাটি মেয়ে হয়েছে। তাঁর এক কোলে সেই মেয়ে, অন্য কোলে আমি। নানাজানের বুকের দুধ খেয়ে দু'জন এক সংগে বড় হচ্ছি।

দু'মাস জুরে ভোগার পর মা সেরে উঠলেন কিন্তু টাইফয়েড তার প্রবল থাবা বসিয়ে গেল। মা'র মস্তিস্ক বিকৃতি দেখা গেল। কাউকে চেনেন না। যার সংগে দেখা

হয় তাঁকেই বলেন, কত টাকা লাগবে তোমার বল তো? আমার কাছে অনেক টাকা আছে। যত টাকা চাইবে ততই পাবে। ফেরত দিতে হবে না।

বলেই তোষকের নীচ থেকে লক্ষ লক্ষ কাল্পনিক টাকা বের করতে শুরু করেন। মাঝে মাঝে এই সব কাল্পনিক টাকা জানালা দিয়ে উড়িয়ে দেন। চিকন সুরে ঢেঁচিয়ে বলেন, টাকা নিয়ে যাও। টাকা। আমি টাকা উড়াচ্ছি। যার যত দরকার নাও। ফেরত দিতে হবে না।

মা বিয়ের পর খুব কষ্টে পড়েছিলেন। টাকা পয়সার কষ্ট। বিশুনাথ খানার ওসি হিসেবে বাবার বেতন ছিল আশি টাকা। বেতনের এই আশিটি টাকা বাবা তাঁর খামখেয়ালী স্বভাবের জন্য অতি দ্রুত খরচ করে ফেলতেন। মাসের দশ তারিখেই বাবার হাতে একটা পয়সা নেই। খানার ওসিদের টাকা পয়সার অভাব হবার কথা না। কিন্তু আজ লিখতে গিয়ে গর্ব এবং অহংকার বুক ভরে যাচ্ছে যে আমার বাবা ছিলেন সাধু প্রকৃতির মানুষ। বেতনের টাকাই ছিল তাঁর একমাত্র রোজগার। মা'র কাছে শুনেছি পুলিশের রেশনই তাঁদের বাঁচিয়ে রাখত। মাসের প্রথমেই রেশন তোলা হত। রেশনে চাল, ডাল এবং তেল পাওয়া যেত। সারা মাসে তাঁদের খাবারের মেনু ছিল ডাল, ডালের বড়া এবং নিমপাতা ভাজা। বাসার সংগে লাগোয়া একটা নিমগাছ ছিল সেই নিমের কচি পাতা ভাজা করা হত। মাকে শাড়ি কিনে দেবার সামর্থ্য বাবার ছিল না। মা'র শাড়ি পাঠাতেন নানাজান। সতেরো বছরের একটি মেয়ে যে মোটামুটি স্বচ্ছলতায় মানুষ হয়েছে তার জন্য এই অর্ধ কষ্ট বড়ই ভয়াবহ ছিল। অর্থনৈতিক পীড়ন তাঁর উপর যে প্রচণ্ড চাপ সৃষ্টি করেছিল মানসিক বিকৃতির সময় তাই ফুটে বের হল। যার সংগেই দেখা হয় তাঁকেই মা এক লাখ বা দু'লাখ টাকা দিয়ে দেন।

দু'বছর এমন করেই কাটল। আমি নানাজানের কাছে। মা বাবার সংগে সিলেটে। পুরোপুরি পাগল একজন মানুষ।

এক শ্রাবণ মাসের রাতে মা'র ঘুম ভেঙে গেল। বাইরে কুম বৃষ্টি। হওয়ায় বাড়ি যেন উড়িয়ে নিয়ে যাচ্ছে। বাড়ির পেশনের ঝাঁকড়া জাম গাছে শৌ শৌ শব্দ হচ্ছে। মা-বাবাকে ডেকে তুলে ভয়াবহ স্বরে বললেন, বাতি জ্বালাও, ভয় লাগছে।

বাবা চমকে উঠলেন। দিব্যি সুস্থ মানুষের মত কথাবার্তা। হারিকেন জ্বালানো হল। মা তীব্র স্বরে বললেন, আমার ছেলে কোথায়? বাবা তাকিয়ে রইলেন। তাঁর মন আশা নিরাশায় দুলছে। তাহলে কি মাথা ঠিক হয়ে গেল?

কথা বলছ না কেন? আমার ছেলে কোথায়?

আয়শা তোমার কি সব কিছু মনে পড়ছে?

আমার ছেলে কোথায়?

ও আছে। ও ভাল আছে, তোমার মা'র কাছে আছে। তুমি দীর্ঘদিন অসুস্থ হয়েছিলে। তাঁকে পাঠিয়ে দেয়া ছাড়া উপায় ছিল না। তুমি শান্ত হও। কাল ভোরেই তোমাকে নিয়ে আমি মোহনগঞ্জ রওনা হব।

আমি অসুস্থ ছিলাম?

হ্যাঁ।

মা উঠে গিয়ে একটা আয়না আনলেন। আয়নায় নিজেকে দেখে চোখ দিয়ে টপ টপ করে পানি পড়তে লাগল। মাথা ভর্তি চুল ছিল। কোন চুল নেই। দাঁতের রঙ কচলাচলে কাল। আয়নায় যার ছায়া পড়েছে সে উনিশ বছরের তরুণী নয় যেন বাঁট বছর বয়সের এক বৃদ্ধা।

আরশা তোমার কি সব মনে পড়ছে?

হ্যাঁ।

বনতো কত তারিখে আমাদের বিয়ে হয়েছিল?

সাতটা মাসে। পয়লা আষাঢ়।

আনন্দে বাবার চোখও ভিজ়ে উঠল।

মাইরে ঝড় বৃষ্টির মাতামাতি। ঘরে নিবু নিবু হারিকেনের রহস্যময় আলো। সেই আলোয় মূর্তির মতো বসে আছেন পুত্রবিরহকাতর এক মা, যিনি এই কিছুক্ষণ আগে তাঁর হারানো স্মৃতি ফিরে পেয়েছেন।

বাবা থাকে নিয়ে মোহনগঞ্জ উপস্থিত হলেন। আমাকে মার কোলে বসিয়ে দেয়া হল। মা বিস্মিত হয়ে বললেন, এই কি আমার ছেলে?

নানীজান বললেন- হ্যাঁ।

ছেলে এত বড় কেন?

ছেলের বয়স দুই বছর, বড় হবে না?

কথা বলতে পারে?

পারে, সব কথা বলতে পারে।

মা নানীজানের দিকে তাকিয়ে কঠিন স্বরে বললেন, আমার ছেলের কোন অনাদর হয়নি তো?

নানীজান হেসে ফেললেন।

আমার ছেলের সোনার মত গায়ের রঙ ছিল ও এত কাল হল কেন?

সারাদিন রোদে রোদে ঘুরে।

কেন আপনারা দেখেন না? কেন আমার ছেলে সারাদিন রোদে রোদে ঘুরে?

মা যতই রাগ করেন সবাই তত হাসে।

বাড়ি ভর্তি মানুষ। মাতা-পুত্রের মিলন দৃশ্য দেখতে পাড়া ভেঙে বৌঝিরা এসেছে। আমার নানাজান আবার এক মণ মিষ্টি কিনতে লোক পাঠিয়েছেন।

আসরের মধ্যমণি হয়ে আমার মা একটা জনচৌকিতে আমাকে ডেকে নিয়ে গেলেন। আমি আছেন। এই তাঁর মুখে তৃপ্তি, এই তাঁর চোখে জল। মেঘ ও রৌদ্রের তুলনায় পৃথিবীর মধুরতম একটি দৃশ্য সবাই দেখছে মুগ্ধ হয়ে। এর মধ্যে মা সবাইকে সচকিত করে একটি ক্ষুদ্র প্রার্থনা করলেন। তিনি উচ্চস্বরে বললেন, 'আমার এই ছেলের শৈশব বড় কষ্টে কেটেছে, আল্লাহ তার বাকি জীবনটা তুমি সুখে সুখে করে দিও। বাকি জীবনে সে যেন কোন দুঃখ না পায়।'

ইশ্বর মা'র এই প্রার্থনা গ্রহণ করেননি। এই ক্ষুদ্র জীবনে আমি বার বার মাথা পেয়েছি। বার বার হৃদয় হা-হা করে উঠেছে। চারপাশের মানুষদের নিষ্করতা, হৃদয়হীনতায় আহত হয়ে কতবার মনে হয়েছে—এই পৃথিবীর বড়ই বিষাদময়। আমি এই পৃথিবী ছেড়ে অন্য কোন পৃথিবীতে যেতে চাই। যে পৃথিবীতে মানুষ নেই। চারপাশে পত্রপুষ্প শোভিত বৃক্ষরাজী। আকাশে চির-পূর্ণিমার চাঁদ। যে চাঁদের ছায়া পড়েছে ময়ূরাক্ষী নামের এক নদীতে। সেই নদীর স্বচ্ছ জলে সারাক্ষণ খেলা করে জোছনার ফুল। দূরের বন থেকে ভেসে আসে অপার্থিব সংগীত।

মা আমাকে নিয়ে সিলেটে চলে এলেন। কিছু দিন তার নিশ্চয়ই খুব সুখে কাটল। কোন সুখই স্থায়ী হয়না এই সুখও স্থায়ী হল না, আবার টাইফয়েড হল। টাইফয়েডের বীজ হয়ত লুকিয়ে ছিল, প্রাণ সংহারক মূর্তিতে সে আবার আত্মপ্রকাশ করল। বাবা দিশাহারা হয়ে পড়লেন। মা সারাদিন প্রবল জ্বরের ঘোরে আচ্ছন্ন হয়ে থাকেন মাঝে মাঝে জ্ঞান ফিরে এলে ব্যাকুল হয়ে তাঁর শিশু পুত্রকে খুঁজেন। সেই শিশুকে তার কাছে যেতে দেয়া হয়। মা কাকুতি মিনতি করেন ওকে একটু দেখতে দাও। একবার শুধু দেখব।

কাজের মেয়ে আমাকে নিয়ে দরজার পাশে এসে দাঁড়ায়। মা মুগ্ধ চোখে তাকিয়ে থাকেন। গভীর বিষাদ এবং গভীর আনন্দে তাঁর চোখে জল আসে।

এর মধ্যেই একদিন ডাক্তার সাহেব বাবাকে আড়ালে ডেকে নিয়ে বললেন, আপনার স্ত্রী বাচবেন না। আপনি মানসিক ভাবে এর জন্য প্রস্তুতি গ্রহণ করুন।

বাবা বললেন, কোন আশাই কি নেই?

না। টাইফয়েড দ্বিতীয়বার হলে আর রক্ষা নেই, তবে?

তবে কি?

টাইফয়েডের নতুন একটা অযুধ বাজারে এসেছে, শুনেছি অযুধটা কাজ করে ইণ্ডিয়াতে হয়ত বা পাওয়া যায়। আপনি চেষ্টা করে দেখতে পারেন।

আসামের শিলচরে বাবা লোক পাঠালেন। অযুধ পাওয়া গেল না। বাবা স্ত্রীর মৃত্যুর জন্যে মানসিক প্রস্তুতি গ্রহণ করলেন। সেই প্রস্তুতির প্রমাণ হচ্ছে আমার

নামকরণ। আমার নাম রাখলেন কাজল। বিভূতি ভূষনের পথের পাঁচালির অপূর স্ত্রীর মৃত্যু হয়েছিল। অপূর ছেলের নাম ছিল কাজল। আমার ভাল নাম রাখা হল শামসুর রহমান। বাবার নাম ফয়জুর রহমান। বাবার নামের সংগে মিলিয়ে ছেলের নাম। ছয় বছর বয়স পর্যন্ত আমাকে শামসুর রহমান নাম নিয়ে চলা ফেরা করতে হল। সপ্তম বছরে বাবা হঠাৎ সেই নাম বদলে রাখলেন হুমায়ূন আহমেদ। বৎসর দুই হুমায়ূন আহমেদ নামে চলার পর আবার আমার নাম বদলে দেবার ব্যবস্থা হল। আমি কঠিন আপত্তি জানালাম। বার বার নাম বদলানো চলবে না। আমাদের সব ভাই বোনই প্রথম ছ'সাত বৎসর এক নাম, তারপর অন্য নাম। আমার বাবার মৃত্যুর পর তাঁর পেনসন এবং গ্রাচুইটির টাকা পয়সা তুলতে গিয়ে বিরাট যন্ত্রণায় পড়লাম। দেখা গেল তিনি তাঁর টাকা পয়সা তাঁর স্ত্রী এবং তিন ছেলেমেয়েকে দিয়ে গেছেন। কিন্তু তিন ছেলেমেয়ের যে নাম লিখে রেখে গেছেন এখন কারোরই সেই নাম নেই। বাবা তাঁর ছেলেমেয়ের নাম বদলেছেন কিন্তু কাগজ পত্র ঠিকঠাক করতে ভুলে গেছেন।

আমি এখন আমার বিচিত্র বাবা সম্পর্কে বলব। মৃত্যুপথ যাত্রী মা প্রসংগটা আপাতত থাক, শুধু এইটুকু বলে রাখি তিনি দ্বিতীয়বার টাইফয়েডের ধাক্কাও সামলে উঠেন জৈনিক হিন্দু সাধুবাবার ফুঁ দেয়া তর্পিন তেল খেয়ে। নিতান্তই অবিশ্বাস্য ব্যাপার। তর্পিন টাইফয়েডের অমুখ নয়। নিশ্চয়ই অন্য কোন ব্যাপার আছে। আমি যা শুনেছি তাই লিখলাম। সাধুবাবার ফুঁ দেয়া তর্পিন খেয়ে মৃত্যুর মুখ থেকে কেউ ফিরে আসবে এই তথ্য হজম করা আমার পক্ষে বেশ কঠিন। যোহেতু মা দাবি করছেন সেহেতু লিখছি।

এবার বাবার কথা বলি।

একজন অদ্ভুত বাবা

আমার ছোট ভাই মোহাম্মদ জাফর ইকবাল তার লেখা প্রথম গ্রন্থ 'কপোড়নিক সুখ দুঃখে'র উৎসর্গ পত্রে লিখেছে:

'পৃথিবীর সবচে ভালমানুষটিকে বেছে নিতে বললে
আমি আমার বাবাকে বেছে নেব।'

বইয়ের উৎসর্গ পত্রে লেখকরা সব সময় আবেগের বাড়াবাড়ি করেন। আমার ভাইয়ের এই উৎসর্গপত্র আবেগ প্রসূত ধরে নিতে খানিকটা অসুবিধা আছে। সে যদি লিখতো পৃথিবীর সবচে ভাল মানুষ আমার বাবা এবং মা তাহলে আবেগের

ব্যাপারটি চলে আসত। সে তা না করে বাবার কথাই লিখেছে। পৃথিবীর সবচে ভাল মানুষের মধ্যে মাকে ধরে নি। এর থেকেই বোঝা যাচ্ছে তার উৎসর্গপত্র আবেগ প্রসূত নয়। চিন্তা ভাবনা করে লেখা। ইকবালকে আমি যতটুকু চিনি সে চিন্তা ভাবনা না করে কখনো কিছু বলে না এবং লিখেও না।

আমার বাবা পৃথিবীর সবচে ভাল মানুষদের একজন কি না তা জানি না তবে বিচিত্র একজন মানুষ, তা বলতে পারি। তাঁর মত খেয়ালি, তাঁর মত আবেগবান মানুষ এখন পর্যন্ত আমার চোখে পড়েনি। আবেগ ছাড়াও তাঁর চরিত্রে আরো সব বিশ্বয়ের ব্যাপারও ছিল। তিনি ছিলেন জন স্টেইনবেকের উপন্যাস থেকে উঠে আসা এক চরিত্র।

সবার আগে ছোট্ট একটা ঘটনা বলি। রাত প্রায় বারোটা। রঙমহল সিনেমা হল থেকে সেকেণ্ড শো ছবি দেখে বাবা এবং মা রিকশা করে ফিরছেন। বড় একটা দীঘির পাশ দিয়ে রিকশা যাচ্ছে। মা হঠাৎ বললেন, আহা দেখ কি সুন্দর দীঘি। টলটল করছে পানি। ইচ্ছে করছে পানিতে গোসল করি।

বাবা সংগে সংগে বললেন, রিকশা থামাও।

রিকশাওয়ালা থামল।

বাবা বললেন, চল দীঘিতে গোসল করি।

মা হতভম্ব। এই গভীর রাতে দীঘিতে নেমে গোসল করবেন কি? নিতান্ত পাগল না হলে কেউ এরকম বলে?

মা বললেন, কি বলছ তুমি?

বাবা গভীর গলায় বললেন, দেখ আয়শা, একটাই আমাদের জীবন। এই একজীবনে আমাদের বেশীর ভাগ সাধই অপূর্ণ থাকবে। ক্ষুদ্র ক্ষুদ্র যে সব সাধ আছে, যা মেটানো যায় তা মেটানোই ভাল। তুমি আস আমার সংগে।

বাবা হাত ধরে মাকে নামালেন। স্তম্ভিত রিকশাওয়ালা অবাধ হয়ে দেখল হাত ধরাধরি করে দুজন নেমে গেল পুকুরে।

এই গল্প যতবার আমার মা করেন ততবার তাঁর চোখে পানি এসে যায়। তাঁর নিজের ধারণা তাঁর জীবনে যে অল্প কিছু শ্রেষ্ঠ মুহূর্ত এসেছিল ঐ পুকুরে অবগাহন তার মধ্যে একটি।

বাবার চরিত্রকে স্পষ্ট করার জন্যে আরো কিছু ঘটনার উল্লেখ করি। বাবা তখন সিলেট সদরে পুলিশের ইন্টেলিজেন্সিতে আছেন। পদ মর্যদায় সাব-ইন্সপেক্টর বেতন সর্বসাকুল্যে মাসে নব্বুই টাকা। সেই টাকার একটা অংশ দেশের বাড়িতে চলে যায়, এক অংশ ব্যয় হয় বই কেনা বাবদ। বাকি যা থাকে তা দিয়ে অনেক কষ্টে সংসার চালিয়ে নিয়ে যান মা। যাকে বলে ভয়াবহ জীবন সংগ্রাম। জীবন সংগ্রামের এই অংশটি বাবার কখনো চোখে পড়ে না, কারণ দেশের বাড়িতে পাঠানো টাকা

এবং বই কেনার টাকা আলাদা করে বাকি টাকাটা মার হাতে তুলে দেন। বাবার দায়িত্ব শেষ। বাকি মাস টেনে নিয়ে বাবার দায়িত্ব হচ্ছে মার। তিনি তা কি ভাবে নেবেন সেটা তাঁর ব্যাপার। বাবার কোনই মাথা ব্যথা নেই।

এই রকম অবস্থায় মাসের প্রথম তারিখে বাবাকে খুব হাসি মুখে বাড়ি ফিরতে দেখা গেল। তিনি বিশুভ্রয় করা হাসি দিয়ে বললেন, আয়েশা একটা বেহালা কিনে ফেললাম।

মা বিস্মিত হয়ে বললেন, কি কিনে ফেললে?

বেহালা।

বেহালা কি জন্মে?

বেহালা বাজানো শিখবে।

কত দাম পড়ল?

দাম সস্তা, সস্তার টাকা। সেকেণ্ড হ্যাণ্ড বলে এই নামে পাওয়া গেল।

বাবা সংসার চালাবার জন্যে মা'র হাতে দশটা টাকা তুলে দিলেন। মা হাসবেন না কাঁদবেন ভেবে পেলেন না।

বাবার খুব শখ ছিল ওস্তাদ রেখে তাঁর কাছে বেহালা বাজানো শিখবেন। ওস্তাদকে বেতন দিয়ে বেহালা বাজানো শেখার সামর্থ্য তাঁর ছিল না। কাজেই অতি যত্নে বেহালা তুলে রাখ হল। একদিন সামর্থ্য হবে তখন ওস্তাদ রেখে বেহালা শেখা হবে।

মাঝে মাঝে দেখতাম কাঠের বাক্স থেকে তিনি বেহালা বের করছেন। অতি যত্নে ধুলো সরিয়েছেন। ছড়ে রজন মাখাচ্ছেন এবং একসময় লাজুক ভংগিতে বেহালায় ছড় ঘসছেন। কান্নায় মত এক রকম আওয়াজ উঠছে বেহালা থেকে। আমরা মুগ্ধ হয়ে শুনছি।

বাবার অসংখ্য অপূর্ণ শব্দের মত বেহালা বাজানো শেখার শখও পূর্ণ হয় নি। বাক্সবন্দি থাকতে থাকতে এক সময় বেহালার কাঠে ঘুম ধরে গেল। ছড়ের সূতা গেল ছিড়ে। বেহালা চলে এল আমাদের দখলে। আমার ছোটবোন শেফু বেহালার বাক্স দিয়ে পুতুলের ঘর বানালা। বড় চমৎকার হল সেই ঘর। ডালা বন্ধ করে সেই ঘর হাতলে ধরে এক জায়গা থেকে অন্য জায়গায় নিয়ে যাওয়া যায়।

আরেক দিনের ঘটনা। শীতকালের এক ভোরে মার গলা শূনে ঘুম ভেঙে গেল। কি নিয়ে যেন বাবার সঙ্গে রাগারাগি করছেন। এ রকম তো কখনো হয় না। তাঁরা ঝগড়া টগড়া অবশ্যই করেন তবে সবটাই চোখের আড়ালে। আজ হল কি? আমি কান পেতে আছি যদি কিছু টের পাওয়া যায়। কিছুই টের পাওয়া যাচ্ছে না। মা বার বার শূধু বলছেন, ঘোড়া দিয়ে তুমি করবে কি? আমাকে বুঝিয়ে বল, কে পুষবে এই ঘোড়া?

বাবা বলছেন, এত রাগছ কেন? একটা কোন ব্যবস্থা হবেই।

মা ফোঁপাতে ফোঁপাতে বললেন, আমরা নিজেরা খেতে পাচ্ছি না, এর মধ্যে ঘোড়া। তোমার কি মাথা খারাপ হলো?

আমি লাফ দিয়ে বিছানা থেকে নামলাম। কথা বার্তা থেকে মনে হচ্ছে একটা ঘোড়া কেনা হয়েছে।

আমাকে জেগে উঠতে দেখে বাবা হাসি মুখে বললেন, ঘরের বাইরে গিয়ে দেখে আয় ঘোড়া কিনেছি।

কি অদ্ভুত কাণ্ড। ঘরের বাইরে সুপারি গাছের সঙ্গে বাঁধা বিশাল এক ঘোড়া। ঘোড়াটাকে আমার কাছে আকাশের মত বড় মনে হল। সে ক্রমাগত পা দাপাচ্ছে এবং ফোঁস ফোঁস করে শব্দ করছে। আমাদের কাজের ছেলে আছদ [তার নাম সম্ভবত আসাদ, সে বলত আছদ] ভীত মুখে একটু দূরে দাঁড়িয়ে আছে।

ঘটনা হচ্ছে বাবা মাকে না জানিয়ে প্রভিডেন্ট ফাণ্ডে এ পর্যন্ত জমা সব টাকা তুলে একটা ঘোড়া কিনে ফেলেছেন। এই সেই ঘোড়া। মহাতেজী প্রাণ শক্তিতে ভরপুর একটি প্রাণী। যে প্রাণীদের সঙ্গে বাবার প্রথম পরিচয় হয় সারদা পুলিশ একাডেমীতে। তাঁর বড়ই পছন্দ হয়। বাবা তাঁর পছন্দের জিনিস যে করেই হোক জোগাড় করেন। এতদিন পর ঘোড়াও জোগাড় হল। তখন পুলিশ অফিসাররা বৃটিশ নিয়মের সূত্র ধরে ঘোড়া পুষলে এ্যালাউন্স পেতেন। বাবা আশা করছেন সেই এ্যালাউন্সের টাকাতেই এর পোষার খরচ উঠে আসবে।

ঘোড়া সুপারি গাছের সঙ্গে বাঁধা। বাবা-মার মধ্যে উত্তপ্ত বাক্য বিনিময় হচ্ছে। উত্তাপ পুরোটাই মা-ই চলাচ্ছেন বাবা শূধু কাটান দেয়ার চেষ্টা করছেন।

কি করবে তুমি এই ঘোড়া দিয়ে শূনি? সিলেট শহরে ঘোড়ায় করে ঘুরবে?

ই। অসুবিধা কি? ছেলেমেদেরও ঘোড়ায় চড়া শেখাব।

ছেলেমেয়েরা ঘোড়ায় চড়া শিখে কি করবে?

কিছু করবে না, একটা বিদ্যা শেখা থাকল।

ঘোড়ার পেছনে কত খরচ হবে সেটা ভেবেছ?

এত ভাবলে বেঁচে থাকা যায় না।

বেঁচে থাকা যাক আর না যাক এই ঘোড়া তুমি এক্ষুনি বিদেয় কর।

পাগল হয়েছ? এত শখ করে কিনলাম।

বাবা ছিলেন আবেগ নির্ভর মানুষ। মুক্তি দিয়ে তাঁকে টলানো মুশকিল। কিছু তাঁকেও টলতে হল। কারণ ঘোড়া দ্বিতীয় দিনেই লাথি মেরে আছদের পা ভেঙ্গে ফেলল। মা হাতে অস্ত্র পেয়ে গেলেন। কঠিন গলায় বললেন, তোমার ছেলে মেয়েরা সারাক্ষণ ঘোড়াকে ঘিরে নাচানাচি করে। লাথি খেয়ে ওরা মারা পড়বে। তাই কি তুমি চাও? বাবা ঘোড়া বিক্রি করে দিলেন। সেই টাকায় কিনলেন একটা দামী

কোডাক ক্যামেরা। তবে স্মৃতি চিহ্ন হিসেবে ঘোড়ার জীন রেখে দিলেন। আমাদের খেলার সামগ্রী তালিকায় আরেকটি জিনিস যুক্ত হল।

দুটি সম্পূর্ণ ভিন্ন ধরনের জিনিসের প্রতি তাঁর আমৃত্যু সখ ছিল — একটি হচ্ছে পামিট্রি অন্যটি ফটোগ্রাফী। তাঁর কোডাক ক্যামেরা তিনি আগলে রাখতেন যক্ষের মত। শুধু যে ছবি তুলতেন তাই না, সেই ছবি নিজেই ভেভেলপ এবং প্রিন্ট করাতেন। আমার পরিষ্কার মনে আছে আমাদের শৈশবের আনন্দময় মুহূর্তের একটি হচ্ছে বাবাকে ঘিরে আমরা বসে আছি। একটা গামলায় পানি। সেই পানিতে কিছু কাগজ ভাসছে। ধবধবে সাদা কাগজে আস্তে আস্তে মানুষের মুখের আদল ফুটতে শুরু করেছে। আমরা আনন্দে লাফাচ্ছি। বাবার মুখে আনন্দের হাসি। আজ থেকে ত্রিশ বছর আগের কথা লিখছি। সেই সময় পুলিশের একজন দরিদ্র সাব ইন্সপেক্টর নিতান্তই শখের কারণে ঘরে ডার্করুম বানিয়ে ছবি প্রিন্ট করছেন — ব্যাপারটা বেশ মজার।

পামিট্রি নিয়েও বাবার উৎসাহ ছিল বাড়াবাড়ি রকমের। আমার মনে হয় তাঁর মূল বৌকটা ছিল রহস্যময়তার দিকে। তিনি রহস্যের সন্ধান পেয়েছিলেন ফটোগ্রাফিতে, বুকো পড়েছেন সেদিকে। রহস্য ছিল জ্যোতিষ বিদ্যায়, সেদিকেও বুকলেন।

কিছুদিন পর পরই ছুটির দিনের সকালে একটা আতসী কাচ নিয়ে বসতেন। গম্ভীর গলায় বলতেন বাবারা আসতো দেখি হাতের রেখায় কোন পরিবর্তন হল কি—না।

একবার ইকবালের হাত দেখে বললেন—চমৎকার রেখা। চন্দ্র এবং মঙ্গলের ক্ষেত্রও ভাল। দীর্ঘ আয়ু। তুই খুব কম করে হলেও আশি বছর বাঁচবি। সেই রাতের ঘটনা। ফুপিয়ে কান্নার শব্দে সবার ঘুম ভেঙ্গে গেল। ইকবাল হাট মাউ করে কাঁদছে। কি হয়েছে কি হয়েছে। সে কাঁদতে কাঁদতে বলল, আশি বছর পর আমি মরে যাব এই জন্যে খুব খারাপ লাগছে আর কান্না পাচ্ছে।

বাবা বললেন, গণনায় ভুল হতে পারে। আরেকবার দেখা দরকার। কই ম্যাগনিফাইং গ্লাসটা দেখি।

গম্ভীর রাতে বাবা তাঁর আতসী কাচ নিয়ে বসলেন। আমরা সবাই তাঁকে ঘিরে বসলাম। ইকবালের এক হাত বাবার কাছে অন্য হাতে সে চোখ কচলাচ্ছে। বাবা অনেকক্ষণ ঝুঁটিয়ে ঝুঁটিয়ে দেখে বললেন, আগের গণনায় ভুল হয়েছিল। তোর হাতে আছে ইচ্ছামৃত্যুর চিহ্ন। তোর হবে ইচ্ছা মৃত্যু।

ইচ্ছা মৃত্যু কি?

যতক্ষণ পর্যন্ত মরার ইচ্ছা না হবে ততক্ষণ পর্যন্ত তুই মরবি না। বেঁচে থাকবি।

কোন দিন যদি মরার ইচ্ছা না হয়?

তাহলে বেঁচে থাকবি। মরবি না।

ইকবাল হাট চিন্তে ঘুমুতে গেল।

জ্যোতিষ বিদ্যা কোন বিদ্যা নয়। জ্যোতিষ বিদ্যা হচ্ছে এক ধরনের অপবিদ্যা। অপবিজ্ঞান। মানুষের ভবিষ্যৎ তার হাতে রেখায় থাকে না। থাকার কোন কারণ নেই। তবু অত্যন্ত অস্বস্তির সঙ্গে বলছি। আমাদের সব ভাই বোন সম্পর্কে তিনি যা বলে গিয়েছিলেন তা মিলে গিয়েছিল। তিনি নিজের মৃত্যু সম্পর্কেও ভবিষ্যৎবাণী করেছিলেন। বলেছিলেন তাঁর কপালে অপঘাত মৃত্যু লেখা। সেই মৃত্যু হবে ভয়ংকর মৃত্যু।

এইসব তথ্য তিনি হাত দেখে পেয়েছিলেন না অন্য কোন সূত্রে পেয়েছিলেন আমার জানা নেই। মিলগুলি কাকতালীয় বলেই মনে হয়।

জ্যোতিষ শাস্ত্রের চর্চার সঙ্গে সঙ্গে তিনি আরেকটি বিষয়েও জড়িত ছিলেন। সেটাকে জ্যোতিষ বলতে পারে। প্লেনেট, চক্র, ভূত নামানো এইসব নিয়ে খুব মাতামাতি ছিল। দাদাজ্ঞান এই নিয়ে বাবার উপর খুব বিরক্ত ছিলেন। তিনি বাবাকে ডেকে তওবা করালেন যাতে তিনি কোনদিন জ্যোতিষ না করেন। বাবা তওবার পর জ্যোতিষ ছেড়ে দেন তবে এই বিষয়ে বই পড়া ছাড়েন নি। বাবার সংগ্রহের বড় অংশ ছিল জ্যোতিষ বিষয়ক বই পত্র।

প্রথমক্রমে বলি তিনি আস্তিক ধরনের মানুষ ছিলেন। আমরা কখনো তাঁকে রোজা ভাঙ্গতে দেখিনি। নামাজ খুব নিয়মিত পড়তেন না তবে রোজ রাতে এশার নামাজে দাঁড় হতেন। গম্ভীর স্বরে সুরা আবৃত্তি করতেন। পরিবেশ হয়ে উঠতো রহস্যময়।

আমার বাবা যে একজন রহস্যময় পুরুষ ছেলেবেলায় তা কখনো ধরতে পারিনি। তখন ধরেই নিয়েছিলাম সবার বাবাই এ রকম। আমার বাবা অন্যদের চেয়ে আলাদা কিছু না। তা ছাড়া বাবার সঙ্গে আমাদের কিছু দূরত্বও ছিল। ছেলে মেয়েদের প্রতি আদরের বাড়াবাড়ি তাঁর চরিত্রে ছিল না। নিজে খুব ব্যস্তও থাকতেন। সারাদিন অফিস করে বিকেলে বই পড়তে যেতেন কেন্দ্রীয় মুসলিম সাহিত্য সংসদে। ফিরতে ফিরতে রাত নটা। দিনের পর দিন কাটতো তাঁর সঙ্গে কথা হত না। এই কারণে মনে মনে চাইতাম তাঁর যেন কোন একটা অসুখ হয়। বাবার অসুখ খুবই মজার ব্যাপার। অসুখ হলে তিনি তাঁর ছেলে মেয়েদের চারপাশে বসিয়ে উচুগলায় কবিতা আবৃত্তি করতেন। এতে নাকি তাঁর অসুখের আরাম হত।

এই অসুখের সময়ই তিনি একবার ঘোষণা করলেন সঙ্কল্পিতা থেকে যে একটা কবিতা মুখস্ত করে তাঁকে শোনাতে পারবে সে এক আনা পয়সা পাবে। দুটো মুখস্ত করলে দু'আনা।

আমি বিপুল উৎসাহে কবিতা মুখস্ত করতে শুরু করলাম। তার মধ্যে কোন কাব্যশ্রীতি কাজ করেনি। আর্থিক ব্যাপারটাই ছিল একমাত্র প্রেরণা। যথা সময়ে একটা কবিতা মুখস্ত হয়ে গেল। নাম 'এবার ফেরাও মোরে'। দীর্ঘ কবিতা। এই দীর্ঘ

কবিতাটা মুখস্ত করার পেছনের কারণ হল এটা বাবার খুব প্রিয় কবিতা। তাঁদের সময় না-কি বি, এ ক্লাসে পাঠ্য ছিল।

বাবা আমার কবিতা আবৃত্তি শুনলেন।

কোন ভুল না করে এই দীর্ঘ কবিতাটি বলতে পারায় তিনি আনন্দে অভিভূত হলেন। এক আনার বদলে আমি চার আনা পয়সা পেলাম। সাহিত্য বিষয়ক কর্মকাণ্ড থেকে ওটাই ছিল আমার প্রথম রোজগার।

প্রসঙ্গ থেকে আবার সরে এসেছি। পাঠক পাঠিকাদের কাছে ক্ষমা প্রার্থনা করে প্রসঙ্গে ফিরে যাই। বুঝতে পারছি এ রকম সমস্যা বার বার হবে, মূলধারা থেকে সরে আসব উপধারায়। কে জানে সেই উপধারাই হয়তবা মূলধারা। তাছাড়া আত্মজীবনীমূলক রচনার মূল্যহীন অংশগুলিই বেশী মূল্য পায়।

গান বাজনা বাবার বড়ই প্রিয় ছিল। বি,এ পাশ করার পর কোলকাতায় কি একটা পার্ট টাইম কাজ জুটিয়ে কিছু পয়সা করেন। তা দিয়ে যে বস্তুটি কিনেন তার নাম কলের গান। দম দিয়ে চালানো কলের গান। কোডাক ক্যামেরাটা ছাড়া অন্য কোন জাগতিক কোন বস্তুর প্রতি তাঁর বিন্দুমাত্র মমতা ছিল না কিন্তু এই যন্ত্রটির প্রতি তাঁর মমতার সীমা ছিল না। পার্ট টাইম চাকরিটি চলে যাবার পর তিনি অঁখে জ্বলে পড়েন। কোলকাতার যে মেসে থাকতেন তার ভাড়া বাকি পড়ে। শখের জিনিস একেক বিক্রি করে ফেলার অবস্থায় পৌঁছে যান। বিক্রি করার মত অবশিষ্ট যা থাকে তা হচ্ছে কলের গান, যা বিক্রি করা আমার বাবার পক্ষে একেবারেই অসম্ভব। সেই সময় তাঁর বন্ধু বাবুবরা বললেন, শেরে বাংলা এ কে ফজলুল হকের সংগে দেখা করলেইতো সব সমস্যার সমাধান হয়।

শেরে বাংলা এ কে ফজলুল হক তখন অবিভক্ত বাংলার মুখ্যমন্ত্রী। শিক্ষিত মুসলমান ছেলে তাঁর কাছে চাকরির আবেদন করলেই কাজ সমাধা। কিছু না কিছু তিনি জুটিয়ে দেবেনই। বাবা বি,এ পাশ করেছেন ডিসটিংশন নিয়ে। খুব শখ ছিল ইংরেজী সাহিত্যে কোলকাতা বিশ্ববিদ্যালয়ে এম, এ পড়বেন। অর্থের অভাবে তা হয়ে উঠছে না। সেই সময় মুসলমান ছেলেদের চাকরি বাকরির প্রায় সব দরজাই বন্ধ। বাবা ঠিক করলেন, দেখা করবেন শেরে বাংলার সংগে। এই অভাব আর সহ্য করা যাচ্ছে না।

অতিব্যস্ত মুখ্যমন্ত্রী বাবাকে সাক্ষাতের সুযোগ দিলেন। তাঁদের মধ্যে নিম্নলিখিত কথাবার্তা হল।

বি এ পাশ করেছ?

জি।

ফলাফল কি?

বি,এ-তে ডিসটিংশন ছিল।

বাহ খুব খুশী হলাম শুনে। এম, এ পড়বে তো?

জি জনাব, ইচ্ছা আছে।

ইচ্ছে আছে বললে হবে না— পড়তেই হবে। তুমি কি আমার কাছে বিশেষ কোন কাজে এসেছ? কোন সাহায্য বা কোন সুপারিশ, কিংবা চাকরি?

বাবার খুবই লজ্জা লাগল। তিনি বললেন, জি না আমি আপনার সঙ্গে দেখা করতে এসেছি। অন্য কোন কারণে না।

শেরেবাংলা বেশ খানিকক্ষণ বাবার দিকে তাকিয়ে থেকে বললেন, সবাই আমার কাছে তদবীর নিয়ে আসে। অনেকদিন পর একজনকে পাওয়া গেল সে কোন তদবীর নিয়ে আসে নি। আমি খুব আনন্দিত হলাম। তুমি এম,এ পাশ করার পর পেশা হিসাবে শিক্ষকতা বেছে নেবে। আমার ধারণা তুমি ভালো শিক্ষক হবে।

বাবা সেই রাতেই কলকাতা ছেড়ে গ্রামের বাড়ি ময়মনসিংহের কুতুবপুরে চলে আসেন। বাড়ি থেকে সাত মাইল দূরে মীরকাশেম নগরের এক স্কুলে বিপুল উৎসাহে শিক্ষকতা শুরু করেন। মাসের শেষে বেতন নিতে গেলে হেডমাস্টার সাহেব বিস্মিত হয়ে বলেন, আদায়পত্র কিছুই নেই, বেতন দেব কি? দেখা যাক পরের মাসে।

পরের মাসেও একই অবস্থা। তার পরের মাসেও তাই। হেডমাস্টার সাহেব মাথা দুলিয়ে বলেন, শিক্ষকতা হচ্ছে মহান পেশা। আত্মনিবেদন থাকতে হয়। শুধু টাকা টাকা করলে কি হয়?

অভাব অনটনে বাবার জীবন পর্যুদস্ত হয়ে গেল। চাকুরির দরখাস্ত করেন— চাকরি পান না। এর মধ্যে বিয়েও করে ফেলেছেন। স্ত্রীকে নিজের কাছে এনে রাখার সামর্থ নেই। ঘোর অমানিশা। এই অবস্থায় কি মনে করে জানি বৃটিশ সরকারের বেঙ্গল পুলিশে সাব-ইন্সপেক্টরীর পরীক্ষায় বসলেন। সেই সময়ে অত্যন্ত লোভনীয় এই চাকরিতে নির্বাচিত হবার জন্যে কঠিন সব পরীক্ষায় বসতে হত। তিনি পরীক্ষা দিতে বসলেন। গ্রহের ফেরে এই পরীক্ষায় প্রথম হয়ে গেলেন। ট্রেনিং নিতে গেলেন পুলিশ একাডেমী সারদায়।

জীবনের শেষ দিন পর্যন্ত পুলিশের চাকরিটি তিনি নিষ্ঠুর সঙ্গে করেছেন। বাবার মৃত্যুর পর দেখা গেল এই জীবনে তিনি চার হাজারের মত বই এবং পোস্টাপিসের পাশ বই-এ একশত তিরিশ টাকা ছাড়া কিছুই রেখে যান নি। বইয়ের সেই বিশাল সংগ্রহও পাকিস্তান হানাদার বাহিনীর নির্দেশে পিরোজপুরের একদল হৃদয়হীন মানুষ

লুট করে নিয়ে যায়। বাবাকে ধরে নিয়ে বলেশুর নদীর তীরে। পাকিস্তান সেনাবাহিনীর বিরুদ্ধে বিদ্রোহের কারণে তাঁকে গুলি করে হত্যা করে। ভরা পূর্ণিমায় ফিনকি ফোঁটা জ্যোৎস্নায় তাঁর রক্তাক্ত দেহ ভাসতে থাকে বলেশুর নদীতে। হয়ত নদীর শীতল জল তাঁর রক্ত সে রাতে ধুয়ে দিতে চেষ্টা করেছে। পূর্ণিমার চাঁদ তার সর্বটুকু আলো ঢেলে দিয়েছে তাঁর ভাসন্ত শরীরে। মমতাময়ী প্রকৃতি পরম আদর গ্রহণ করেছে তাঁকে।

এই প্রসঙ্গ থাক। এই প্রসঙ্গে আর লিখতে ইচ্ছে করছে না। বরং মা'র কথা বলি।

আমার মা

আমার মা ছিলেন তাঁর পরিবারের প্রথম সন্তান। শ্যামলা ধরনের একহারা গড়নের মেয়ে। অতি আদরের মেয়ে। কেমন করে জানি সবার ধরণা হল, এই মেয়ে তেমন বুদ্ধিমতী হয় নি। তাঁকে বুদ্ধিমতী বানানোর জন্যে ছোট বয়সেই পাঠিয়ে দেওয়া হল বারহাট্টায়। বারহাট্টার আমার মা'র মামার বাড়ি। মা'র নানীজান অসম্ভব বুদ্ধিমতী। তিনি যদি ট্রেনিং দিয়ে এই মেয়েকে কিছুটা মানুষ করতে পারেন।

তাঁর ট্রেনিং—এ তেমন কাজ হল না। মার বুদ্ধি বিশেষ বাড়ল না। তবে ক্লাশ টুতে তখন সরকারী পর্যায়ে একটি বৃত্তি পরীক্ষা হত। মা এই পরীক্ষা দিয়ে মাসে দু' টাকা হারে বৃত্তি পেয়ে চারদিকে চমক সৃষ্টি করে ফেললেন। এ কি কান্ড। মেয়েমানুষ সরকারী জলপানি কি করে পায়?

মা'র দুর্ভাগ্য বৃত্তির টাকা তিনি পাননি, কারণ তাঁকে উপরের কোন ক্লাশে ভর্তি করানো হল না। মেয়েদের পড়াশোনার দরকার কি। চিঠি লিখতে পারার বিদ্যা থাকলেই যথেষ্ট। না থাকলেও ক্ষতি নেই। মেয়ে মানুষের এত চিঠি লেখালেখিরই বা কি প্রয়োজন? তারা ঘর সংসার করবে। নামাজ কালাম পড়বে। এর জন্যে বাংলা ইংরেজী শেখার দরকার নেই। তারচে বরং হাতের কাজ শিখুক। রান্না বান্না শিখুক। আচার বানানো শিখুক, পিঠা বানানো শিখুক। বিয়ের সময় কাজে লাগবে।

আমার মা পড়াশোনা বাদ দিয়ে এইসব কাজ অতি যত্নের সঙ্গে শিখতে লাগলেন। তাছাড়া নানীজান প্রতি বৎসর একটি করে পুত্র বা কন্যা জন্ম দিয়ে ঘর ভর্তি করে ফেলছেন। তাঁর সর্বমোট বারটি সন্তান হয়। বড় মেয়ে হিসেবে ছোট ছোট ভাইবোনদের মানুষ করার কিছু দায়িত্বও মা'র উপর চলে আসে।

এই করতে করতে একদিন তাঁর বয়স হয়ে গেল পনেরো। কি সর্বনাশের কথা। পনেরো হয়ে গেছে এখনো বিয়ে হয় নি। বারহাট্টা থেকে কঠিন সব চিঠি আসতে লাগল যেন অবিলম্বে মেয়ের বিয়ের চেষ্টা করা হয়। চারদিকে সুপাত্র খোঁজা চলতে লাগল। একজন সুপাত্রের সন্ধান আনলেন মা'র দূর সম্পর্কের চাচা, শ্যামপুরের

দুদু মিয়া। দুদু মিয়াও পাগল ধরনের মানুষ। বি,এ পাশ করেছেন। দেশ নিয়ে মাথা ঘামান। কি করে অশিক্ষিত মুর্খ মুসলমানদের রাতারাতি শিক্ষিত করা যায়, সেই চিন্তাতেই তাঁর বেশির ভাগ সময় কাটে। শ্যামপুরের অতি দুর্গম অঞ্চলে তিনি ইতিমধ্যে একটা স্কুল দিয়ে ফেলেছেন সেই স্কুলে একদল রোগাভোগা ছেলে সারাদিন স্বরে অ, স্বরে আ বলে চেষ্টায়। যে মানুষটি এইসব কর্মকান্ডের মূলে তার বিচার বুদ্ধির উপর খুব আস্থা রাখা যায় না। তবু আমার নানাঞ্জন তাঁকে ডেকে পাঠালেন। তাঁদের মধ্যে নিম্নলিখিত কথাবার্তা হয়।

ছেলে কি করে?

কিছু করে না। করার মধ্যে যা করে তা হল ন্যাশনাল লাইব্রেরীতে বসে সারাদিন বই পড়ে।

তুমি তাকে চেন কি করে?

দীর্ঘদিন তার সঙ্গে কোলকাতার এক মেসে ছিলাম। তাকে খুব ভাল করে দেখার সুযোগ হয়েছে।

বাড়ির অবস্থা কি?

বাড়ির অবস্থা শোচনীয়।

ছেলের নাম করা আত্মীয় স্বজন কে আছেন?

কেউ নেই। সবাই হত দরিদ্র। তবে ছেলের বাবা উলা পাশ। বড় মৌলানা— অতি সজ্জন ব্যক্তি।

অতি সজ্জন ব্যক্তি দিয়ে কাজ হবে না— ছেলের মধ্যে তো তেমন কিছু দেখছি না— রাতদিন যে ছেলে বই পড়ে সে আবার কেমন ছেলে? বই পড়লে তো সংসার চলে না।

দুদুমিয়া খানিকক্ষণ গম্ভীর থেকে বললেন— এত ভাল ছেলে আমি আমার জীবনে দেখিনি। এইটুকু বলতে পারি।

দেখতে কেমন?

রাজপুত্র।

কি বললে?

রাজপুত্র।

ছেলে দেখতে রাজপুত্রের মত শুধু এই কারণেই নানাঞ্জন ছেলের বাবার সঙ্গে কথা বলতে রাজী হলেন। কথা বলে মুগ্ধ হয়ে গেলেন।

আমার দাদা মৌলানা আজিমুদ্দিন আহমেদের সঙ্গে কথা বলে মুগ্ধ হয় নি এমন মানুষ খোঁজে পাওয়া যাবে না। আরবী ফারসীতে তাঁর অগাধ জ্ঞান ছিল। অতি বিনয়ী মানুষ ছিলেন। মৃত্যুর পূর্ব মুহূর্তে তিনি হাত তুলে যে প্রার্থনা করেন তার থেকে মানুষটির চরিত্র স্পষ্ট হবে বলে আমার ধারণা। তিনি বলেন—

“হে পরম করুণাময়, আমার পুত্র কন্যা এবং তাদের পুত্রকন্যাদের তুমি কখনো অর্থ-বিস্ত দিও না। তাদের জীবনে যেন অর্থকষ্ট লেগেই থাকে। কারণ টাকা পয়সা মানুষকে ছোট করে। আমি আমার সন্তান-সন্ততিদের মধ্যে ‘ছোট মানুষ’ চাই না। বড় মানুষ চাই।”

আমার দাদার চরিত্র আরো স্পষ্ট করার জন্যে আমি আর একটি ঘটনার উল্লেখ করি। আমার মেট্রিক পরীক্ষার ফল বের হয়েছে। কেমন করে যেন পরীক্ষায় খুব ভাল করে ফেলি। পাঁচটি লেটার নিয়ে বোর্ডে দ্বিতীয় স্থান পেয়ে যাই। টেলিগ্রামে দাদাকে এই খবর পাঠানো হয়। যে পিওন দাদাকে টেলিগ্রামটি দেন দাদা তাঁকে বসতে বলেন।

পিওন বসে আছে। দাদা ভেতর বাড়ি চলে গেছেন। বেশ খানিকক্ষণ পর ফিরে এসে বললেন শোকরানা নামাজ পড়ার জন্যে খানিক বিলম্ব হয়েছে। আপনার কাছে ক্ষমা চাচ্ছি। ভাই, আমি অতি দরিদ্র একজন মানুষ, এই মুহূর্তে আমার কাছে যা টাকা পয়সা ছিল সবই আমি নিয়ে এসেছি। আপনি এই টাকা গ্রহণ করলে আমি মনে শান্তি পাব। কারণ আজ যে খবর আপনি আমাকে দিলেন এত ভাল খবর এই জীবনে আমি পাই নাই।

এই বলে দাদা নগদ টাকা এবং ভাণ্ডি পয়সায় প্রায় চল্লিশ টাকা একটা রুমালে বেঁধে বিস্মিত পিওনের হাতে দিলেন। শুধু তাই না বিনীত ভঙ্গিতে বললেন, আমি খুব খুশী হব আপনি যদি দুপুরে চারটা ডালভাত আমার সঙ্গে খান।

তার কিছুদিন পরেই আমি দাদার একটা চিঠি পাই। তাতে তিনি লিখলেন— “তোমাকে ছোটবেলায় একটি প্রশ্ন করিয়াছিলাম। তুমি জবাব দিতে পার নাই। আমার মন খারাপ হইয়াছিল। আমার ধারণা ছিল তোমার বুদ্ধি তেমন নাই। আজ তুমি তা ভুল প্রমাণিত করিয়াছ। আমি জীবনের শেষ প্রান্তে দাঁড়াইয়া মৃত্যুর জন্য অপেক্ষা করিতেছি। এই সময়ে তোমার কারণে মনে প্রবল সুখ পাইলাম। মৃত্যু পথযাত্রী একজন বৃদ্ধকে তুমি সুখী করিয়াছ— আল্লাহ তোমাকে তার প্রতিদান দিবেন। আল্লাহ সবাইকে সবার প্রাপ্য দেন।”

যে প্রশ্নটির জবাব শৈশবে দিতে পারিনি সেটা বলি। তখন ক্রাশ টুতে পড়ি। সিলেটের বাসায় দাদা বেড়াতে এসেছেন। অসহ্য গরম। হাত পাখায় হাওয়া খাচ্ছেন। হঠাৎ আমাকে বললেন, ‘এই শোন, পাখার ভেতর তো বাতাস ভরা নেই। তবু পাখা নাড়লেই আমরা বাতাস পাই কি ভাবে? বাতাসটা আসে কোথেকে?’

আমি সেই কঠিন প্রশ্নের জবাব দিতে পারি নি। প্রশ্ন শুনে হকচকিয়ে গিয়েছিলাম।

দাদা দুঃখিত গলায় বললেন, আমার ধারণা ছিল— তুই পারবি। তুই তো আমার মনটাই খারাপ করে দিলি।

প্রসঙ্গ অনেক দূরে সরে এসেছি— আবার প্রসঙ্গে ফিরে যাই।

ছেলের সঙ্গে কোন কথাবার্তা না বলে শুধুমাত্র ছেলের বাবার সঙ্গে খানিকক্ষণ কথা বলার পরই নানা জান একজন বেকার ছেলের সঙ্গে মেয়ে বিয়ে দেবার প্রস্তুতি নিয়ে নিলেন।

মেয়েকে ‘বিবাহীত জীবন কি’ তা বোঝানোর জন্যে বর্ষীয়ান মহিলারা দূর দূর থেকে নাইওর চলে এলেন। নকশি পিঠা তৈরী হয়ে টিন বন্দি হতে লাগল। সন্ধ্যাবেলায় হাতে গড়া সেমাই তৈরী করতে করতে পাড়ার বৌরা মিহি গলায় বিয়ের গীত গাইতে লাগল।

নানা জান কি মনে করে চলে গেলেন মৈমনসিংহ। ছেলে নাটক নভেল পড়ে, মেয়েকেও তার জন্যে প্রস্তুত থাকা দরকার। দু’একটা নাটক নভেল পড়া থাকলে মেয়ের সুবিধা হবে।

লাইব্রেরীতে গিয়ে বললেন, ভাল একটা নভেল দিন তো। আমার মেয়ের জন্যে— বুঝে শুনে দিবেন।

লাইব্রেরীয়ান গভীর মুখে বললেন, মেয়েছেলেকে নাটক নভেল বই দেওয়া ঠিক না— একটা ধর্মের বই নিয়ে যান— তাপসী রাবেয়া।

জি না একটা নভেলই দেন।

দোকানদার একটা বই কাগজে মুড়ে দিয়ে দিল। নানা জান মা’র হাতে সেই বই তুলে দিলেন। মা’র জীবনে এটাই প্রথম উপন্যাস। উপন্যাসের নাম— ‘নৌকাডুবি’। লেখক শ্রী রবীন্দ্রনাথ ঠাকুর। প্রথম উপন্যাস পড়েই মা মোহিত। একবার, দু’বার, তিনবার পড়া হল তবু যেন ভাল লাগা শেষ হয় না।

বাসর রাতে বাবা জিজ্ঞেস করলেন, তুমি কি কখনো বই টাই পড়েছ— এই ধর গল্প উপন্যাস।

মা লাজুক ভঙ্গিতে ইয়া সূচক মাথা নাড়লেন।

দুই একটা বইয়ের নাম বলতে পারবে?

মা ক্ষীণ স্বরে বললেন, নৌকা ডুবি।

গভীর বিস্ময়ে বাবা দীর্ঘ সময় কোন কথা বলতে পারলেন না। এই অজ্ঞ পাড়াগাঁয়ের একটি মেয়ে কিনা রবীন্দ্রনাথের নৌকাডুবি পড়ে ফেলেছে?

সেই রাতে বাবা-মা’র মধ্যে আর কি কথা হয়েছে আমি জানি না। জানার কথাও নয়। তাঁরা আমাকে বলেন নি। কিন্তু আমি কল্পনা করে নিতে পারি, কারণ আমি এবং আমার অন্য পাঁচ ভাই বোনতো তাঁদের সঙ্গে ছিলাম। লুকিয়ে ছিলাম তাঁদের ডালবাসায়।

গ্রামের যে বোকা ধরনের মেয়ে বিয়ের পর শহরে চলে এল আমার ধারণা সে অসম্ভব বুদ্ধিমতী মেয়েদেরই একজন। আমি এখনো তাঁর বুদ্ধির ঝলকে চমকে

চমকে উঠি। মা শুধু যে বুদ্ধিমতী তাই না অসম্ভব সাহসী এবং স্বাধীন ধরনের মহিলা।

১৬ই ডিসেম্বরের পর মা আমাদের ভাইবোন সবাইকে নিয়ে ঢাকায় চলে এলেন। হাতে একটি পয়সাও নেই। এই অবস্থায় পুরানো পল্টনে বাড়ি ভাড়া করলেন, আমাদের সবাইকে এমন করে বললেন, তোরা তোদের পড়াশোনা চালিয়ে যা। সংসার নিয়ে কাউকে ভাবতে হবে না। আমি দেখব।

পুরানো পল্টনের ঐ বাড়িতে আমাদের কোন আসবাব পত্র ছিল না। আমরা মেঝেতে কম্বল বিছিয়ে ঘুমুতাম। কেউ কেড়াতে এলে তাকে মেঝেতেই বসতে হত।

মা নানান সমিতিতে ঘুরে ঘুরে সেলাইয়ের কাজ জোগাড় করলেন। দিনরাত মেশিন চালান। জামা কাপড় তৈরী করেন। সেলাইয়ের রোজগারের সঙ্গে বাবার পেনসনের নগন্য টাকা যুক্ত হয়ে সংসার চলত। তিনি শুধু যে ঢাকার সংসার চালাতেন তাই না, মোহনগঞ্জে তাঁর বাবার বাড়ির সংসারও এখান থেকেই দেখাশোনা করতেন। অনেক কাল আগে গ্রামের এই বোকা বোকা ধরনের লাজুক কিশোরী মেয়েটি কখনো কম্পনাও করতে পারেনি কি কঠিন সংগ্রামময় জীবন অপেক্ষা করছে তার জন্যে। যুদ্ধ ক্লান্ত এই বৃদ্ধা এখন কি ভাবেন আমি জানি না। তাঁর পুত্রকন্যারা নানান ভাবে তাকে খুশী করতে চেষ্টা করে। তিনি তাদের সে সুযোগ দিতে চান না। আমার ছোট ভাই ডঃ জাফর ইকবাল আমেরিকা থেকে টিকিট পাঠিয়ে দিয়ে লিখল — মা, আপনি আসুন, আপনাকে আমেরিকা এবং ইউরোপ ঘুরিয়ে দেখাব। আপনার ভাল লাগবে।

মা বললেন, যে জিনিশ তোমার বাবা দেখে যেতে পারেন নি আমি তা দেখব না। আমি বললাম, আশ্চর্য আপনি কি হচ্ছে যেতে চান? যেতে চাইলে বলুন, ব্যবস্থা করি।

না।
ছোটবেলায় দেখেছি আপনি জরী দিয়ে তাজমহলের ছবি ঐকেছিলেন। তাজমহল দেখতে ইচ্ছা করে?

না। আমি একা একা কিছু দেখব না।
বাবা যে সব জিনিষ খেতে পছন্দ করতেন তাঁর মৃত্যুর পর কোনদিন সেই খাবার বাসায় রান্না করেন নি। সেই সব খাবারের একটি হচ্ছে বুটের ডাল দিয়ে গরুর গোশত। আর একটি বরবটির চচ্চরি। আহামরি কোন খাবার নয়।

আমি একবার বললাম, আমাদের জন্যে আপনার কি কোন উপদেশ আছে?
তিনি খানিকক্ষণ চুপ করে থেকে বললেন, উপদেশ নয়, একটি আদেশ আছে। আদেশটি হচ্ছে— কেউ যদি কখনো তোমাদের কাছে টাকা ধার চায় তোমরা না

বলবে না। আমাকে অসংখ্যবার মানুষের কাছে ধারের জন্যে হাত পাততে হয়েছে। ধার চাওয়ার লজ্জা এবং অপমান আমি জানি।

(অপ্রাসঙ্গিক ভাবে বলি) মা'র অসাধারণ ই এস পি বা অতিস্বীয় ক্ষমতা ছিল। প্রায় সময়ই ভবিষ্যতে কি ঘটনা ঘটবে তা ছবছ বলে দিতে পারতেন। মা'র এই অস্বাভাবিক ক্ষমতা সম্পর্কে বাবা পুরোপুরি ওয়াকিবহাল ছিলেন। মা'কে তিনি ঠাট্টা করে ডাকতেন 'মহিলা পীর'। মা'র এই ক্ষমতা বাবার মৃত্যুর পরপরই পুরোপুরি নষ্ট হয়ে যায়।

জোহনার ফুল

আমাদের বাসা ছিল সিলেটের মীরাবাজারে।

শাদা রঙের একতলা দালান। চারদিকে সুপারি গাছের সারি। ভেতরের উঠানে একটি কুয়া। কুয়ার চারপাশ বাঁধানো। বাড়ির ডানদিকে প্রাচীন কয়েকটা কাঁঠাল গাছ। কাঁঠাল গাছের পাতায় আলে-আধারের খেলা। কুয়ার ভেতর উকি মারছে নীল আকাশ। একটু দূরে দুটো আতাফল গাছ। সোনালি রঙের আতাফলে পুরো গাছ সোনালি হয়ে আছে। পাকা আতার লোভে ভিড় করেছে রাজ্যের পাখি। তাদের সঙ্গে বগড়া বেঁধে গেছে কাকদের। কান পাতা দায়। এমন একটা রহস্যময় পরিবেশে আমার শৈশবের শুরু। শুরুটা খুব খারাপ না। তবু শৈশবের কথা মনে হলেই প্রথমে কিছু দুঃখময় স্মৃতি ভিড় করে। কিছতেই তাদের তাড়াতে পারি না। সেগুলো দিয়েই শুরু করি।

একদিন কি যেন একটা অপরাধ করেছি। কাপ ভেঙ্গে ফেলেছি কিংবা পাশের বাড়ির জালানায় ঢিল মেরেছি। অপরাধের শাস্তি দেয়া হবে। মা শাস্তির ভার দিলেন আমার মেজো চাচাকে। তিনি আমাদের সঙ্গেই থাকতেন। সিলেটে এম.সি কলেজে আই, এ পড়তেন এবং প্রতি বছর ফেল করতেন। মেজো চাচা আমাকে শাস্তি দেয়ার দায়িত্ব অত্যন্ত আনন্দের সঙ্গে গ্রহণ করলেন। আমাকে একহাতে শূন্যে বুলিয়ে কুয়ার মুখে ধরে বললেন, দিলাম ছেড়ে।

আমার সমস্ত শরীর ভয়ে থর থর করে কাঁপতে লাগল। সত্যি যদি ছেড়ে দেন। নীচে গহীন কুয়া। একটা হাত ধরে আমাকে কুয়ার ভেতর বুলিয়ে রাখা হয়েছে। মেজো চাচা মাঝে মাঝে এমন ভঙ্গি করছেন যেন আমাকে সত্যি সত্যি ছেড়ে দিচ্ছেন। আমি কাঁদতে কাঁদতে বললাম, আর কোনদিন করব না। আর কোনদিন না।

আমার বয়স তখন কত? পাঁচ কিংবা ছয়। নিতান্তই শিশু। এ রকম একটা শিশুকে কুয়ায় ঝুলিয়ে যে ভয়ংকর মানসিক শাস্তি মেজো চাচা দিলেন তা ভাবলে আমি আজো আতংকে নীল হয়ে যাই। লিখতে লিখতে চোখের সামনে সেই অতলস্পর্শী কুয়া ভেসে উঠছে। বুক ধড়ফড় করা শুরু হয়েছে।

আমার মেজো চাচা কিংবা আমার মা দু'জনের কেউই বুঝলেন না একটা শিশুকে এইভাবে মানসিক শাস্তি দেয়া যায় না। এটা অমানবিক। এ ধরনের শাস্তিতে শিশুর মনোজগতে বড় রকমের বিপর্যয় ঘটে যেতে পারে। বরং তাঁরা দু'জনই দেখলেন - আমি একটি মাত্র জিনিসকেই ভয় পাই, সেটা কুয়ায় ঝুলিয়ে ধরা। কাজেই বার বার আমাকে এই শাস্তি দেয়া হতে লাগল।

অসম্ভব দুঃস্থ ছিলাম। নানানভাবে সবাইকে জ্বালাতন করতাম। শাস্তি আমার প্রাপ্য ছিল, কিন্তু এত কঠিন শাস্তি না। যে শাস্তি চিরকালের মত আমার মনে ছাপ ফেলে গেছে।

আমাকে এই অমানবিক নির্যাতনের হাত থেকে রক্ষা করে আমার ছোটবোন শেফু। তাকেও একদিন এই শাস্তি দেয়া হল। মেজো চাচা তাকে কুয়ার ভেতরে ঝুলিয়ে দিয়ে বললেন - দিলাম ছেড়ে।

সে নির্বিকার ভঙ্গিতে বলল, দেন ছেড়ে।

চাচা বললেন, সত্যি সত্যি ছেড়ে দেব?

সে খমখমে গলায় বলল, ছাড়েন। অপনাকে ছাড়তে হবে।

শেফুর কথাবার্তায় আমার চাচা এবং মা দু'জনই খুব মজা পেলেন। বাবা অফিস থেকে ফেরা মাত্র তাঁকে এই ঘটনা বলা হল। বাবা অবাক হয়ে বললেন, এদের এইভাবে শাস্তি দেয়া হয়? কৈ আমি তো জানি না। কি ভয়ংকর কথা। এই জাতীয় শাস্তির কথা আর যেন কোন দিন না শুনি।

মা বললেন, এরা বড় যন্ত্রণা করে। তুমি তো বাসায় থাক না। তুমি জান না।

বাবা কঠিন গলায় বললেন। এ ধরনের শাস্তির কথা আর যেন না শুনি।

শাস্তি বন্ধ হল, কিন্তু মন থেকে স্মৃতি মুছল না। কতদিন পার হয়েছে অথচ এখনো দুঃস্থের মত গহীন কুয়াটার কথা মনে পড়ে। প্রসঙ্গক্রমে বলা দরকার, আমার এই চাচা শুধু শাস্তিদাতাই ছিলেন না, প্রচুর আদরও তাঁর কাছে পেয়েছি। আমার অক্ষরজ্ঞানও হয়েছে তাঁর কাছে।

কুয়ার হাত থেকে বাঁচলেও মাড়সার হাত থেকে বাঁচলাম না। মাকড়সার ব্যাপারটি বলি। কোন এক বিচিত্র এবং জটিল কারণে আমরা ছ'ভাই বোনেরই ভয়ংকর মাকড়সা ভীতি আছে। নিরীহ ধরণের এই পোকাটিকে দেখামাত্রই আমাদের সবার মনোজগতে এক ধরণের বিপ্লব ঘটে যায়। আমরা আতংকে ঘূণায় শিউরে উঠি, বমি ভাব হয়, চিৎকার করে ছুটে পালিয়ে যেতে ইচ্ছা করে।

মনোবিজ্ঞানীরা এই ভীতির নিশ্চয়ই একটা ব্যাখ্যা দেবেন। আমার কাছে কোন ব্যাখ্যা নেই।

মাকড়সা ভীতির মাত্রা বুঝানোর জন্যে আমি আমাদের তিন ভাইবোনের তিনটি ঘটনা উল্লেখ করছি।

আমার ছোট বোন শেফু কলেজে অধ্যাপনা করে। একদিন রিকশা করে ক্লাশে যাচ্ছে, হঠাৎ রিকশা থেকে একটা মাকড়সা তার শাড়িতে উঠে পড়ল। সে লাফ দিয়ে রিকশা থেকে নেমে অসংখ্য মানুষের দৃষ্টিকে সম্পূর্ণ অগ্রাহ্য করে শাড়ি খুলে দূরে ছুঁড়ে ফেলে দিয়ে কাঁদো কাঁদো গলায় বলল- মাকড়সা। আমরা শাড়িতে মাকড়সা। লোকজন হৃদয়হীন নয়। তারা শাড়ি থেকে মাকড়সা সরিয়ে হাতে শাড়ি তুলে দিল।

দ্বিতীয় ঘটনাটি আমার ছোট ভাই ডঃ জাফর ইকবালকে নিয়ে। সে শিকাগো বাস স্টেশনের টয়লেটে গোছে। হঠাৎ লক্ষ করল ইউরিন্যালে সবুজ রঙের একটা বড়সড় মাকড়সা। সে বিকট একটা চিৎকার দিয়ে বের হয়ে এল। লোকজন দৌড়ে এল, পুলিশ ছুটে এল, সবার ধারণা কোন খুন টুন হয়ে গেছে।

এবার আমার নিজের কথা বলি। ঢাকা থেকে বরিশাল যাচ্ছি। বি এম কলেজে রসায়ন শাস্ত্রের এম, এস, সি পরীক্ষার একটারন্যায় হয়ে। প্রথম শ্রেণীর একটি কেবিন রিজার্ভ করা। রাত দশটার মত বাজে হঠাৎ দেখি কেবিনের ছাদে বিশাল এক মাকড়সা পেটে ডিম নিয়ে চুপচাপ বসে আছে। আমি ছিটকে ঘর থেকে বের হয়ে এলাম। দশ টাকা কবুল করে একজন ঝাড়ুদার নিয়ে এলাম। সে অনেক ঝুঁজেও মাকড়সা পেল না। কোথায় যেন লুকিয়ে পড়েছে। কেবিনে আর ঢুকলাম না। যদি মাকড়সা আবার কোন অন্ধকার কোণ থেকে বের হয়ে আসে। প্রচন্ড শীতের রাত পার করে দিলাম ডেকে হাঁটাহাটি করে। যতবার মাকড়সার কথা মনে পড়ল ততবারই শিউরে উঠতে লাগলাম।

এই ভীতি আমরা ভাইবোনেরা জন্মসূত্রে নিয়ে এসেছি। হয়তবা আমাদের জীনের ছয়চল্লিশটি ক্রমোজমের কোন একটিতে কোন গন্ডগোল আছে যার কারণে এই অস্বাভাবিক ভীতি।

শৈশবে আমাকে ঘুম পাড়ানোর জন্যে এই মাকড়সা ভীতিও কাজে লাগানো হত।

আধিকাংশ শিশুর মত আমরাও রাতে ঘুম আসত না। মা বিরক্ত হয়ে মেজো চাচাকে বলতেন- গুকে ঘুম পাড়িয়ে আন।

মেজো চাচা আমাকে কোলে নিয়ে চলে যেতেন বাড়ির দক্ষিণে কাঁঠাল গাছের কাছে। সেই কাঁঠাল গাছে বিকটাকার মাকড়সা জাল পেতে চুপ চাপ বসে থাকত। আমাকে সেই সব মাকড়সাদের কাছে নিয়ে গিয়ে বলা হত - ঘুমাও। না

ঘুমালে মাকড়সা গায়ে দিয়ে দেব। আমি সঙ্গে সঙ্গে ঘুমিয়ে পড়তাম। এখন আমার ধারণা, ঘুম না ভয়ে হয়ত বা অচেতনের মত হয়ে যেতাম। কেউ তা বুঝতে পারত না। ভাবতাম ঘুম পাড়ানোর চমৎকার অসুখ তাঁদের কাছে আছে।

এখন ভাবলে মনটা খারাপ হয়ে যায়। না বুঝে বয়স্ক মানুষেরা নিতান্তই অবোধ একটি শিশুর উপর কি ভয়াবহ নির্মাতনই না চালিয়েছেন।

আমি ছেলেবেলায় কথা লিখব বলে প্তির করার পর আমার সব আত্মীয় স্বজনকে চিঠি লিখে জানালাম— আমার ছেলেবেলা সম্পর্কে কেউ যদি কোন কিছু জানেন আমাকে যেন লিখে জানান। আমার এই আহ্বানের জবাবে ছোট্টাচা ময়মনসিংহ থেকে যে চিঠি লিখলেন তার অংশ বিশেষ এই রকম — “হুমায়ূন শৈশবে বড়ই দুঃ প্রকৃতির ছিল। রাত্রিতে কিছুতেই ঘুমাইত না। তখন তাহাকে মাকড়সার কাছে নিয়া গেলে দুই হাতে গলা জড়াইয়া সঙ্গে সঙ্গে ঘুমে অচেতন হইয়া যাইত। ইহার কি যে কারণ কে জানে।”

কৃয়া এবং মাকড়সা এ দু’টি জিনিষ বাদ দিলে আমার শৈশবকে অসাধারণ আনন্দময় সময় বলা যায়। আমার ছিল পূর্ণ স্বাধীনতা। আজ কালকার মায়েরা সন্তান চোখের আড়াল হলেই চোখ কপালে তুলে হৈ চৈ শুরু করে দেন। আমাদের সময় অবস্থা ভিন্ন ছিল। শিশুদের খোঁজ পড়ত খাওয়ানোর সময়। তাদের পড়াশোনা নিয়েও বাবা মাদের খুব দৃষ্টিস্তা ছিল না। একটি শিশু শিক্ষা এবং ধারাপাতের চিঠি একটা বই এবং স্ট্রেট পেনসিল কিনে দিলেই বাবা মা’রা মনে করতেন অনেক করা হল। বাকি পড়াশোনা ধীরে সুস্থে হবে, এমন তাড়া কিসের? ক্লাস ওয়ান টুর পরীক্ষাগুলিতে ফার্স্ট হতে হবে এমন কোন কথা নেই। পাশ করে পরের ধাপে উঠতে পারলেই হল। না পারলেও ক্ষতি নেই, পরের বার উঠবে। স্কুলতো পালিয়ে যাচ্ছে না। পুরো ব্যাপারটায় এক ধরনের টিলেঢালা ভাব।

এমনিতেই নাচুনি বুড়ি তার উপর ঢাকের বাড়ি, বাবা আদেশ জারী করলেন তার ছেলেমেয়েদের যেন পড়াশোনার ব্যাপারে কোন চাপ না দেয়া হয়। পড়াশোনার জন্যে সারা জীবনতো পড়েই রইল, শিশুকালটা আনন্দে কাটুক। মহানন্দে সময় কাটিতে লাগল। শিশুদের আনন্দের উপকরণ চারদিকে ছড়ানো। অতি তুচ্ছ বিষয় থেকেও তারা আনন্দ আহরণ করে। আমিও তাই করছি। আমার মার কোলে তখন আমার তৃতীয় ভাই ইকবাল। মা তাকে নিয়েই ব্যতিব্যস্ত। আমার দিকে তাকানোর সময় নেই। আমি মনের আনন্দে একা একা ঘুরি। যা দেখি তাই ভাল লাগে। ক্লাস্তিহীন হাঁটা। মাঝে মাঝে পথ হারিয়ে ফেলি। তখন একে তাকে জিজ্ঞেস করতে হয়, মীরাবাজার কোন দিকে?

আমার দীর্ঘ অনুপস্থিতিতেও বাসায় কাউকে কখনো চিন্তিত হতে দেখিনি। দুপুর খাবার সময় উপস্থিত থাকলেই হল। দুপুরের খাবার শেষ হবার পর আরো আনন্দ।

মা দিবানিদ্রায়। কিম ধরা দুপুর। আমি ঘুরছি নিজের মনের আনন্দে। এই পর্যায়ে একজন আইসক্রিমওয়ালার সংগে আমার খাতির হয়ে গেল। তখনকার আইসক্রিমওয়ালারা দুহাতে দুটা আইসক্রিমের বক্স নিয়ে মধুর গলায় ডাকত দুধমালাই আইসক্রিম, দুধমালাই।

দুরকম আইসক্রিম ছিল। দুপয়সা দামের সাধারণ আর এক আনা দামের অসাধারণ। আইসক্রিম খাবার পরম সৌভাগ্য মাসে দুএকবারের বেশী হত না। হবার কথাও নয়। যাই হোক এমনি এক কিম ধরা দুপুরে ‘চাই দুধমালাই আইসক্রিম’ শুনে ছুটে ঘর থেকে বের হলাম। আইসক্রিমওয়ালার বলল, আইসক্রিম কিনবে?

আমি মনের দুঃখে মনে চেপে বললাম, না। পয়সা নাই। আইসক্রিমওয়ালার কিছুক্ষণ কি জানি ভেবে বলল, খাও একটা আইসক্রিম পয়সা লাগবে না।

আমার তখন বিস্মিত হবার ক্ষমতাও নষ্ট হয়ে গেছে। কি বলে এই লোক? না চাইতেই দিয়ে দিচ্ছে কোহীনূর হীরা। লোকটি একটা আইসক্রিম বের করে হাতে দিয়ে বলল, আরাম করে খাও। আমি বসে বসে দেখি।

সে উচু হয়ে বসল। আমি অতি দ্রুত আইসক্রিম শেষ করলাম। কেউ দেখে ফেললে সমস্যা হতে পারে। দেখল না। রোজ এই ঘটনার পুনরাবৃত্তি হতে লাগল। ঠিক দুপুর বেলা সমস্ত মীরাবাজারের মায়েরা যখন ঘুমে অচেতন তখন সে আসে। চাপা গলায় ডাকে, এই খোকা, এই।

আমি ছুটে বের হয়ে আসি। সে আইসক্রিম বের করে দেয়। আমি মহানন্দে খাই। খেতে খেতে মনে হয় আমার মানব জন্ম সার্থক হল। পুরো এক মাস ধরে এই ব্যাপার চলল। তারপর মা কি করে জানি টের পেলেন। তিনি আতকে উঠলেন, তার ধারণা এ ছেলেধরা। বাসায় সবারই ভয় আমাকে নিয়ে যাবে। বাবাকে খবর দিলেন। তিনিও চিন্তিত হলেন এবং অফিস বাদ দিয়ে এক দুপুরে বাসায় বসে রইলেন আইসক্রিমওয়ালাকে ধরতে হবে। বেচারার ধরা পড়ল।

বাবা তাঁর পুলিশী গলায় কঠিন ধমক দিলেন। মেঘ স্বরে বললেন, তুমি একে রোজ আইসক্রিম খাওয়াও, কারণটা কি?

এমনি খাওয়াই স্যার, কোন কারণ নাই।

বিনা কারণে কিছুই হয় না— তুমি কারণ বল।

আইসক্রিমওয়ালার মাথা নীচু করে দাঁড়িয়ে রইল। বাবার হাজারো প্রশ্নের জবাব দিল না। বাবা পুরো মাসে ত্রিশটি আইসক্রিম হিসাব করে তাকে দাম দিয়ে দিলেন এবং বললেন, আর কখনো যেন সে না আসে। সে টাকা নিয়ে চলে গেল কিন্তু পরদিনই আবার এল। একটা দুধ মালাই আইসক্রিম বের করে নীচুগলায় বলল, খোকা তুমি খাও। আর তোমার সংগে আমার দেখা হবে না। আমি আইসক্রিম বেচা ছেড়ে দিব।

আমি চিন্তিত স্বরে বললাম, কেন?

সে তার জবাব না দিয়ে কোমল গলায় বলল, খোকা আমার কথা মনে থাকবে?

আমি বললাম, হুঁ থাকবে।

মানুষকে বেশীর ভাগ কথাই আমি রাখতে পারিনি। কিন্তু হত দরিদ্র আইসক্রীম ওয়ালার কথা আমি মনে রেখেছি। এখনো মাঝে মাঝে অবাক হয়ে ভাবি কি জন্যে সে বিনাপয়সায় আমাকে আইসক্রীম খাওয়াতো? আমার বয়েসী কোন ছেলে কি তার ছিল যে অল্প বয়সে মারা গেছে? দরিদ্র পিতা তার স্নেহ ঢেলে দিয়েছে অচেনা একটি শিশুকে? না কি অন্য কোন কারণ আছে।

রহস্যময় এই পৃথিবীতে কিছু কিছু ঘটনার পুনরাবৃত্তি হয়। প্রায় তিরিশ বছর পর আইসক্রীম খাওয়ার ঘটনাটির পুনরাবৃত্তি হল। তখন শ্যামলীতে থাকি। আইসক্রীমওয়ালার এসেছে। আমার বড় মেয়ে নোভা আমার কাছ থেকে দুটো টাকা নিয়ে ছুটে গেল আইসক্রীম কিনতে। আইসক্রীম হাতে হাসি মুখে ফিরে এসে বলল, আইসক্রীমওয়ালার আমার কাছ থেকে টাকা নেয়নি। বিনা টাকায় আইসক্রীম দিল। বলল, টাকা দিতে হবে না।

আমার স্ত্রী চমকে উঠে বলল, নির্ঘাৎ ছেলেধরা। তুমি এঙ্কুনি নীচে যাও।

আমি নীচে গেলাম না। ছেলেবেলার সেই আইসক্রীমওয়ালার কথা ভেবে বড়ই মন কেমন করতে লাগল।

শীতের শুরুতে আমার আনন্দময় আকাশে কালো মেঘের ঘনঘটা দেখা যেতে লাগল। শুনলাম আমি রাস্তায় ঘুরে ঘুরে পুরোপুরি বাদর হয়ে গেছি। প্যান্ট পরা বলে লেজটা দেখা যায় না। প্যান্ট খুলে ফেললে লেজও দেখা যাবে। আমার বাদর জীবনের সমাপ্তি ঘটানোর জন্যই আমাকে নাকি স্কুলে ভর্তি করিয়ে দেয়া হবে। আমার প্রথম স্কুলে যাওয়া উপলক্ষে একটা নতুন খাকী প্যান্ট কিনে দেয়া হল। সেই প্যান্টের কোন জীপার নেই, সারাফুণ হা হয়ে থাকে। অবশ্যি তা নিয়ে আমি খুব একটা উদ্ভিগ্ন হলাম না। নতুন প্যান্ট পরছি — এই আনন্দেই আমি আত্মহারা।

মেজো চাচা আমাকে কিশোরীমোহন পাঠশালায় ভর্তি করিয়ে দিয়ে এলেন এবং হেড মাস্টার সাহেবকে বললেন — চোখে চোখে রাখতে হবে। বড়ই দুর্ট।

আমি অতি সুবোধ বালকের মত ক্লাসে গিয়ে বসলাম। মেঝেতে পাটি পাতা। সেই পাটির উপর বসে পড়াশোনা। ছেলে মেয়ে সবাই পড়ে। মেয়েরা বসে প্রথম দিকে, তাদের পেছনে ছেলেরা। আমি খানিকক্ষণ বিচার বিবেচনা করে সবচেয়ে রূপবতী বালিকার পাশে ঠেলেঠেলে জায়গা করে বসে পড়লাম। রূপবতী বালিকা অত্যন্ত হৃদয়হীন ভঙ্গিতে তুই তুই করে সিলেটি ভাষায় বলল, এই তোমার প্যান্টের ভেতরের সবকিছু দেখা যায়।



আমার বাবা ফয়জুর রহমান আহমেদ
একজন রহস্যময় পুরুষ



আমার মা, কোলে ন'মাস বয়সের
ছেটি বোন শেফু



মীরকাশেম নগর স্কুলের শিক্ষক
আমার বাবা ফয়জুর রহমান
আহমেদ



মেয়েদের হ্রস্ব পরে আমার শৈশবের
শুরু আট মাস বয়সে তোলা - প্রথম
ছবি

মার এক পাশে আমি কোলে জ্বাফর
ইকবাল
(কোলেটনিক সুখ দুঃখ, দীপু নাম্বার টু,
হাত কাটা রবিন এবং জুগো-র মতো
অসাধারণ কিছু গ্রহের জনক)



সাত বছর বয়সে তোলা ছবি। পড়ি
ক্লাশ হুতে।



হারানো স্মৃতিশক্তি ফিরে পাবার পর
ছেলেকে কোলে নিয়ে তোলা মার
ছবি

আমার দশ বছর বয়সে তোলা ছবি।
আমরা পাঁচ ভাই বোন এবং
আমাদের পোষা হরিণ 'ইরিনা'



আমি এবং আমার সর্বেচ্ছনিক সঙ্গী
শেফু



আমার ফুপু মাহমুদা মাত্র তের বছর
বয়সে যার জীবনাবসান হয়



সবচেয়ে ছোট ভাই — কাটুনিষ্ট
আহসান হাবীব, বর্তমানে উম্মাদ
পত্রিকার কার্যনির্বাহী সম্পাদক।



সুরসাগর প্রাণেশ দাস

ক্লাসের সব ক'টা ছেলেমেয়ে এক সঙ্গে হেসে উঠল। মেয়েদের আক্রমণ করা অনুচিত বিবেচনা করে সবচে উচ্চস্বরে যে ছেলেটি হেসেছে, তার উপর ঝাঁপিয়ে পড়লাম। হাতের কনুইয়ের প্রবল আঘাতে রক্তারক্তি ঘটে গেল। দেখা গেল ছেলেটির সামনের একটি দাঁত ভেঙ্গে গেছে। হেড মাস্টার সাহেব আমাকে কান ধরে সারাক্ষণ দাঁড়িয়ে থাকার নির্দেশ দিলেন। ছাত্রছাত্রীদের উপদেশ দিলেন — এ মহাগুণ্ডা, তোমরা সাবধানে থাকবে। খুব সাবধান। পুলিশের ছেলে গুণ্ডা হওয়াই স্বাভাবিক।

ক্লাস ওয়ান বারোটার মধ্যে ছুটি হয়ে যায়। এই দুই ঘন্টা আমি কান ধরে দাঁড়িয়ে থাকলাম। আমার সময়টা যে খুব খারাপ কাটল তা নয়। স্কুলের পাশেই আনসার ট্রেনিং ক্যাম্প। তাদের ট্রেনিং দেয়া হচ্ছে। লেফট রাইট। লেফট রাইট। দেখতে বড়ই ভাল লাগছে। মনে মনে ঠিক করে ফেললাম বড় হয়ে আনসার হব।

ক্লাসে দ্বিতীয় দিনেও শাস্তি পেতে হল। মাস্টার সাহেব অকারণেই আমাকে শাস্তি দিলেন। সম্ভবত প্রথম দিনের কারণে আমার উপর রেগে ছিলেন। তিনি মেঘস্বরে বললেন, গাধাটা মেয়েদের সঙ্গে বসে আছে কেন? এই তুই কান ধরে দাঁড়া।

দ্বিতীয় দিনেও সারাক্ষণ কান ধরে দাঁড়িয়ে থাকলাম।

অত্যন্ত আশ্চর্যের ব্যাপার তৃতীয় দিনেও একই শাস্তি। তবে এই শাস্তি আমার প্রাপ্য ছিল। আমি উনু নামের এক ছেলের স্ট্রেট ভেঙ্গে ফেললাম। ডাঙ্গা স্ট্রেটের টুকরায় উনুর হাত কেটে গেল। আবার রক্তপাত, আবার কান ধরে দাঁড়িয়ে থাকার শাস্তি।

আমি ভাগ্যকে স্বীকার করে নিলাম। ধরেই নিলাম যে স্কুলের দু'ঘন্টা আমাকে কান ধরে দাঁড়িয়ে থাকতে হবে। মাস্টার সাহেবেরও ধারণা হল যে আমাকে কানে ধরে সারাক্ষণ দাঁড় করিয়ে রাখলে আমি অন্যদের বিরক্ত করার সুযোগ পাব না।

আজকের পাঠক পাঠিকাদের কাছে অবিশ্বাস্য মনে হলেও সত্যি সত্যি আমাকে পাঠশালার প্রথম শ্রেণীটি কান ধরে দাঁড়িয়ে দাঁড়িয়েই কাটাতে হয়েছে। তবে আমি একা ছিলাম না, বেশির ভাগ সময় আমার সঙ্গী ছিল শংকর। সে খানিকটা নির্বোধ প্রকৃতির ছিল। ক্লাসে দুই জন শংকর ছিল। আমি যার কথা বলছি তার নাম মাথা মোটা শংকর। মোটাবুদ্ধি অর্থে মাথা মোটা নয়, আসলেই শরীরের তুলনায় তার মাথা অস্বাভাবিক বড় ছিল। ক্লাস ওয়ানে সে যতখানি লম্বা ছিল ক্লাস ফাইভে উঠার পরও সে ততখানি লম্বাই রইল, শুধু মাথাটা বড় হতে শুরু করল।

ক্লাসে শংকর ছাড়া আমার আর কোন বন্ধু জুটল না। সে আমার সঙ্গে ছায়ার মত লেগে রইল। আমি যেখানে যাই সে আমার সঙ্গে আছে। মারামারিতে সে আমার মত দক্ষ নয়, তবে মারামারির সময় দাঁত মুখ ঝিচিয়ে আঁ আঁ ধরনের গরিলার মত শব্দ করে প্রতিপক্ষের দিকে ছুটে যেত। এতেই অনেকের পিলে চমকে যেত।

শংকর কে নিয়ে শিশু মহলে আমি বেশ ত্রাসের সঞ্চার করে ফেলি।

এই সময় স্কুলে কিছুদিনের জন্যে কয়েকজন ট্রেনিং স্যার এলেন। ট্রেনিং স্যার ব্যাপারটা কি আমরা কিছুই জানিনা। হেড স্যার শুধু বলে গেলেন এই নতুন স্যার আমাদের কিছুদিন পড়াবেন। দেখা গেল নতুন স্যাররা বড়ই ভাল। পড়া না পারলেও শাস্তি দেবার বদলে মিষ্টি করে হাসেন। হৈ চৈ করলেও ধমকের বদলে করুন গলায় চুপ করতে বলেন। আমরা মজা পেয়ে আরো হৈ চৈ করি। একজন ট্রেনিং স্যার কেন জানিনা সব ছাত্র ছাত্রীদের বাদ দিয়ে আমাকে নিয়ে পড়লেন। অদ্ভুত সব প্রশ্ন করেন। আমার যা মনে আসে বলি আর উনি গভীর মুখে বলেন তোর এত বুদ্ধি হল কি করে? বড়ই আশ্চর্যের ব্যাপার। তোর ঠিকমত যত্ন হওয়া দরকার। তোকে নিয়ে কি করা যায় তাই ভাবছি। কিছু একটা করা দরকার।

কিছু করার আগেই স্যারের ট্রেনিংকাল শেষ হয়ে গেল। তিনি চলে গেলেন। তবে কেন জানি কিছু দিন পর পরই আমার খোঁজ নিতে আসেন। গভীর আগ্রহে পড়াশোনা কেমন হচ্ছে তার খোঁজ নেন। সব বিষয়ে সবচেয়ে কম নম্বর পেয়ে ক্লাস টুতে ওঠার সংবাদ পাবার পর স্যারের উৎসাহে ভাটা পড়ে যায়। শুধু যে উৎসাহে ভাটা পড়ে তাই না। উনি এতই মন খারাপ করেন যে আমার নিজেস্বারা খারাপ লাগতে থাকে।

ক্লাস টুতে উঠে আমি আরেকটি অপকর্ম করি। যে রূপবতী বালিকা আমার হৃদয় হরণ করেছিল, তাকে সরাসরি বিয়ের প্রস্তাব দিয়ে ফেলি। গভীর গলায় জিজ্ঞেস করি, বড় হয়ে সে আমাকে বিয়ে করতে রাজি আছে কি না? প্রকৃতির কোন এক অদ্ভুত নিয়মে রূপবতীরা শুধু যে হৃদয়হীন হয় তাই না, খানিকটা হিংস্র স্বভাবের ও হয়। সে আমার প্রস্তাবে খুশী হবার বদলে বাঘিনীর মত আমার উপর ঝাঁপিয়ে পড়ে। খামচি দিয়ে হাতের দুতিন জায়গার চামড়া তুলে ফেলে। স্যারের কাছে নালিশ করে। শাস্তি হিসেবে দুই হাতে দুটি ইট নিয়ে আমাকে দু হুন্টা নীল ডাউন হয়ে বসে থাকতে হয়।

শ্রেমিক পুরুষদের শ্রেমের কারণে কঠিন শাস্তি ভোগ করা নতুন কোন ব্যাপার নয়, তবে আমার মত এত কম বয়সে শ্রেমের এমন শাস্তির নজির বোধ হয় খুব বেশি নেই।

স্কুল আমার ভাল লাগত না। মাস্টাররা অকারণে কঠিন শাস্তি দিতেন। পাঠশালা ছুটির পর বেশ কিছু ছাত্র ছাত্রী চোখ মুছতে মুছতে বাড়ি যাচ্ছে, এ ছিল প্রাত্যহিক ঘটনা। আমাদের পাঠশালায় প্রথম শ্রেণী থেকে চতুর্থ শ্রেণী পর্যন্ত পড়ার ব্যবস্থা। কিন্তু একটা ক্লাস থেকে অন্য ক্লাস আলাদা করা নয়, অর্থাৎ কোথাও কোন পাঠশালার ব্যবস্থা নেই। কোন ক্লাসে একজন শাস্তি দিলে পাঠশালার সবাই তা

* এই শংকর বর্তমানে বাংলাদেশের ছবিতে তাঁদের চরিত্রে অভিনয় করে বলে অনেকে।

বিমলানন্দ ভোগ করত। শিক্ষকরাও যে মমতা নিয়ে পড়াতে, তাও না। তাঁদের বেশির ভাগ সময় কাটতো ছাত্রছাত্রীদের শাস্তি দেয়ার কলাকৌশল বেঁধে করার কাজে। পড়ানোর সময় কোথায়? আমার পরিষ্কার মনে আছে একজন শিক্ষক ক্লাস ফোর-এর একজন ছাত্রের দিকে একবার প্রচণ্ড জোরে ডাষ্টার ছুড়ে মারেন। ছাত্রটির মাথা ফেটে যায়। অজ্ঞান হয়ে যাওয়া ছাত্রের মাথায় প্রচুর পানি ঢালাঢালি করে তার জ্ঞান ফেরানো হয়। জ্ঞান ফেরার পর প্রথম যে প্রশ্নটি তাকে করা হয় তা হচ্ছে, আর এই রকম করবি কোন দিন?

স্কুল জীবনের একটি উল্লেখযোগ্য ঘটনার কথা বলি।

একদিন ক্লাসে গিয়ে দেখি চারদিকে চাপা উত্তেজনা। পড়াশোনা এবং শাস্তি দুটোই বন্ধ। শিক্ষকদের মুখ হাসি হাসি। আমাদের জানানো হল আমেরিকা নামের এক ধনী দেশ আমাদের দরিদ্র দেশের ছেলেমেয়েদের কিছু সাহায্য দিয়েছে। সেই সাহায্য আমাদের দেয়া হবে।

সাহায্য হিসেবে আমরা সবাই এক টিন গুঁড়া দুধ এবং এক টিন মাখন পেলাম। দুই হাতে দুই টিন নিয়ে হাসতে হাসতে বাড়ি ফিরে গেলাম। মা বিস্মিত হয়ে বললেন, সবাইকে দিয়েছে?

আমি বললাম, হ্যাঁ। স্যার বলেছেন, পাকিস্তানের সব স্কুলের ছাত্রছাত্রীদের দুই টিন করে দিয়েছে। মা অর্থাৎ বিস্ময়ে বললেন, একটা দেশ কত ধনী হলে এমন সাহায্য দিতে পারে? মা আমেরিকার প্রতি বড়ই কৃতজ্ঞ হলেন। আমরা সকালের নাশতায় রুটি মাখন খেতে শুরু করলাম।

টিন দুটি শেষ হবার আগেই দ্বিতীয় দফায় আবার পাওয়া গেল। এবং জানা গেল প্রতি মাসে দু'বার করে দেয়া হবে। স্কুলের হেড মাস্টার সাহেবের ঘর দুধ এবং মাখনের টিনে ভর্তি হয়ে গেল। মার মুখের হাসি আরো বিস্তৃত হল। আমেরিকা নামের সোনার দেশের সুখ ও সমৃদ্ধি কামনা করে তিনি সম্ভবত শোকরানা নামাজও আদায় করলেন।

যদিও হেড স্যারের ঘর ভর্তি ছিল দুধ এবং মাখনের টিনে আমরা আর পেলাম না। হেডমাস্টার সাহেব ঠিক করলেন ছাত্রদের স্কুলেই দুধ বানিয়ে খাওয়ানো হবে। দুধ বানানোর আনুষঙ্গিক খরচ আছে। চুলা কিনতে হবে, ছাত্রদের জন্যে মগ কিনতে হবে, জ্বালানির খরচ আছে। এই সব খরচ মেটানো হবে মাখনের টিন বিক্রি করে।

দুই তিন দিন তাই হল। বিশাল কড়াইয়ে দুধ জ্বাল দেয়া হল। অতি অখাদ্য সেই দুধ জ্বোর করে আমাদের খাওয়ানো হল। শারীরিক শাস্তির চেয়েও সেই শাস্তি ভয়াবহ ছিল। আমরা প্রতিটি ছাত্রছাত্রী মনে প্রাণে প্রার্থনা করলাম, আল্লাহ তুমি আমাদের এই দুখের হাত থেকে বাঁচাও।

আল্লাহ শিশুদের প্রার্থনা শুনলেন। শান্তি বন্ধ হল। দুধ খাওয়ানো শেষ হল। আমাদের শিক্ষকরা সবাই রিকশা ভর্তি করে দুধ ও মাখনের টিন বাড়ি নিয়ে গেলেন। আমার বয়স তখন খুবই কম এই বয়সে দুর্নীতি সম্পর্কে কোন ধারণা হবার কথা নয়, কিন্তু আমাদের সম্মানিত শিক্ষকরাই সেই ধারণা আমাদের মাথায় ঢুকিয়ে দিলেন। আমার জীবনে শিক্ষকেরা এসেছেন দু'ট গ্রহের মত। আমি সারা জীবনে অনেক কিছু হতে চেয়েছি — আইসক্রীমওয়াল, জুতা পালিশ ওয়াল থেকে ডাক্তার, ব্যারিস্টার কিন্তু কখনো শিক্ষক হতে চাইনি। চাইনি বলেই বোধহয় এখন জীবন কাটাচ্ছি শিক্ষকতায়।

মাথামোটা শংকর এবং গ্রীণ বয়েজ ফুটবল ক্লাব

শ্রী থেকে ফোরে উঠব।

বার্ষিক পরীক্ষা এসে গেছে। বাড়িতে বাড়িতে পড়াশোনার ধুম। আমি নির্বিকার। বই নিয়ে বসতে ভাল লাগে না। যদিও পড়তে বসতে হয়। সেই বসটা পুরোপুরিই ভান। সবাই দেখল আমি বই নিয়ে বসে আছি এই পর্যন্তই। তখন প্রতি সন্ধ্যায় সিলেট শহরে মজাদার ব্যাপার হত — তার নাম 'লেমটন লেচকার'। কথাটা বোধ হয় — 'লন্ঠন লেকচার' — এর বিকৃত রূপ, অাম্যমান গাড়িতে করে জায়গায় জায়গায় সিনেমা দেখানো। পরিষ্কার পরিচ্ছন্নতা, ম্যালেরিয়া এই সব ভাল ভাল জিনিস। আমাদের কাজের ছেলে রফিক খোঁজ নিয়ে আসে আজ কোথায় লেমটন লেচকার হচ্ছে — মুহূর্তে আমরা দু'জন হাওয়া। রফিক তখন আমার বন্ধুস্থানীয়। তার কাছ থেকে বিড়ি খাওয়ার উপর কোর্স নিচ্ছি। বিড়ি খেলে কচি পেয়ারা পাতা চিবিয়ে মুখের গন্ধ নষ্ট করতে হয় এসব গৃহবিদ্যা শিখে নিচ্ছি। এই জাতীয় শিক্ষায় আমার আগ্রহের কোন অভাব দেখা যাচ্ছে না।

লেমটন লেকচারের ভূত আমার ঘাড় থেকে নামানোর অনেক চেষ্টা করা হল। নামানো গেল না। মা হাল ছেড়ে দিলেন। এখন আর সন্ধ্যা হলে পড়তে বসতেও বলেন না। আমি মোটামুটি সুখে আছি বলা চলে।

এখন এক সুখের সময়ে মাথা মোটা শংকর খুব উত্তেজিত ভঙ্গিতে বলল, তার মা তাকে বলেছেন সে যদি ক্লাস শ্রী থেকে পাশ করে ফোর এ উঠতে পারে তাহলে তাকে ফুটবল কিনে দেবেন।

সে আমার কাছে এসেছে সাহায্যের জন্য। কি করে এক ধাক্কা পরের রুগশে ওঠা যায়। একটা চমড়ার ফুটবলের আমাদের খুবই শখ। সেই ফুটবল এখন মনে হচ্ছে খুব দূরের ব্যাপার নয়। সেই দিনই পরম উৎসাহে শংকরকে পড়াতে বসলাম। যে করেই হোক তাকে পাশ করাতে হবে। দু'জন একই ক্লাসে পড়ি। এখন সে ছাত্র, আমি শিক্ষক। শুকে পড়ানোর জন্যে নিজেকে প্রথম পড়তে হয়, বুঝতে হয়। যা পড়াই কিছুই শংকরের মাথায় ঢোকে না। মনে হয় তার দুই কানে রিফ্লেকটর লাগানো। যা বলা হয় সেই রিফ্লেকটরে ধাক্কা খেয়ে ফিরে আসে, ভেতরে ঢুকতে পারে না। যাই হোক প্রাণপণ পরিশ্রমে ছাত্র তৈরী হল। দু'জন পরীক্ষা দিলাম। ফল বের হলে দেখা গেল আমার ছাত্র ফেল করেছে এবং আমি স্কুলের সমস্ত শিক্ষকদের স্তম্ভিত করে প্রথম হয়ে গেছি। ফুটবল পাওয়া যাবে না এই দুঃখে রিপোর্ট কার্ড হাতে কাঁদতে কাঁদতে বাসায় ফিরলাম।

এই ক্ষুদ্র ঘটনা বাবাকে খুব মুগ্ধ করল। বাসায় যেই আসে বলেন — আমার এই ছেলের কাণ্ড শুনুন। পরীক্ষায় ফার্স্ট হয়ে কাঁদতে কাঁদতে বাসায় ফিরেছে কারণ হল.....

এই ঘটনার আরেকটি সুফল হল বাবা মা'কে ডেকে বলে দিলেন — কাজলকে পড়াশোনা নিয়ে কখনো কিছু বলার দরকার নেই। ও ইচ্ছা হলে পড়বে ইচ্ছা না হলে না। তাকে নিজের মত থাকতে দাও।

আমি পরিপূর্ণ স্বাধীনতা পেয়ে গেলাম।

এই আনন্দের চেয়েও বড় আনন্দ বিশেষ বিবেচনায় মাথা মোটা শংকরকে প্রমোশন দিয়ে দেয়া হল। তার মা সেই খুশীতে তাঁকে একটা এক নম্বরী ফুটবল এবং পাম্পার কিনে দিলেন।

গ্রীণ বয়েজ ফুটবল ক্লাবের প্রতিষ্ঠা হল। আমি ক্লাবের প্রধান এবং শংকর আমার এ্যাসিস্টেন্ট। আমাদের বাসার কাজের ছেলে রফিক আমাদের ফুলব্যাক। অসাধারণ খেলোয়াড়।

নানার বাড়ি দাদার বাড়ি

একদিন স্কুল থেকে বাসায় ফিরে দেখি — মাকে আজ অন্যরকম লাগছে। তাঁর চেহারায় খুকী খুকী ভাব চলে এসেছে। কথা বলছেন অনেকটা সুরেলা গলায়। ব্যাপারটা কি?

অসাধারণ ব্যাপার একটা ঘটেছে — আমরা নানার বাড়ি এবং দাদার বাড়ি বেড়াতে যাচ্ছি। আমার শৈশবের সবচে আনন্দময় সময় হচ্ছে এই দু'জায়গায় বেড়াতে যাওয়া। প্রতি দু বছর পর পর একবার তা ঘটতো। আমার মনে হত এত

আনন্দ এত উত্তেজনা সহ্য করতে পারব না। অজ্ঞান হয়ে যাব। আমরা ছুটিতে যাচ্ছি। ছুটিতে যাচ্ছি। ছুটিতে যাচ্ছি।

ছুটি।

সিলেট মেলে রাতে চড়ব। গভীর রাতে সেই ট্রেন ভৈরবের ব্রীজে উঠবে। আমরা যদি ঘুমিয়ে পড়ি আমাদের ডেকে তোলা হবে। গভীর বিস্ময়ে দেখব ভৈরবের ব্রীজ। ভৈরবেলায় ট্রেন পৌঁছবে গৌরীপুর জংশন। ঘুম ভাঙবে চা-ওয়ালাদের অদ্ভুত গলার চা-গ্রাম চা-গ্রাম শব্দে। মিষ্টি লুচি দিয়ে সকালের নাস্তা। চার থেকে পাঁচ ঘণ্টা গৌরীপুর জংশনে যাত্রা-বিরতি। কী আনন্দ! কী আনন্দ! স্টেশনের এক মাথা থেকে অন্য মাথায় ঘুরে বেড়াও। ওভার ব্রীজে উঠে তাকিয়ে দেখ পিপীলিকার সারির মত ট্রেনের সারি। দূরের দিগন্তে বিস্তৃত ধানের ক্ষেত। সেই ক্ষেতে নেমেছে শাদা বকের দল। তারা উড়ে উড়ে যাচ্ছে আবার এসে বসছে। আরো অনেক দূরে মেঘের কোলে নীল-রঙা গারো পাহাড়। এইগুলি কি এই পৃথিবীর দৃশ্য? না, এই পৃথিবীর দৃশ্য নয় — মুলোমাটির এই পৃথিবী এত সুন্দর হতে পারে?

নানার বাড়ি পৌঁছতে পৌঁছতে নিশুতি রাত। কিন্তু স্টেশন গমগম করছে। নানার বাড়ির এবং তাদের আশে-পাশের বাড়ির সব পুরুষ চলে এসেছেন। মহিলারাও এসেছেন। তারা স্টেশনে ঢুকেননি, একটু দূরে হিন্দু বাড়িতে দাঁড়িয়ে আছেন।

দরজা দিয়ে নামার সুযোগ নেই। তার আগেই আমাকে কেউ হাত বাড়িয়ে জানালা দিয়ে কোলে তুলে নিয়েছেন। একজনের কোল থেকে আরেকজনের কোলে ঘুরছি। মা খুশীতে ক্রমাগত কাঁদছেন। আহা কি আনন্দময় দৃশ্য।

দুটি হ্যান্ডবাক বাতিতে রাস্তা আলো করে আমরা রওনা হলাম। দুপাশে অন্ধকার-করা গাছপালায় রাজ্যের জোনাকী জ্বলছে নিভছে। এতো দেখা যাচ্ছে কালীবাড়ি। মা কালী জীব বের করে শিবের বুক পা দিয়ে দাঁড়িয়ে আছেন, নানার বাড়ি পৌঁছতে তাহলে দেবী নেই। অসংখ্য শিহাল একসঙ্গে ডাকছে — রাত্রির প্রথম প্রহর শেষ হল বোধ হয়।

একবার বলেছি, আবারও বলি, আমার জীবনের সবচেয়ে আনন্দময় সময় কেটেছে নানার বাড়িতে। বাড়িটার তিনটা ভাগ — মূল বসতবাড়ি, মাঝের ঘর, বাংলাঘর।

বাংলাঘরের সামনে প্রকাণ্ড খাল। বর্ষায় সেই খাল কানায় কানায় ভরা থাকে। ঘাটে বাধা থাকে নৌকা। কাউকে বললেই নৌকা নিয়ে খানিকটা ঘুরিয়ে আনে।

মূল বাড়ির পেছনে ঘন জঙ্গল। এমনই ঘন যে গাছের পাতা ভেদ করে আলো আসে না। সেই জঙ্গলের ভেতর সার দেয়াল। সার দেয়াল হলো পাঁচিল দিয়ে ঘেরা নানাদের শক্তিমান পূর্ব পুরুষদের কবরস্থান। জঙ্গলে কত বিচিত্র ফলের গাছ — লটকান, ডেউয়া, কামরাসা.....।

চারপাশে কত বিচিত্র চরিত্রের মানুষ। আমাদের মন ভুলানোর জন্যে সবার সেকি চেষ্টা। আমার এক মামা (নজরুল মামা) কোথেকে ভাড়া করে ধোপাদের এক গাধা নিয়ে এলেন। গাধা যে আসলেই গাধা সেটা বোঝা গেল — সাত চড়ে রা নেই। পিঠে চড়ে বস, পিঠ থেকে নাম — কিছু বলবে না। শুধু পেছনের দিকে যাওয়া নিষেধ। হঠাৎ লাথি বসাতে পারে।

বাচ্চাদের আনন্দ দেয়ার জন্যে ঘুড়ি উড়ানো হবে। সেই ঘুড়ি নৌকার পালের চেয়েও বড়। একবার আকাশে উঠলে পুনের মত আওয়াজ হতে থাকে। ঘুড়ি বেঁধে রাখতে হয় গাছের সঙ্গে, নয়ত উড়িয়ে নিয়ে চলে যাবে।

সন্ধ্যাবেলা লাটিম খেলা। প্রকাণ্ড এক লাটিম। লাটিম ঘুরানোর জন্যে লোক লাগে দু'জন। লাটিম ঘুরতে থাকে ভেঁ ভেঁ আওয়াজে। আওয়াজে কানে তাল ধরে যায়।

একটু রাত বাড়লে ফাড়ার টাক্কর (পাঁঠার টাক্কর)। দুটি হিংস্র ধরনের বাঁকা শিংএর পাঁঠার মধ্যে যুদ্ধ। দুপ্রান্ত থেকে এরা ঘাড় বাঁকিয়ে ছুটে আসবে। প্রচণ্ড শব্দে একজনের শিং-এ অন্যজন আঘাত করবে। আগুনের ফুলকি বের হবে শিং থেকে। শুরু হবে মরণ-পণ যুদ্ধ, ভয়াবহ দৃশ্য।

মামাদের কেউ গভীর রাতে আমাদের ঘুম থেকে ডেকে তুলবেন। তারা 'আউল্লা' দিতে যাচ্ছেন। সঙ্গে যাব কি-না। ব্যাপারটা হল আলো দিয়ে মাছ মারা। অল্প পানিতে হ্যান্ডবাকের তীব্র আলো ফেলা হয়। সেই আলোয় দেখা যায় শিং, মাগুর শূয়ে আছে। আলোতে এদের চোখ ধাঁধিয়ে যায় — নড়তে চড়তে পারে না। তখন খোর দিয়ে তাদের গৌঁথে ফেলা হয়।

খুব ভোরে নানাআজানের সঙ্গে সন্মণ। নানাআজানের হাতে দু'নলা বন্দুক। তিনি যাচ্ছেন বিলের দিকে, আমরা পেছনে পেছনে আছি। ছররা গুলিতে তিন চারটা বক এক সঙ্গে মারা পড়ল। মৃত পাখিদের বুলিয়ে আমরা এগুচ্ছি — নাকে আসছে মাটির গন্ধ, মৃত পাখিদের রক্তের গন্ধ, বারুদের গন্ধ।

সারাদিন পুকুরে ঝাপাঝাপি, নিশুতি রাতে ঘুম ভেঙে টিনের চালে ব্যষ্টির শব্দ শোনা — এই আনন্দের যেমন শুরু নেই তেমনি শেষও নেই। ছোটদের শোবার ব্যবস্থা মাঝের ঘরে। ঢালাও বিছানা। বিছানার একপ্রান্তে মা বসে আছেন, পরিচিত জনরা আসছে। গল্প হচ্ছে, পান খাওয়া হচ্ছে — রাত বাড়ছে। কী চমৎকার সব রাত।

নানার বাড়ি ঘিরে আমার অদ্ভুত সব স্মৃতি। মাঝে মাঝে স্বপ্নদৃশ্যের মত এরা উঠে আসে। জীবনের সঙ্গে মেলাতে পারি না। কয়েকটি স্মৃতি উল্লেখ করছি।

ক) সাপে-কাটা রুগীকে ওঝা চিকিৎসা করছে এই দৃশ্য নানার বাড়িতেই প্রথম দেখি। রুগী জলচৌকিতে বসে আছে, ওঝা মন্ত্র পড়তে পড়তে হাত ঘুরাচ্ছে। সেই

দুরন্ত হাত অতি দ্রুত নেমে আসছে রুগীর গায়ে। চিকিৎসার শেষ পর্যায়ে কাঁইক্যা মাছের কাঁটা দিয়ে রুগীর পা থেকে দুধিত রক্ত বের করা হচ্ছে।

খ) মেয়ের ডাক শুনে ঝাঁক বৈধে কই-মাছ পানি ছেড়ে ডাঙ্গায় উঠে আসছে এবং প্রাণপণ চেষ্টা করছে শুকনো দিয়ে কোন এক গন্তব্যে যেতে। কেন তারা বর্ষার প্রথম মেঘ গর্জনে এমন পাগল হয়, কে বলবে।

গ) ভূতে-পাওয়া রুগীর চিকিৎসা করতেও দেখলাম। ভূতের ওঝা এসে রুগীর সামনে ঘর কেটে সেই ঘরে সরিষা ছুড়ে ছুড়ে মারছে। রুগী যন্ত্রণায় ছটফট করতে করতে বলছে, আর মারিস না। আর মারিস না।

ঘ) এক হিন্দু বাড়িতে নপুংসক শিশুর জন্ম হল। কোথেকে খবর পেয়ে একদল হিজড়া উপস্থিত। শুরু হল নাচানাচি। নাচানাচির এক পর্যায়ে এরা গা থেকে সব কাপড় খুলে ফেলল। ঝুড়ি ভর্তি করে ডিম নিয়ে এসেছিল, সেই সব ডিম ছুড়ে মারতে লাগল বাড়িতে। এক সময় শিশুটি তাদেরকে দিয়ে দেয়া হল। মহানন্দে তারা চলে যাচ্ছে। ব্যাকুল হয়ে কাঁদছে শিশুটির মা। হৃদয়ে রক্তক্ষরণ হয় এমন একটি দৃশ্য। আমার নিজের চোখে দেখা।

ঙ) এক সন্ধ্যায় নানার বাড়িতে টিল পড়তে লাগল। ছোট ছোট টিল নয় — ক্ষেত থেকে উঠিয়ে আনা বিশাল মাটির চাকড়। নানীজান বললেন, কয়েকটা দুট জ্বীন আছে। মাঝে মাঝে এরা উপদ্রব করে। তবে ভয়ের কিছু নাই, এইসব টিল কখনো গায়ে লাগে না।

ব্যাপারটা পরীক্ষা করবার জন্যে উঠোনে খানিকক্ষণ ছোট ছোট করলাম। আশে-পাশে টিল পড়ছে, গায়ে পড়ছে না, বেশ মজার ব্যাপার।

নিশ্চয় এর লৌকিক কোন ব্যাখ্যা আছে? ব্যাখ্যা থাকলেও আমার জানা নেই। জানতেও চাই না। নানার বাড়ির অনেক রহস্যময় ঘটনার সঙ্গে এটিও থাকুক। সব রহস্য ভেদ করে ফেলার প্রয়োজনই বা কি।

এবার দাদার বাড়ি সম্পর্কে বলি।

দাদার বাড়ির একটি বিশেষ পরিচিতি ঐ অঞ্চলে ছিল এবং খুব সম্ভব এখনো আছে — মৌলবী বাড়ি। এই বাড়ির নিয়ম কানুন অন্য সব বাড়ি থেকে শুধু যে আলাদা তাই না — ভীষণ রকম আলাদা। মৌলবী বাড়ির মেয়েদের কেউ কোন দিন দেখেনি, তাদের গলার স্বর পর্যন্ত শুনেনি। এই বাড়িতে গান বাজনা নিষিদ্ধ। আমরা দেখেছি ভেতরের বাড়িতেও বড় বড় পর্দা। একই বাড়ির পুরুষদের ও মেয়েদের সঙ্গে দুরত্ব রক্ষা করে চলতে হত। ভাবের আদান প্রদান হত ইশারায় কিংবা হাত তালিতে। যেমন পর্দার এ পাশ থেকে দাদাজান একবার হাত তালি দিলেন তার মানে তিনি পানি

চান। দু'বার হাত তালি — পান সুপারি। তিনবার হাত তালি — মেয়েদের গলার স্বর শোনা যাচ্ছে, আরো নিঃশব্দে হতে হবে।

আমাদের হল পীর বংশ। দাদার বাবা জাঙ্গির মুনসি ছিলেন এই অঞ্চলের নামী পীর সাহেব। তাঁকে নিয়ে প্রচলিত অনেক গল্প-গাঁথার একটি গল্প বলি : জাঙ্গির মুনসি তাঁর মেয়ের বাড়িতে বেড়াতে গেছেন। সেই আমলে যান বাহন ছিল না। দশ মাইল পথ, হেঁটে যেতে হল। দুপুরে পৌঁছলেন। মেয়ের বাড়িতে খাওয়া দাওয়া করে ফেরার পথে বললেন, মা আমার পাঞ্জাবীর একটা বোতাম খুলে গেছে। তুমি সুই-সূতা দিয়ে একটা বোতাম লাগিয়ে দাও। বোতাম ঘরে আছে তো?

মেয়ে বোতাম লাগিয়ে দিল। তিনি দশ মাইল হেঁটে বাড়ি ফিরলেন। বাড়িতে পা দেয়া মাত্র মনে হল বিরাট ভুল হয়েছে। তাঁর কন্যা যে বোতাম লাগাল সে কি স্বামীর অনুমতি নিয়েছে? স্বামীর বিনা অনুমতিতে স্বামীর সংসারের জিনিস ব্যবহার করা তো ঠিক না। তিনি আবার রওনা হলেন, অনুমতি নিয়ে আসা যাক। আবার কুড়ি মাইল হাঁটা।

আমি নিজে অবশ্যি এই গল্প অন্যভাবে ব্যাখ্যা করি। আমার ধারণা মেয়ের বাড়ির থেকে ফিরে এসে তাঁর খুব মন খারাপ হয়ে গেল। আবার মেয়েকে দেখার ইচ্ছা হল। একটা অজুহাত তৈরী করে রওনা হলেন।

দাদার বাড়ির কঠিন সব অনুশাসনের নমুনা হিসেবে একটা গল্প বলি। আমার ফুপুরা খুব সুন্দরী। পীর পরিবারের বংশধর। সচরাচর রূপবান হয়। তারাও ব্যতিক্রম নন। দু'জন ফুপুই পরীর মত। বড় ফুপুর বিয়ের বয়স হলে বাবা তাঁর জন্যে একজন ছেলে পছন্দ করলেন। ছেলে বাবার বন্ধু। ইংরেজী সাহিত্যে এম.এ। ছেলেও অত্যন্ত রূপবান। বাবা তাঁর বন্ধুকে সঙ্গে করে গ্রামের বাড়িতে এলেন। দাদাজানের ছেলে পছন্দ হল। মেয়ে দেখানো হল কারণ ধর্মে না-কি বিধান আছে বিয়ের আগে ছেলে মেয়েকে এবং মেয়ে ছেলেকে অন্তত একবার দেখতে পারবে। ছেলে, মেয়ে দেখে মুগ্ধ সেই রাতের কথা, বাবা তাঁর বন্ধুকে নিয়ে বেড়াতে বের হয়েছেন। খোলা প্রান্তরে বাবার বন্ধু গান ধরল। রবীন্দ্র নাথের গান তখন শিক্ষিত মহলে গাওয়া শুরু হয়েছে।

গানটি হল — আজি এ বসন্তে...

গান গাওয়ার খবর দাদাজানের কানে পৌঁছল। তিনি বাবাকে ডেকে নিয়ে বললেন, এই ছেলে যে গান জানে তাতো তুমি বল নাই।

বাবা বললো — হ্যাঁ সে গান জানে।

এইখানে মেয়ে বিয়ে দিব না। তুমি জেনে শুনে গান জানা ছেলে এ বাড়িতে আনলে কেন?

গান গাওয়া ক্ষতি কি?

লাভ ক্ষতির ব্যাপার না। আমরা কয়েক পুরুষ ধরে যে নিয়ম মানছি আমার জীবিত অবস্থায় তার কোন ব্যতিক্রম হবে না। তুমি যদি রাগ কর আমার কিছুই বলার নাই। রাগ করে বাড়িতে আসা বন্ধ করলেও করতে পার।

দাদাজান তাঁর মেয়েকে নিজে দেখে শুনে পৃথিবী থেকে দূরে সরে থাকা একটি পরিবারে বিয়ে দিয়ে দিলেন।

আমরা যখন দাদার বাড়িতে বেড়াতে যেতাম, খবর পেয়ে বড় ফুপু আসতেন পালক করে। পালক অনেক দূরে অপেক্ষা করত। ফুপার স্বামী খোঁজ নিতে আসতেন — আমরা যে এসেছি, আমাদের সঙ্গে কলের গান আছে কি—না। যদি জানতে পেতেন কলের গান আছে সঙ্গে সঙ্গে স্ত্রীকে নিয়ে ফিরে যেতেন।

ধীরে ধীরে দাদার বাড়ির মানসিকতার পরিবর্তন হয়। যে গান এই বাড়িতে নিষিদ্ধ ছিল সেই গানও চালু হয়। দাদার নির্দেশই হয়। আমার ছোট বোন শেফুর গলায় — 'তোরা দেখে যা আমি' মায়ের কোলে 'গান শোনার পর নির্দেশ দেন — গান চলতে পারে।

দাদারবাড়ি প্রসঙ্গে অল্প একটা কথা বলি। দাদার বাবা জাঙ্গির মুনসির ইচ্ছামৃত্যু হয়েছিল। দাদাজানেরও ইচ্ছা মৃত্যু হয়। মৃত্যুর সাত দিন আগে সবাইকে ডেকে তিনি তার মৃত্যুর সময় বলেন, কেউ মনে কোন আফসোস রাখবে না। মন শান্ত কর। আমাকে কেউ যদি বিশেষ কোন সেবা যত্ন করতে চাও করতে পার।

দাদাজানের বলা সময়েই তাঁর মৃত্যু হয়। মৃত্যু হয় সঞ্জমানে। মৃত্যুর ঠিক আগের মুহূর্তে আমার ছোটচাচাকে ডেকে বলেন, আমি তাহলে যাই।

পৃথিবী বড়ই রহস্যময়।

ওদের বাড়িঘর অনেক পরিষ্কার পরিচ্ছন্ন — ছিমছাম, গোছানো। মানুষগুলি হৈ চৈ করে কম। কাজ করে বেশী। দাদার বাড়িতে আমাদের অবাধ স্বাধীনতা ছিল না। দাদাজান আমাদের চোখে-চোখে রাখতেন। আদব কায়দা, ভদ্রতা শেখাতেন। সন্ধ্যাবেলা নামাজ শেষ করেই গল্প করতে বসতেন। সবই ঈশপের গল্পের মত। গল্পের শেষে একটা মোরাল থাকত। মোরাল আছে এমন গল্প ভাল লাগার কথা নয়। কিন্তু দাদাজানের গল্প ভাল লাগত। মুগ্ধ হয়ে শুনতাম।

নানার বাড়ি থেকে দাদার বাড়িতে এলে শুরুতে খানিকটা দম-বন্ধ দম-বন্ধ লাগত। তবে দাদার বাড়িরও আলাদা মজা ছিল। দাদার বাড়ির বাংলা-ঘরে দুটি কাঠের আলমীরায় ছিল অসংখ্য বই। আসলে এই দুটি আলমীরা নিয়েই একটা পাবলিক লাইব্রেরী। আজিমুদ্দিন আহমেদ পাবলিক লাইব্রেরী। আজিমুদ্দিন আহমেদ আমার দাদার নাম। তাঁর জীবদ্দশাতেই তাঁর নামে বাবা এই লাইব্রেরী করেন।

লাইব্রেরীর চাঁদা মাসে এক আনা। এই লাইব্রেরী থেকে কেউ কোনদিন বই নিয়েছে বলে আমার জানা নেই। আমরা দাদার বাড়িতে উপস্থিত হলেই শুধু চাবি খুলে বই বের করা হত। চাবি চলে আসত আমার হাতে। দাদার বাড়িতে পুকুর পাড়ে বটগাছের মত বিশাল এক কামরাসা গাছ ছিল। সেই কামরাসা গাছের গুড়িতে হেলান দিয়ে বই পড়ার আনন্দের কোন তুলনা হয় না।

বাবা জায়গায় জায়গায় লোক পাঠিয়ে গ্রাম্য গায়কদের আনতেন। তাঁরা তাঁদের বাদ্যযন্ত্র হাতে উপস্থিত হতেন — রোগা-ভোগা অনাহারক্লিষ্ট মানুষ কিন্তু তাঁদের চোখ বড়ই স্বপ্নময়।

দাদার বাড়িতে গান-বাজনা হবার কোন উপায় নেই। অনেকটা দূরে বাবার এক বন্ধুর বাড়ির উঠানে গানের আসর বসত। হাত উচু করে যখন গাতক চেউ খেলানো সুরে, মাথার লম্বা বাবড়ি ঝাঁকিয়ে গানে টান দিতেন —

“আমার মনে বড় দুষ্ক

বড় দুষ্ক আমার মনে গো।”

তখন তাঁর মনের ‘দুষ্ক’ ছড়িয়ে যেত শ্রোতাদের মনে। চোখ ভরে জল আসত। গান চলতো গভীর রাত পর্যন্ত। রাত যত গভীর হত গানে ততই আধ্যাত্মিক জীব প্রাধান্য পেতে থাকত। শেষের দিকে সেগুলি আর গান থাকত না — হয়ে উঠতো প্রার্থনা-সঙ্গীত। আমরা ছোটরা অবশ্যি তার আগেই ঘুমিয়ে পড়েছি। আমাদের কোলে করে বাড়িতে নিয়ে যাওয়া হয়েছে। কিন্তু ঘুমের মধ্যে কোন এক অদ্ভুত উপায়ে গান শুনতে পাচ্ছি।

পারুল আপা

স্কুল আমার কাছে দুঃস্বপ্নের মত ছিল। স্কুলের বাইরের জীবনটা ছিল আনন্দময়। সেই আনন্দের মাঝখানে দুঃস্বপ্নের মতই উদয় হলেন পারুল আপা। লম্বা বিষাদময় চেহারার একটি মেয়ে। চোখ দুটি অস্বাভাবিক বড়। থাকেন আমাদের একটি বাসার পরের বাসায়।

তার বাবা ওভারশীয়ার। রোগা একজন মানুষ। মাটির দিকে তাকিয়ে হাঁটেন। চিকন গলায় কথা বলেন। নিজের মেয়েশেখা অকারণে হিংস্র ভঙ্গিতে মারেন। সেই মার ভয়াবহ মার। যে কোন অপরাধে পারুল আপাদের দুবার শাস্তি হয়। প্রথমে বাবার হাতে। পরের বার মায়ের হাতে। শাস্তির ভয়াবহতা সম্পর্কে একটা ধারণা দেই। পারুল আপা একবার একটা প্লেট ভেঙে ফেললেন। সেই প্লেট ভাঙার শাস্তি হল চুলের মুঠি ধরে শূন্যে ঝুলিয়ে রাখা। পারুল আপা পরিবারের সবচেয়ে বড় মেয়ে।

তার অনেকগুলি বোন, কোন ভাই নেই। নিয়ম করে প্রতি বছর পারুল আপাদের একটি করে বোন হয়। তাঁর বাবা-মা দুজনেরই মুখ অন্ধকার হয়ে যায়।

যে সময়ের কথা বলছি তখন পারুল আপার বয়স বার তের। বয়োসন্ধি কাল। বাবা মার অত্যাচারে বেচারি জর্জরিত। তার মা তাঁকে ডাকেন হাবা নামে। অথচ তিনি মোটেই হাবা ছিলেন না। তাঁর অসম্ভব বুদ্ধি ছিল। হৃদয় ছিল আবেগ ও ভালবাসায় পরিপূর্ণ। কোন এক বিচিত্র কারণে তিনি তাঁর হৃদয়ের সমস্ত আবেগ ও ভালবাসা আমার উপর উজাড় করে দিলেন। যে ভালবাসা না চাইতেই পাওয়া যায়, তার প্রতি কোন মোহ থাকে না। পারুল আপার ভালবাসা আমার অসহ্য বোধ হত। অসহ্য বোধ হবার আরো একটি কারণ ছিল। তাঁর চেহারা তেমন ভাল ছিল না। আমার চরিত্রের বড় রকমের দুর্বল দিকের একটি হচ্ছে মেয়েদের দৈহিক রূপের প্রতি আমার তীব্র আকর্ষণ। যে দেখতে ভাল না সে হাজারো ভাল হলেও আমার কাছে গ্রহণযোগ্য নয়। রূপবতীদের বেলায় আমি অন্ধ। তাদের কোন ক্রটি আমার চোখে পড়ে না। তাদের দৈহিক সৌন্দর্যই আমার সমগ্র চেতনাকে আচ্ছন্ন করে রাখে। বলতে হচ্ছে করে, আমি তব মালঙ্কর হব মালাকার।

থাক সে কথা, পারুল আপার কথা বলি। তিনি ভালবাসার কঠিন শিকলে আমাকে বাঁধতে চাইলেন। আমাকে ভুলানোর জন্যে তাঁর সেকি চেষ্টা। বাবার পকেট থেকে পয়সা চুরি করে আমাকে দিতেন। স্কুলের টিফিনের জন্যে তাঁকে সামান্য পয়সা দেয়া হত। তিনি না খেয়ে সেই পয়সা জমিয়ে রাখতেন আমার জন্যে। এর প্রতিদানে মাঝে মাঝে তাঁর সংগে স্কুলে যেতে হত। সেটা অতি বিরক্তিকর ব্যাপার। তিনি ক্লাস করছেন, আমি বেজার মুখে তাঁর পাশে বসে। তিনি একটা হাতে আমার গলা জড়িয়ে আছেন।

সে সময় অধিকাংশ মেয়েই ছোট ভাইদের স্কুলে নিয়ে আসত। ছোট ভাইরা অনেক সময় অভিভাবকের মত কাজ করত। বাবা-মা'রা নিশ্চিন্ত থাকতেন মেয়ের সংগে পুরুষ প্রতিভু একজন কেউ আছে। পারুল আপার সংগে স্কুলে গিয়ে একবার বিরাট সমস্যায় পড়লাম। স্কুল কম্পাউণ্ডের ভেতর একজন পাগল ঢুকে গেছে। মেয়েমহলে আতঙ্কে, ছোটোছুটি। আমি পারুল আপার নজর এড়িয়ে পাগল দেখতে গেলাম। কি আশ্চর্য পাগল আমার চেনা। শুধু চেনা না, খুবই চেনা। উনি হচ্ছেন সুরসাগর প্রাণেশ দাস। বাবার ঘনিষ্ঠ বন্ধুদের একজন। প্রায়ই বাসায় আসেন। তখন গানের জলসা বসে। আমাদের বাসায় হারমোনিয়াম নেই, আমরা ছুটে গিয়ে লায়ালা আপাদের বাসা থেকে হারমোনিয়াম নিয়ে আসি। ঘণ্টার পর ঘণ্টা তিনি গান-বাজনা

করেন। গায়ক প্রাণেশ দাস, শ্রোতা আমার বাবা। এইসব গুস্তাদী ধরনের গান আমাদের ভাল লাগে না, শুধু বাবা একাই আহা আহা করেন।

প্রাণেশ কাকু পাগল হয়ে গেছেন আমার জানা ছিল না। এখন অবাক হয়ে দেখি তিনি বিচিত্র ভঙ্গি করে মেয়েদের দিকে ছুটে ছুটে যাচ্ছেন। মেয়েরা দিগ্বিদিক জ্ঞানশূন্য হয়ে ছুটেছে। একে অন্যের উপর গড়িয়ে পড়ছে। আমি অসীম সাহসী। এগিয়ে গেলাম পাগলের দিকে। প্রাণেশ কাকু আমাকে চিনতে পারলেন। গভীর গলায় বললেন, কি রে বাবু ভাল?

আমি বললাম, জ্বি ভাল। আপনি এ রকম করছেন কেন?

প্রাণেশ কাকু লজ্জিত গলায় বললেন, মেয়েগুলিকে ভয় দেখাচ্ছি।

ভয় দেখাচ্ছেন কেন?

মেয়েগুলি বড় বজ্জাত। তোর বাবা ভাল আছেন?

জ্বি।

হারমোনিয়াম কিনতে বলেছিলাম, কিনেছে?

জ্বি না।

শ' খালক টাকা হলে সিঙ্গেল রীড হারমোনিয়াম পাওয়া যায়। কিনে ফেললে হয়। রোজ-রোজ অন্যের বাসা থেকে আনা — তুই তোর বাবাকে বলবি।

জ্বি আচ্ছা।

আর আমার মাথা যে খারাপ হয়ে গেছে এই খবরটাও দিস। বাড়িতে বৈধে রাখে। তুই এখানে চুপচাপ দাঁড়া, আমি মেয়েগুলিকে আরেকটু ভয় দেখিয়ে আসি। তারপর তোকে নিয়ে তোদের বাসায় যাব।

জ্বি আচ্ছা।

আমি চুপচাপ দাঁড়িয়ে রইলাম। প্রাণেশ কাকু আরো কয়েকবার প্রচণ্ড হুকোর দিয়ে ফিরে এসে আমার হাত ধরে গেটের দিকে রওনা হলেন। আর তখনই হাতে লম্বা একটা লাঠি নিয়ে রণরংগিনী মূর্তিতে আবিভূর্ত হলেন পারুল আপা। তাঁর মূর্তি প্রাণ-সংহারক। তিনি তীব্র গলায় বললেন, একে ছাড়েন। একে না ছাড়লে লাঠি দিয়ে এক বাড়িতে আপনার মাথা ফাটিয়ে দেব। ছাড়েন বলছি। পাগলের সিব্রথ সেন্স খুব ডেভেলপড হয় বলে আমার ধারণা। প্রাণেশ কাকু সংগে সংগে বুঝলেন, আমার হাত না ছাড়লে এই মেয়ে সত্যি সত্যি তার ছোট শরীরের সমস্ত শক্তি দিয়ে আঘাত করবে। তিনি আমার হাত ছেড়ে দিলেন। পারুল আপা ছুটে এসে ছেঁে মেরে আমাকে কোলে করে নিয়ে গেলেন — এত প্রবল উত্তেজনা সহ্য করার ক্ষমতা তাঁর ছিল না। পারুল আপা হাত-পা এলিয়ে অজ্ঞান হয়ে পড়ে গেলেন।

পারুল আপা ছিলেন যাবতীয় নিষিদ্ধ বিষয়ে আমার জ্ঞানদাত্রী। পুরুষ এবং রমণীর ভেতর যে বাহ্যিক সম্পর্ক ছাড়াও অন্য এক ধরনের সম্পর্ক আছে তা প্রথম

জানলাম তাঁর কাছে। তখন আমার বয়স আট। ক্লাস খীতে উঠেছি। জটিল সম্পর্কের বিষয় জানার জন্যে বয়সটা খুবই অল্প। খুবই হকচকিয়ে গেলাম — এসব কি বলছে পারুল আপা। কি অদ্ভুত কথা!

পারুল আপার কথা বিশ্বাস করার কোনই কারণ দেখলাম না। কিন্তু — উনিই বা বানিয়ে বানিয়ে এমন অদ্ভুত কথা বলবেন কেন?

নর-নারীর সম্পর্কের জটিলতা ব্যাখ্যা করার পেছনে পারুল আপার একটা কারণ ছিল। কারণ হচ্ছে আমাদের পাশের বাসার ভদ্রলোক। উনাদের বাড়িতে পনেরো ষোল বছরের সুন্দর মত একটি কাজের মেয়ে ছিল। মেয়েটি ভদ্রলোককে বাবা ডাকত। হঠাৎ শুনি তিনি এই মেয়েটিকে বিয়ে করেছেন। ভদ্রলোকের দু'টি বড় মেয়ে কলেজে পড়ে। তারা খুব কান্নাকাটি করতে লাগলে। ভদ্রলোকের স্ত্রী ঘন ঘন ফিট হতে লাগলেন। ঘটনাটা চারপাশে বড় ধরনের আলোড়ন তৈরী করল। বড়রা সবাই এই ঘটনা নিয়ে আলাপ করে। সেই আলাপে আমি উপস্থিত হলে চোখ বড় বড় করে বলে — "এই ভাগ!"

কাজেই আমি নিজেই পারুল আপার কাছে জানতে চাইলাম ব্যাপারটা কি। তিনি গভীর গলায় বললেন — বিয়ে না করে উপায় কি — ঐ মেয়ের পেটে বাচ্চা।

পেটে বাচ্চা হলে বিয়ে করতে হয় কেন?

তাকে বলা যাবে না। খুব লজ্জার কথা।

না আমাকে বলতে হবে।

কাউকে বলবি না তো?

না বলব না।

কসম খা।

কিসের কসম?

বল — বিদ্যা!

বিদ্যা।

বল কোরান।

কোরান।

বল টিকটিকি।

টিকটিকি বলব কেন? টিকটিকি আবার কি রকম কসম?

টিকটিকির যেমন লেজ খসে যায় — তুইও যদি এই কথা কাউকে বলিস তাহলে তোর জিভও খুলে পড়ে যাবে।

আমি ভয়ে ভয়ে টিকটিকির নামেও কসম করলাম — আর পারুল আপা গন্দম ফলের সেই বিশেষ জ্ঞান আমাকে দিয়ে দিলেন। আমার মনে আছে মনে খুব বড় ধরনের আঘাত পেলাম। চিৎকার করে বলতে ইচ্ছা হল — না এসব মিথ্যা। এসব

হতেই পারে না। ব্যাপারটা নিয়ে আমি যে কারো সঙ্গে আলাপ করব সেই উপায় নেই। টিকটিকির কসম খেয়েছি। জিহ্বা খুলে পড়ে যেতে পারে।

এই সময় পাশের বাড়ির ঐ ভদ্রলোকের বড় মেয়েটির হাসি-রোগ হল। সারাক্ষণ হাসে। ঝিল ঝিল করে হাসে। গভীর রাতেও ঘুম ভেঙে শুনি পাশের বাড়ি থেকে হাসির শব্দ আসছে। গভীর রাতে সেই হাসি শুনে বড় ভয় লাগতো। গা শির শির করতো। মেয়েটির কোথায় যেন বিয়ে ঠিক হয়েছিল — বাবার এই কাণ্ডে তার বিয়ে ভেঙ্গে যাবার পরই হাসি-রোগ হয়। তার কয়েকদিন পরই তারা বাড়ি ছেড়ে চলে যায়। ভদ্রলোকের স্ত্রীকে আমি নানু ডাকতাম। মেয়ে দুটিকে খালা। তারা আমাকে খুবই স্নেহ করতো। প্রায়ই ডেকে নিয়ে বড়দের মত কাপে করে চা খেতে দিত। দু'নম্বর বোনটি আমাকে সব সময় জিজ্ঞেস করতো — তার মত সুন্দরী কোন মেয়ে আমি দেখেছি কি-না। এর উত্তরে আমি তৎক্ষণাৎ বলতাম না।

সত্যিই তো?

হ্যাঁ সত্যি।

আমি বেশি সুন্দর, না আপা?

আপনি।

সত্যি-বিদ্যা-কোরান বল।

সত্যি-বিদ্যা-কোরান।

তাঁরা চলে যাবার পর পাশের বাড়ি অনেক দিন খালি পড়ে রইল। আমার বেশ কিছুদিন খুব মন খারাপ গেল। অল্প বয়সের মন খারাপ ভাব দীর্ঘস্থায়ী হয় না। আমার বেলাও হল না। তাছাড়া মন খারাপ ভাব কাটানোর মত একটা রহস্যময় ঘটনাও ঘটল। একদিন খুব ভোরে দুজন বিচিত্র-দর্শন লোক কোদাল নিয়ে পারুল আপাদের ঘরে ঢুকল। তারা নাকি কবর খোঁড়ার লোক। ভেতরের দিকের উঠানে তারা কবর খুঁড়তে শুরু করল। এই ঘটনা শুধু যে শিশুদের মনেই চাক্কা সৃষ্টি করল তা নয়, বড়রাও অস্থিত্তি বোধ করতে লাগলেন। আমার মা'র ধারণা হল ভদ্রলোক তাঁর কোন এক মেয়েকে মেরে ফেলেছেন এখন গোপনে কবর দিয়ে দেয়া হচ্ছে। বাবা মা'কে ধমক দিলেন — এইসব অদ্ভুত ধারণা তুমি পাও কোথায়? নিশ্চয়ই অন্য কোন ব্যাপার।

ব্যাপারটা ভাও কম রোমাঞ্চকর না। গভারশীয়ার কাকুর পকেট থেকে একশ টাকা নিয়েছে তাঁর পিগুন। অথচ সে তা স্বীকার করছে না। কবর খোঁড়া হচ্ছে সেই কারণেই। পিগুন একটা কোরান-শরীফ হাতে নিয়ে কবরে নামবে এবং কোরান-শরীফ হাতে নিয়ে বলবে — সে টাকা নেয়নি। যদি সে মিথ্যা কথা বলে তাহলে আর কবর থেকে উঠতে পারবে না। কবর তাকে আটকে ফেলবে।

সেই ভয়াবহ দৃশ্য দেখার জন্য আমরা দল বেঁধে কবরের চারপাশে দাঁড়লাম। দরিদ্র পিওন হাতে কোরান-শরীফ নিয়ে কবরে নামল। সে খর খর করে কাঁপছে। গা দিয়ে ঘাম ঝরছে। তাকে দেখাচ্ছে পাগলের মত। ওভারশীয়ার কাকু বললেন — এই তুই টাকা চুরি করেছিস ?

ছে — না।

সত্যি কথা বল। মিথ্যা বললে কবরে আটকে যাবি।

টাকা চুরি করি নাই স্যার।

তোর হাতে কোরান-শরীফ, তুই কবরে দাঁড়িয়ে আছিস — মিথ্যা বললে আর উঠতে পারবি না।

তখন এক ভয়াবহ দৃশ্যের অবতারণা হল। পিওনের হাত থেকে কোরান-শরীফ পড়ে গেল। সে জ্ঞান হারিয়ে কবরের ভেতর পড়ে গেল।

ওভারশীয়ার কাকু বিজয়ীর ভঙ্গিতে বললেন, বলছিলাম না টাকা এই হারামজাদাই নিয়েছে।

কবর বন্ধ করা হল, কিন্তু পুরোপুরি বন্ধ করা হল না। বিশাল একটা গর্তের মত হয়ে রইল। যে গর্তের দিকে তাকালেই ভয় ভয় লাগতো। এ ছাড়াও আরো সব ভয়াবহ খবর কানে আসতে লাগলো — যেমন গভীর রাতে না-কি এই কবরের ভেতর থেকে ভারী গলায় কে ডাকে — আয় আয়। একবার কবর খোঁড়া হয়ে গেলে কাউকে না কাউকে সেখানে যেতে হয়। কবর তার উদর পূর্ণ করবার জন্য মানুষকে ডাকে।

আমি পারুল আপাদের বাড়ি যাওয়া ছেড়ে দিলাম। কি দরকার ঐ ভুতুড়ে বাড়িতে যাবার ? পারুল আপার সঙ্গে যোগাযোগও কমে গেল, কারণ তাঁর স্কুলের খাতায় একটি প্রেমপত্র পাওয়া গেছে। সম্মোহনহীন সেই প্রেমপত্রে তিনি একজনকে অনুরোধ করেছেন তাঁকে চুমু খাবার জন্যে। কেন জানি আমার মনে হয় ঐ প্রেমপত্রটি তিনি আমাকেই লিখেছিলেন। কারণ আমি ছাড়া অন্য কোন ছেলের সঙ্গে তাঁর কোন যোগাযোগ ছিল না। এবং একবার তাঁকে চুমু খাবার জন্যে লাজুক গলায় আমাকে অনুরোধও করেছিলেন। আমি এই অজুত প্রস্তাবে হেসে উঠায় খুব লজ্জাও পেয়েছিলেন। তার স্কুলে যাওয়া বন্ধ। জানালার শিক ধরে মাঝে মাঝে তাঁকে দাঁড়িয়ে থাকতে দেখা যায়। আমাকে দেখলেই তিনি চিবন গলায় ডাকেন। আমি পালিয়ে যাই। তাঁর বাবা-মা তাঁকে বন্দী করে রাখায় আমি এক ধরনের স্বস্তি বোধ করি। এখন আমাকে বিরক্ত করার সুযোগ তাঁর নেই। পারুল আপার বন্দী-জীবন আমাকে বেশীদিন দেখতে হয়নি। তাঁরা মীরা বাজারের বাসা বদলে কোথায় যেন চলে গেলেন। হারিয়ে গেলেন পুরোপুরি।

মানুষ দ্বিতীয়বার শৈশবে ফিরে যেতে পারে না। পারা গেলে আমি অবশ্যই এই অসহায় অভিমাত্রী, দুঃখী কিশোরীর পাশে গিয়ে দাঁড়াবাম। আজ তিনি কোথায় আছেন কিভাবে আছেন আমি জানি না। শুধু প্রার্থনা করি — যেখানেই থাকুন যেন সুখ তাঁকে ঘিরে থাকে। পৃথিবী ও মানুষের কাছে সুখ তাঁর প্রাপ্য।

স্বপ্নলোকের চাবি

পারুল আপা নেই, কাজেই স্কুলের দুঃসহ দু'ঘণ্টা কোন ক্রমে পার করে দেবার পরের সময়টা মহানন্দের। রবীন্দ্রনাথের ভাষায় কোথাও আমার হারিয়ে যাবার নেই মানা। সাজানো গোছানো সুন্দর বাড়ি দেখলেই হট করে ঢুকে পড়ি। বেশীর ভাগ ক্ষেত্রেই তৎক্ষণাৎ বের করে দেয়া হয়। এর মধ্যে একটি বাড়িতে ভিনু ব্যাপার হল। এই বাড়িটিও মীরা বাজারেই। আমাদের বাসার কাছে। বিশাল কম্পাউণ্ড, গাছগাছালিতে ছাওয়া ধবধবে শাদা রঙের বাংলা প্যাটার্নের বাড়ি। এই বাড়িতে কে থাকেন তাও আমরা জানি, সিলেট এম. সি কলেজের অধ্যাপক। আমাদের কাছে তাঁর পরিচয় হচ্ছে প্রফেসর সাব, অতি অতি অতি জ্ঞানী লোক। যাকে দূর থেকে দেখলেই পুণ্য হয়। তবে এই প্রফেসর সাহেব না-কি পাকিস্তানে থাকবেন না, দেশ ছেড়ে কোলকাতা চলে যাবেন। কোলকাতা বিশ্ববিদ্যালয়ে তাঁর না-কি চাকরিও হয়েছে। তিনি চেষ্টা করছেন বাড়ি বিক্রির।

এক দুপুরে গেট খোলা পেয়ে হট করে সেই বাড়ির ভেতর ঢুকে পড়লাম। গাছপালার কি শান্ত-শান্ত ভাব। মনে হয় ভুল করে স্বপ্ন দিয়ে তৈরী এক বাড়ির বাগানে ঢুকে পড়েছি। আনন্দে মন ভরে গেল। একা একা অনেকক্ষণ হাঁটলাম। হঠাৎ দেখি কোণার দিকের একটি গাছের নীচে পাটি লেতে একটি মেয়ে উপুড় হয়ে শুয়ে আছে। তার হাতে একটা বই। সে বই পড়ছে না — তাকিয়ে আছে আমার দিকে। আমি আমার জীবনে এত সুন্দর মেয়ে আর দেখিনি। মনে হল তার শরীর শাদা মোমের তৈরী। পিঠ ভর্তি ঘন কালো চুল। ষোল সতেরো বছর বয়স। দৈত্যের হাতে বন্দিনী রাজকন্যারাও এত সুন্দর হয় না। মেয়েটি হাত ইশারায় ডাকল। প্রথমে ডাবলাম দৌড়ে পালিয়ে যাই। পর মুহূর্তেই সেই ডাবনা বেড়ে ফেলে এগিয়ে গেলাম।

কি নাম তোমার খোকা ?

কাজল।

কি সুন্দর নাম ! কাজল। তোমাকে মাখতে হয় চোখে। তাই না ?

কিছু না বুকেই আমি মাথা নাড়লাম।

অনেকক্ষণ ধরে লক্ষ্য করছি তুমি একা একা হাঁটছ। কি ব্যাপার ?

আমি চুপ করে রইলাম।
কি জন্যে এসেছ এ বাড়িতে?
কেডাতে।

ও আচ্ছা বেড়াতে? তুমি তাহলে অতিথি। অতিথি নারায়ণ। তাই না?
আবারও না বুঝে আমি মাথা নাড়লাম। সে বলল, তুমি এখানে চুপচাপ দাঁড়াও।
নড়বে না। আমি আসছি।

মেয়েটি চলে গেল। ভেবে পেলাম না সে অনধিকার প্রবেশের জন্যে শাস্তির
ব্যবস্থা করতে গেল কি না। দাঁড়িয়ে থাকাকাটা কি বুদ্ধিমানের কাজ হচ্ছে? পালিয়ে
যাওয়াই উচিত। অথচ পালাতে পারছি না।

মেয়েটি ফিরে এসে বলল, চোখ বন্ধ করে হত পাত।

আমি তাই করলাম। কি যেন দেয়া হল আমার হাতে। তাকিয়ে দেখি
কদমফুলের মত দেখতে একটা মিষ্টি।

খাও, মিষ্টি খাও। মিষ্টি খেয়ে চলে যাও। আমি এখন পড়াশোনা করছি।
পড়াশোনার সময় কেউ হাঁটাইটি করলে বড় বিরক্তি লাগে। মন বসাতে পারি না।
আমি চলে এলাম এবং দ্বিতীয় দিনে আবার উপস্থিত হলাম।

আবার মেয়েটি মিষ্টি এনে দিল। কোন সৌভাগ্যই একা একা ভোগ করা যায়
না। আমি তৃতীয় দিনে আমার ছোট বোনকে সংগে নিয়ে উপস্থিত। মেয়েটি বিস্মিত
হয়ে বলল, এ কে?

আমি বিনীত ভঙ্গিতে বললাম, এ আমার ছোটবোন। এ-ও মিষ্টি খুব পছন্দ
করে।

মেয়েটির মুখে মৃদু হাসি খেলে গেল। সে হাসতে হাসতে বলল, খুকী তোমার
নাম কি?

আমার বোন উদ্ভিগ্ন চোখে আমার দিকে তাকাল। নাম বলাটা ঠিক হবে কি না সে
বুঝতে পারছে না। আমি ইশারায় তাকে অভয় দিতেই সে বলল, আমার নামক
শেফু।

শেফু? অর্থাৎ শেফালী। কী সুন্দর নাম। তোমরা দু'জন চোখ বন্ধ করে দাঁড়িয়ে
থাক।

আমরা চোখ বন্ধ করে দাঁড়িয়ে আছি। আজ অন্যদিনের চেয়ে বেশী সময়
লাগছে। এক সময় চোখ মেললাম। মেয়েটি সামনে দাঁড়িয়ে আছে। তার মুখ বিষণ্ণ।
সে দুঃখিত গলায় বলল, আজ ঘরে কোন মিষ্টি নেই। তোমাদের জন্যে একটা বই
নিয়ে এসেছি। খুব ভাল বই। বইটা নিয়ে যাও। দাঁড়াও আমার নাম লিখে দেই।

সে মুক্তার মত হরফে লিখল, দু'জন দেবশিশুকে ভালবাসা ও আদরে — শুক্লা
দি।

বই নিয়ে বাসায় ফিরলাম। বইটার নাম 'ক্ষীরের পুতুল'। লেখক অবনীন্দ্রনাথ
ঠাকুর। পাতায় পাতায় ছবি।

'ক্ষীরের পুতুল' হচ্ছে আমার প্রথম পড়া — 'সাহিত্য'। সাহিত্যের প্রথম পাঠ
আমি আমার বাবা-মা'র কাছ থেকে পাইনি। বাবার বিশাল লাইব্রেরী ছিল। সেই
লাইব্রেরীর পুস্তক-সংখ্যা মাথা ঘুরিয়ে দেবার মত। সমস্ত বই তিনি তালাবদ্ধ করে
রাখতেন। বাবার লাইব্রেরীর বই আমাদের অর্থাৎ বাচ্চাদের নাগালের বাইরে ছিল।
বাবা হয়ত ভেবেছিলেন, এইসব বই পড়ার সময় এখনো হয়নি।

শুক্লাদি তা ভাবেননি। তিনি অসাধারণ একটি বই একটি বাচ্চা-ছেলের হাতে
ধরিয়ে দিয়ে তার স্বপ্নজগতের দরজা খুলে দিলেন। স্বপ্নজগতের দরজা সবাই খুলতে
পারে না। দরজা খুলতে সোনার চাবি দরকার। ঈশুর যার-তার হাতে সেই চাবি দেন
না। সে চাবি থাকে অল্পকিছু মানুষের কাছে। শুক্লাদি সেই অল্পকিছু মানুষদের
একজন।

শুক্লাদির সংগে আমার ঐ বই পাওয়ার পর আর দেখা হয়নি। তিনি কোলকাতার
বেথুন কলেজে পড়াশোনা করতেন। ছুটি শেষ হবার পর কোলকাতা চলে গেলেন।
তার কিছুদিন পর প্রফেসর সাহেব বাড়ি বিক্রি করে ইণ্ডিয়া চলে গেলেন। যিনি বাড়ি
কিনলেন তিনি প্রথমেই গাছগুলি সব কাটিয়ে ফেললেন। বাড়িটিকে ঘিরে যে স্বপ্ন ছিল
সেই স্বপ্ন ভেঙে গুড়িয়ে দিলেন।

কত না নিব্বুম দুপুরে এই শীতল বাড়ির গেটের কাছে আমি দাঁড়িয়ে দাঁড়িয়ে
কাটিয়েছি। গভীর দুঃখে আমার চোখ ভেঙ্গে জল এসেছে।

বাসায় এসেই বসেছি ক্ষীরের পুতুল নিয়ে। এই বই নিয়ে বসলেই ভেঙ্গে যাওয়া
স্বপ্ন ফিরে আসত। মুহূর্তে চলে যেতাম অন্য কোন পৃথিবীতে। কি অদ্ভুত পৃথিবীই না
ছিল সেটি।

শুক্লাদির দেয়া ক্ষীরের পুতুল বইটি উনিশ শো একাত্তর পর্যন্ত আমার সংগে
ছিল। একাত্তরে অনেক প্রিয় জিনিসের সংগে বইটিও হারিয়েছি। কিন্তু সত্যি কি
হারিয়েছি? হৃদয়ের নরম ঘরে যাদের স্থান দেয়া হয় তারা কি কখনো হারায়? কখনো
হারায় না। শুক্লাদির কথা যখনই মনে হয় তখনই বলতে ইচ্ছা করে 'জনম জনম তব
তরে কাঁদিব।'

'ক্ষীরের পুতুল' বইটি আমার জীবনব্যাপী অনেকখানি পাল্টে দিল। এখন আর
দুপুরে ঘুরতে ভাল লাগে না। শুধু গল্পের বই পড়তে ইচ্ছে করে। কুয়োতলার
লাগোয়া একটা ঘর, দুপুরের দিকে একেবারে নিরিবিবি হয়ে যায়। দরজা বন্ধ করে
জানালায় হেলান দিয়ে গল্পের বই নিয়ে বসি। জানালার ওপাশে কাঁঠাল গাছের

গুচ্ছ। সেই কাঁঠাল গাছে ক্রান্ত ভঙ্গিতে কাক ডাকে। এ ছাড়া চারদিকে কোন শব্দ নেই। অদ্ভুত নৈশশব্দের জগৎ। এটা যেন চেনা-জানা পৃথিবী নয়, অন্য কোন ভুবন।

বই-এ পাতার পর পাতা অতি দ্রুত উল্টে যাচ্ছি। এই সব বই বাবার আলমীরা থেকে চুরি করা। মা জেগে উঠার আগে রেখে দিতে হবে। ধরা পড়লে সমূহ বিপদের সম্ভাবনা। একদিন ধরা পড়লাম। বাবার হাতেই ধরা পড়লাম। তিনি বিস্মিত হয়ে বললেন, কী বই পড়ছিস? দেখি দেখি বইটা।

তিনি বই হাতে নিয়ে গভীর হয়ে গেলেন। বইয়ের নাম — “প্রেমের গল্প”। তিনি ধমকমে গলায় বললেন, পড়েছিস এই বই?

আমি ক্ষীণ স্বরে বললাম, হঁ।

বুঝেছিস কিছু?

হঁ।

কী বুঝেছিস?

কী বুঝেছি ব্যাখ্যা করতে পারলাম না। বাবা বই নিয়ে আলমীরায় তালাবদ্ধ করে রাখলেন। আমি ভয়ে অস্থির। নিশ্চয়ই গুরুতর কোন শাস্তির ব্যবস্থা হবে। সম্ভাব্যেলা তিনি বললেন, কাপড় পরে আমার সঙ্গে চল।

আমি কোন কথা না বলে কাপড় পরলাম। কি হচ্ছে বুঝতে পারছি না। তিনি রিকশা করে, আমাকে নিয়ে গেলেন কেন্দ্রীয় মুসলিম সাহিত্য সংসদে। বইএর এক বিশাল সংগ্রহ। যে-দিকে চোখ যায় শুধু বই, বই আর বই। আমাকে লাইব্রেরীর মেশ্বার করে দিলেন। শান্ত গলায় বললেন, এখানে অনেক ছোটদের বই আছে, আগে এইগুলি পড়ে শেষ কর। তারপর বড়দের বই পড়বি।

প্রথমদিনের দু’টি বই নিজে পছন্দ করে দিলেন। দু’টি বইয়ের একটির নাম মনে আছে — টম কাকার কুটির। কী অপূর্ব বই। এই বইটি পড়বার আনন্দময় স্মৃতি এখনো চোখে ভাসে। বুম বুম করে বৃষ্টি পড়ছে। সিলেটের বৃষ্টি — ঢালাও বর্ষণ। আমি কাঁথা মুড়ি দিয়ে বই নিয়ে বসেছি। টম কাকার গল্প পড়তে পড়তে চোখে নেমেছে অশ্রুর বন্যা। সমস্ত হৃদয় জুড়ে এক ধরনের শূন্যতা অনুভব করছি। হঠাৎ করে মহৎ সাহিত্যকর্মের মুখোমুখি হলে যা হয় তাই হচ্ছে — প্রবল আবেগে চেতনা আলোড়িত হচ্ছে।

আমার বই পড়ার অভ্যাস মা খুব সহজভাবে গ্রহণ করতে পারলেন না। প্রায়ই বিরক্ত হয়ে বলেন, এই ছেলে দিনরাত আউট বই পড়ে। যখন সবাই খেলাধুলা করছে সে অন্ধকারে বই নিয়ে বসেছে। চোখ নষ্ট হবে তো।

চোখ আমার সতি সতি খারাপ হল। যদিও তা বুঝতে পারলাম না। বাইরের পৃথিবী আবছা দেখি। আমার ধারণা অন্য সবাইও তাই দেখে। ক্লাস ফাইভে উঠে প্রথম চশমা নেই। চোখের ডাক্তার আমার চোখ পরীক্ষা করে আঁকে উঠে বলেন,

এই ছেলে তো আন্ধের কাছাকাছি। এতদিন সে চালিয়েছে কি ভাবে? প্রথম চশমা পরে আমিও হতভম্ব হয়ে ভাবি — চারদিকের জগৎ এত স্পষ্ট। কী আশ্চর্য। দুরের জিনিসও তাহলে দেখা যায়?

আগের কথায় ফিরে আসি।

কেন্দ্রীয় মুসলিম সাহিত্য সংসদের সদস্য হওয়ায় সবচেয়ে কষ্টে পড়ল আমার ছোট দুই ভাই-বোন, শেফু এবং ইকবাল। মীরবাজার থেকে একা এতদূর হেঁটে যেতে ভাল লাগে না। আমি এদের সঙ্গে নিয়ে যাই। পথ আর ফুরাতে চায় না। পথে দু’তিন জায়াগায় ক্রান্ত হয়ে বিশ্রাম করতে বসি। আমার সব ক্রান্তি সব কষ্ট দূর হয়ে যায় যখন দুটি বই হাতে পাই। আনন্দে বলমূল করতে থাকি। শেফু এবং ইকবাল আমার এই আনন্দে অংশ গ্রহণ করতে পারে না। শুধু মাত্র আমাকে সঙ্গ দেবার জন্যে তাদের দিনের পর দিন কষ্ট করতে হয়।

আমাকে রোজ দু’টি করে বই দিতে গিয়ে একদিন লাইব্রেরীয়ানের ঐর্ষ্যেরও বাঁধ ভেঙে গেল। তিনি বিরক্ত গলায় বললেন, এখন থেকে একটি করে বই নেবে। দুটো না। আর এইসব আজ-বাজে গল্পের বই পড়ে কোন লাভ নেই। এখন থেকে পড়বে জ্ঞানের কথা, জ্ঞান-বিজ্ঞান, ইতিহাস, ভূগোল এইসব শিখতে হবে। নাও আজকে এই বইটা নিয়ে যাও।

আমি খুব মন খারাপ করে বইটা হাতে নিলাম। বইয়ের নাম ‘জানবার কথা’। বাসায় এনে দু’তিন পাতা পড়লাম। এতটুকুও আকর্ষণ করল না। পরদিন ফেরত দিতে গেছি। লাইব্রেরীয়ান ভ্রলোক বললেন, পড়েছ?

আমি বললাম, হঁ।

তিনি হাত থেকে বই নিয়ে কয়েকটা পাতা উল্টে বললেন, আচ্ছা বল, গ্লোসিয়ার কি?

আমি বলতে পারলাম না। তিনি দাঁত-মুখ বিচিয়ে বললেন, বাঁদর ছেলে — যাও, এই বই ভাল মত পড়ে তারপর আস।

কেন্দ্রীয় মুসলিম সাহিত্য সংসদে আমি আর কখনো যাইনি। ‘জানবার কথা’ বইটিও ফেরত দেয়া হয়নি। বাসায় ফিরে ‘জানবার কথা’ কুটি কুটি করলাম, কিছুক্ষণ কাদলাম। আমি প্রচণ্ড অভিমানী হয়ে জন্মেছি। অভিমান নামক ব্যাপারটি কম নিয়ে জন্মানো ভাল। এই জিনিসটি আমাদের বড়ই কষ্ট দেয়।

বই পড়ার আগ্রহে সাময়িক ভাটা দেখা দিল। আগের জগতে ফিরে গেলাম — ঘুরে বেড়ানো। ইতিমধ্যে চুরি-বিদ্যা খানিকটা রপ্ত হয়েছে। লক্ষ্য করেছি মা ভাঙতি পয়সা রাখেন তোষকের নীচে। সিকি, আধুলি, আনি-দুআনি — ঠিক কত আছে, সেই হিসেব তাঁর নেই। ভাঙতি পয়সার মধ্যে সবচেয়ে ছোট হচ্ছে — সিকি। একবার

একটা সিকি সরিয়ে সমস্ত দিন আভংকে নীল হয়ে রইলাম। সারাক্ষণ মনে হল এই বোধ হয় মা বলবেন, সিকি কে নিয়েছে? মা তেমন কিছু করলেন না। পরদিন সেই সিকি নিয়ে এবং সঙ্গে ছোট বোনকে নিয়ে চায়ের স্টলে চা খেতে গেলাম। আমার একমাত্র উদ্দেশ্য হচ্ছে বড়রা যেমন চায়ের দোকানে চা খায়, আমরাও তেমনি খাব। দোকানদার নিশ্চয়ই দুই ক্ষুদ্রে কাস্টমার পেয়ে বিস্মিত হয়েছিল। সে ফত্ন করে আমাদের দুজনকে গ্লাসে করে দু'কাপ চা দিল। একটা পরোটা ছিড়ে দু'ভাগ করে দু'জনের হাতে দিল এবং কোন পয়সা রাখল না। হাতের সিকি হাতেই রয়ে গেল। অতঃপর দুজনে একটা রিকশায় উঠে পড়লাম। কোন গন্তব্য নেই — ফতদূর রিকশা যায়। তখন রিকশা ভাড়া ছিল বাঁধা। শহরের এক মাথা থেকে আরেক মাথা যাওয়া যেত এক সিকিতে। রিকশাওয়ালা আমাদের জল্পারপাড়ের কাছে নামিয়ে দিল। সেখান থেকে মহানন্দে হেঁটে বাসায় ফিরলাম। মনে হলো চুরিবিদ্যা খুব খারাপ কিছু নয়।

মার তোষকের নীচ থেকে প্রায়ই পয়সা উধাও হতে লাগল। একদিন কাজের ছেলে রফিক পয়সা চুরির জন্যে প্রচণ্ড বকা খেল। তোষকের নীচে পয়সা রাখাও বন্ধ হয়ে গেল। বড় কষ্টে পড়লাম। এখন একমাত্র ভরসা দেশের বাড়ি থেকে বেড়াতে আসা মেহমানরা।

আমাদের বাসায় মেহমান লেগেই থাকত। দাদার বাড়ির দিকের মেহমান, মার বাড়ির দিকের মেহমান। কেউ আসত শহর দেখতে, কেউ শাহজালাল সাহেবের মাজার দেখতে, কেউ বা চিকিৎসা করতে। মেহমানরা দয়া পরবশ হয়ে এক আনা বা দু'পয়সা বাড়িয়ে দিতেন — পৃথিবীটাকে বড়ই সুন্দর মনে হত। ছুটে যেতাম দোকানে। কত অপূর্ব সব খাবার — হজমি। দু'পয়সায় অনেকখানি পাওয়া যেত, টক টক বাঁঝালো স্বাদ। খানিকটা মুখে দিলেই জীব কালো কুচকুচে হয়ে যেত। এক আনায় পাওয়া যেত দুগোল্লা সরষের তেল মাখানো বিচি ছাড়ানো তেঁতুল। বাদাম ভাজা আছে, বুট ভাজা আছে। মদু মিয়ার দোকানে পাওয়া যেত দুখ চকলেট। এক আনায় চারটা তবে আমার জন্যে একটা ফাউ। পাঁচটা।

মিষ্টি পানের একটা দোকান ছিল, তার সামনে খানিকক্ষণ দাঁড়িয়ে থাকলেই দোকানী ছোট একটা পান বানিয়ে আমার হাতে দিয়ে বলত, ভাগ। কী সুখানু ছিল সেই মিষ্টি পান।

গভীর আগ্রহে অপেক্ষা করতাম দেশের বাড়ির মেহমানদের জন্যে। মেহমান আসা মানেই আনন্দ। শহর দেখানোর জন্যে আমি চমৎকার গাইড। একদিন না একদিন তাঁরা রঙমহল সিনেমা হলে ছবি দেখতে যাবেন। আমাকে সঙ্গে নিতেই হবে। আমাকে নেয়ার ব্যাপারে তাঁরা তেমন আপত্তিও করবেন না। কারণ আমার জন্যে আলাদা করে টিকিট করতে হবে না। আমি ছবি দেখবো কোলে বসে। কিংবা

দাঁড়িয়ে। বাড়িতে মেহমান থাকার আরেকটি বড় সুবিধা হচ্ছে সেই সময় মার শাসনব্যবস্থা দুর্বল হয়ে যেত। বড় ধরনের অপরাধেও মা কঠিন চোখে কিছুক্ষণ তাকিয়ে থাকার শাস্তি ছাড়া অন্য শাস্তি দিতেন না।

মেহমানদের মধ্যে একজনের কথা আমার স্মৃতিতে উজ্জ্বল হয়ে আছে। তিনি মায়ের দিকের দূর সম্পর্কের আত্মীয়। তাঁটি অঞ্চলের মানুষ। খুনের দায়ে হাজতে আছেন। জামিনে ছাড়া পেয়ে কয়েকদিন থাকতে এলেন আমাদের এখানে। অসম্ভব রকমের রুগ্ন একজন মানুষ। যক্ষা নামের কাল ব্যাধিতে ধরেছে। সারাক্ষণ কাশছেন। কাশির সঙ্গে টাটকা রক্ত পড়ছে।

তিনি বাসায় এসেই মাকে ডেকে বললেন, রাজরোগে ধরেছে গো মা। এই ব্যাধি ছোঁয়াছে। তোমার ছেলে-পুলের সংসার। ভেবে চিন্তে বল, আমাকে রাখবে? তিন চার দিন থাকতে হবে। হোটলে থাকতে পারি কিন্তু হোটলে থাকতে ইচ্ছা করছে না। তুমি ভেবে চিন্তে বল।

মা বললেন, আপনি অবশ্যই আমার এখানে থাকবেন।

খুব ভাল কথা। তাই থাকব। বেশীদিন বাঁচব না। যে কয়টা দিন আছি পরিচিত মানুষদের মধ্যে থাকতে চাই। তবে মা, আমি যে থাকব আমার কিছু শর্ত আছে।

কী শর্ত?

নিজের মত বাজার-সদাই করব। এর জন্যে মনে কষ্ট নিও না। আমার অনেক জিনিসের অভাব আছে, টাকা পয়সার অভাব নাই। কি মা রাজি?

মাকে রাজি হতে হল। আমরা পরম বিশ্বাসে দেখলাম — মাত্র চারদিন যে লোকটি থাকবে তার জন্যে বস্তা ভর্তি পোলায়ের চাল আসছে, টিন ভর্তি ধি, চিনি। দুপুরে প্রকাণ্ড একটা চিতল মাছ চলে এল, ঝাঁকা ভর্তি মুরগী।

তিনি নিজে এতসব খাবার-দাবারের কিছুই খেলেন না। মাকে বললেন, আমাকে তিন চামুচ আলো চালের ভাত এর এক চামুচ ধি দিও। এর বেশী আমি কিছু খেতে পারি না। আল্লাহ আমার রিজিক তুলে নিয়েছেন।

শৈশবে যে অল্প কিছু মানুষ আমাকে প্রবল ভাবে আকর্ষণ করেছিল উনি ছিলেন তাঁর একজন। তাঁটি অঞ্চলের জমিদার বংশের মানুষ। এঁদের অত্যাচারে অতিষ্ঠ হয়ে স্থানীয় মানুষ একযোগে এঁদের বসতবাড়ী আক্রমণ করে। এঁরা তখন আত্মরক্ষার জন্যে কিংবা প্রতিহিংসা চরিতার্থ করার জন্যে বন্দুক নিয়ে দোতলা থেকে এলোপাখারি গুলি করতে থাকে। পক্ষাশের মত মানুষ আহত হয়, মারা যায় হ'জন। জমিদার বাড়ির সকল পুরুষদের বিরুদ্ধেই মামলা দায়ের করা হয়। পুলিশ আসামী হিসেবে সবাইকেই বেঁধে নিয়ে আসে। যক্ষা রোগে আক্রান্ত যে মানুষটির কথা বলছি তিনিও আসামীদেরই একজন। পুলিশ এবং ম্যাজিস্ট্রেটের কাছে স্বীকারোক্তিতে বলেছেন — বাড়ি যখন আক্রান্ত হয় তখন আমিই বন্দুক নিয়ে বের হই। আমি একাই

গুলি করি — হত্যাকাণ্ডের সমস্ত দায়-দায়িত্ব আমার। শান্তি হলে আমার শান্তি হবে। অন্য কারোর নয়।

মজার ব্যাপার হল হত্যাকাণ্ডের সঙ্গে তাঁর কোনই যোগ ছিল না। এই ধরনের স্বীকারোক্তি তিনি করেছেন অন্যদের বাঁচাবার জন্যে। তাঁর যুক্তি হল — আমার যক্ষা হয়েছে, আমি তো দুদিন পর এম্মিতেই মারা যাচ্ছি। ফাঁসিতেই না হয় মরলাম। অন্যরা রক্ষা পাক। তাছাড়া বাকি সবারই বৌ-ছেলেমেয়ে আছে। আমি চিরকুমার মানুষ, আমি বেঁচে থাকলেই কি মরলেই কি?

যক্ষা রুগীর চোখ এম্মিতেই উজ্জ্বল হয়। উনার চোখ আমার কাছে মনে হল বিকমিক করে জ্বলে। সারাক্ষণ ধবধবে সাধা বিছানায়, সাদা চাদর গায়ে জড়িয়ে মূর্তির মত বসে থাকেন। আমি কড়ই বিস্ময় অনুভব করি। একদিন হাত ইশারা করে আমাকে ডাকলেন, আমি এগিয়ে যেতেই তীব্র গলায় বললেন, তুই সব সময় আমার আশে পাশে ঘুর ঘুর করিস কেন? খবরদার। আর আসবি না। ছোট পূলাপান আমি পছন্দ করি না।

আহত ও অপমানিত হয়ে তাঁর ঘর থেকে আমি বের হয়ে আসি, কিন্তু তাঁর প্রতি যে গভীর ভালবাসা আমি লাভ করি তাঁর হেরফের হয়নি। মামলা চলাকালীন সময়ে জেল-হাজতে তাঁর মৃত্যু হয়। আমার মনে আছে, তাঁর মৃত্যু-সংবাদ পেয়ে আমি বালিশে মুখ গুজে দীর্ঘ সময় কাঁদি।

সাহিত্য বাসর

বাবার অসংখ্য বাতিকের একটি হল — সাহিত্য-বাতিক। মাসে অন্তত দু'বার বাসায় 'সাহিত্য বাসর' নামে কি যেন হত। কি যেন হত বলছি এই কারণে যে আমরা ছোটরা জানতাম না কি হত। আমাদের প্রবেশ নিষিদ্ধ ছিল। সাহিত্য চলাকালীন সময়ে আমরা হেঁচ-চৈ করতে পারতাম না, উঁচু গলায় কথা বলতে পারতাম না, শব্দ করে হাসতেও পারতাম না। এর থেকে ধারণা হত বাসর ঘরে তাঁরা যা করছেন তা খুবই গুরুত্বপূর্ণ।

পর্দার আড়ালে দাঁড়িয়ে একদিন খানিকটা শুনলাম। আমার কাছে পুরো ব্যাপারটা হাস্যকর মনে হল। একজন খুব গভীর মুখে একটা কবিতা পড়ল। অন্যরা তার চেয়েও গভীর মুখে শুনল, তারপর কেউ বলল, ভাল হয়েছে, কেউ বলল মন্দ, এই নিয় তর্ক বেঁধে গেল। নিতান্তই ছেলেমানুষী ব্যাপার। একদিন একজনকে দেখলাম রাগ করে তাঁর লেখা কুচি কুচি করে ছিড়ে ফেলে দ্রুত ঘর থেকে বের হয়ে গেল। অম্মি দু'জন ছুটে গেল তাকে ধরে আনতে। ধরে আনা হল। ব্যঙ্গ একজন

মানুষ অথচ হাউ মাউ করে কাঁদছে। কী অদ্ভুত কাণ্ড। কাণ্ড এখানে শেষ না। ছিড়ে কুচি কুচি করা কাগজ এরপর আঁঠা দিয়ে জোড়া লাগানো হতে লাগল। সেই লেখা পড়া হলো, সবাই বলল, অসাধারণ। এই হচ্ছে বাবার প্রাণপ্রিয় সাহিত্য বাসর।

সারাটা জীবন তিনি সাহিত্য সাহিত্য করে গেলেন। কতবার যে তিনি ঘোষণা করেছেন এবার চাকরি ছেড়ে দিয়ে পুরোপুরি সাহিত্যে মনোনিবেশ করবেন। চাকরি এবং সাহিত্য দুটো একসঙ্গে হয় না।

ট্রাঙ্ক বোঝাই ছিল তার অসমাপ্ত পাণ্ডুলিপি। গল্প, কবিতা, নাটক, প্রবন্ধ। ধরে ধরে সাজানো। বাবার সাহিত্য-প্রেমের স্বীকৃতি হিসেবে আমাদের বসার ঘরে বড় একটা বাঁধানো সার্টিফিকেট ঝুলানো, যাতে লেখা — ফয়জুর রহমান আহমেদকে সাহিত্য সুধাকর উপাধিতে ভূষিত করা হয়েছে।

এই উপাধি তাঁকে কারা দিয়েছে, কেন দিয়েছে কিছুই এখন মনে করতে পারছি না। শুধু মনে আছে বাঁধানো সার্টিফিকেটটির প্রতি বাবার মমতায় অস্ত ছিল না। বাবার মৃত্যুর পর তাঁর সমাধি ফলকে আমি এই উপাধি এবং শোকগাথা রবীন্দ্রনাথের দু'লাইন কবিতা ব্যবহার করি।

দূর দূরান্ত থেকে কবি সাহিত্যিকদের হঠাৎ আমাদের বাসায় উপস্থিত হওয়া ছিল আরেক ধরনের ঘটনা। বাবা এদের কাউকে নিমন্ত্রণ করে আনাতেন না। তাঁর সামর্থ ছিল না, তিনি যা করতেন তা হচ্ছে মনিঅর্ডার করে তাঁদের নামে পাঁচ টাকা বা দশ টাকা পাঠিয়ে কুপনে লিখতেন —

জ্ঞানাব,

আপনার কবিতাটি পত্রিকার সংখ্যায় পড়িয়া মনে বড় ভূষ্টি পাইয়াছি। উপহার হিসেবে আপনাকে সামান্য কিছু অর্থ পাঠাইলাম। উক্ত অর্থ গ্রহণ করিলে চিরকৃতজ্ঞতাপাশে আবদ্ধ থাকিব।

ইতি প্রতিভামুগ্ধ —

ফয়জুর রহমান আহমেদ

(সাহিত্য সুধাকর)

ঐ কবি নিশ্চয়ই তাঁর কাব্যের জন্যে নানান প্রশংসাবাক্য শুনেছেন, কিন্তু মনিঅর্ডারে টাকা পাওয়ার ব্যাপারটা না ঘটাই কথা। প্রায় সময়ই দেখা যেত আবেগে অভিভূত হয়ে যশোহর বা ফরিদপুরের কোন কবি বাসায় উপস্থিত হয়েছেন।

এম্মিভাবে উপস্থিত হলেন কবি রওশন ইজদানী। পরবর্তীকালে তিনি ঋতেমুন নবীউন গ্রন্থ লিখে আদমজী পুরস্কার পান। তবে যখনকার কথা বলছি তখন তাঁর কবিস্বাতি তেমন ছিল না।

আমার পরিষ্কার মনে আছে লুঙ্গী পরা ছাতা হাতে এক লোক রিকশা থেকে নেমে ভাড়া নিয়ে রিকশাওয়ালার সঙ্গে তুমুল তর্ক জুড়ে দিয়েছেন। জানলাম ইনি বিখ্যাত কবি রওশন ইজদানী। আমাদের বলে দেয়া হল যেন হৈ-ঠে না করি, চিৎকার না করি। ঘরে একজন কবি বাস করছেন। কবিতা লেখার মুডে থাকলে সেই মুডের ক্ষতি হবে।

দেখা গেল কবি সারা গায়ে সরিষার তেল মেখে রোদে গা মেলে পড়ে রইলেন। আমাকে ডেকে বললেন — এই, মাথা থেকে পাকা চুল তুলে দে।

কবি-সাহিত্যিকরা আলাদা জগতে বাস করেন, মানুষ হিসেবে তাঁরা অন্যরকম বলে যে প্রচলিত ধারণা আছে কবি রওশন ইজদানীকে দেখে আমার মনে হল ঐ ধারণা ঠিক না। তাঁরা আর দশটা মানুষের মতই, আলাদা কিছু না।

আমার আদর-যত্নে, খুব সম্ভব পাকা চুল তোলার দক্ষতায় সজ্জষ্ট হয়ে তিনি আমাকে একদিন ডেকে বললেন, খাতা-কলম নিয়ে আয়, তোকে কবিতা লেখা শিখিয়ে দেই।

আমি কঠিন গলায় বললাম, আমি কবিতা লেখা শিখতে চাই না।

তিনি বিস্মিত হয়ে বললেন, তাহলে কি শিখতে চাস?

কিছুই শিখতে চাই না।

আসলেই তাই। শৈশবে কারোর কাছ থেকে আমি কিছুই শিখতে চাইনি। এখনো চাই না। অখচ আশ্চর্য, আমার চারপাশে যঁরা আছেন তাঁরা ক্রমাগত আমাকে শেখাতে চান। অর্থনীতি, সমাজনীতি, দর্শন, ভাষা এবং বাংলা বানানের শিক্ষকরা আমার চারপাশে আছেন। পণ্ডিত ব্যক্তি থেকে শুরু করে আঠারো উনিশ বছরের তরুণী সবাই আমার শিক্ষক। সবাই আমাকে শেখাতে চান। হয়ত ভালবাসা থেকেই চান, কিন্তু আমার কিছুই শিখতে ইচ্ছা করে না। জানতে ইচ্ছে করে না। ‘জানবার কথা’ নামের একটি বই শৈশবেই ছিড়ে কুচি কুচি করে ফেলেছিলাম এই কারণেই।

পদ্ম পাতায় জল

আমাদের পাশের বাসায় থাকত নাদু দিলুরা।

তারারও আমাদেরই মতই অল্প আয়ের বাবা-মা’র পুত্র কন্যা। সবাই এক সঙ্গে ধুলোমাটিতে গড়াগড়ি করে বড় হচ্ছি। ওমা একদিন শুনি ওরা বড়লোক হয়ে গেছে। দেখতে দেখতে ওদের কাপড়-চোপড় পাল্টে গেল। কথা-বার্তার ধরন-ধারণও বদলে গেল। এখন আর ওরা দাঁড়িয়বান্দা কিংবা চি বুড়ি খেলার জন্যে আমাদের কাছে আসে না।

ঈদ উপলক্ষে ওরা নতুন কাপড় তো পেলই, সেই সঙ্গে পেল ট্রাই সাইকেল। ট্রাই সাইকেলটি শিশুমহলে বিস্ময়ের সৃষ্টি করল। আমিও এর আগে এই জিনিস দেখিনি। কী চমৎকার ছোট্ট একটা রিক্সা। এর মধ্যে আবার বেলও আছে। টুংটুং করে বাজে। এই বিস্ময়কর বাহনটিতে একবার শুধু চড়তে পারার দুর্লভ সৌভাগ্যের জন্যে আমি তখন আমার সমস্ত পৃথিবী দিয়ে দিতে পারি। চেষ্টা করে বিফল হলাম। সবসময় নাদু দিলুর সঙ্গে একজন কাজের মেয়ে থাকে। আমি কাছে গেলেই সে স্ব্যাক করে ওঠে। হাত দিয়ে একটু দেখার অনুমতি চাইলাম, সেই অনুমতিও পাওয়া গেল না। আমরা শিশুরা সমস্ত কাজ-কর্ম ভুলে ট্রাই সাইকেল ঘিরে গোল হয়ে বসে রইলাম। অনেক চিন্তা করে দেখলাম ট্রাই সাইকেল কিনার কথা বাবাকে কি বলা যায়? মনে হল সেটা ঠিক হবে না। বাবার তখন চরম আর্থিক সমস্যা যাচ্ছে। তাঁর সবচেয়ে আদরের ছোট্টবান অসুস্থ। সেই বোনের চিকিৎসার যাবতীয় ব্যয়ভার তাঁর বহন করতে হচ্ছে। ঈদে আমরা ভাই-বোনরা কোন কাপড়-চোপড় পাইনি। শেষ মুহূর্তে বাবা আমাদের তিন ভাই বোনকে তিনটা প্লাস্টিকের চশমা কিনে দিলেন। যা চোখে দিলে আশেপাশের জগৎ নীল বর্ণ ধারণ করে। কাপড় না পাওয়ার দুঃখ রঙ্গিন চশমায় ডুললাম। তারচেও বড় কথা দিলু এই চশমার বিনিময়ে আমাকে তার ট্রাই সাইকেল খানিকটা স্পর্শ করার দুর্লভ সুযোগ দিল। সে বড়ই আনন্দময় অভিজ্ঞতা।

যতই দিন যেতে লাগল এদের রমরমা সমসমা বাড়তেই লাগল। শুনলাম তাদের জন্যে বিশাল দুতলা বাড়ি তৈরী হচ্ছে। বাড়ি তৈরী না হওয়া পর্যন্ত কোন রকম কস্টে-সুটে এখানেই থাকবে। এর মধ্যে এই দুই ভাই-বোনের জন্মদিন হল। জন্মদিন বলে যে একটা ব্যাপার আছে আমার জানা ছিল না। এই দিনে উৎসব হয়। খানাদানা হয়। উপহার নিয়ে লোকজন আসে কে জানত। আমরা অভিভূত।

শেফু একদিন বাবাকে গিয়ে বলল, আমার জন্মদিন করতে হবে।

বাবা খানিকক্ষণ তার দিকে তাকিয়ে থেকে বললেন, ঠিক আছে মা, করা হবে। কিন্তু শুধুই একবার। এই উৎসব আমি দ্বিতীয়বার করবো না। তোমরা বড় হবার চেষ্টা কর। অনেক বড় যাতে সারা দেশের মানুষ তোমাদের জন্মদিনের উৎসব করে। বাবা-মা’র করতে না হয়।

শেফু বলল, সে প্রাণপণ চেষ্টা করবে বড় হবার।

আমি দেখলাম সুযোগ ফসকে যাচ্ছে। শুধু শেফুর জন্মদিন হবে আমার হবে না, এ কেমন কথা। আমি গভীর গলায় বললাম, বাবা আমিও খুব বড় হবার চেষ্টা করব। আমারো জন্মদিন করতে হবে। বাবা বললেন, আচ্ছা তোমারও হবে।

শুধু ইকবাল ঘোষণা করল সে বড় হতে চায় না। ছোট্টই থাকতে চায়। তার জন্মদিন লাগবে না।

আমরা গভীর আগ্রহে অপেক্ষা করছি। নভেম্বরের ৯ তারিখ শেফুর জন্মদিন। দেখতে দেখতে ৯ তারিখ এসে পড়ল। আমরা খুব উদ্দিগ্ন হয়ে লক্ষ্য করলাম এই উপলক্ষে কাউকে বলা হল না। বাবা বললেন, আমরা নিজেরা নিজেরা উৎসব করব। কাউকে বলব না।

পায়েস ছাড়া অন্য কোন খাদ্যদ্রব্য তৈরী হল না। আমাদের মন ভেঙ্গে গেল। সন্ধ্যার পর জন্মদিনের উৎসব শুরু হল। বাবা 'বীর পুরুষ' কবিতা আবৃত্তি করলেন। প্রাণেশ কাকু তিনটা গান গাইলেন। পায়েস ঝাওয়া হল। তারপর বাবা ছোট্ট একটা বক্তৃতা দিয়ে শেফুর হাতে একটা উপহারের প্যাকেট তুলে দিলেন। সেই উপহার দেখে আমাদের সবার বিস্ময়ে বাকরোধ হয়ে গেল। আমার দরিদ্র বাবা খুবই দামী উপহার কিনেছেন। চীনেমাটির চমৎকার খেলনা 'টি সেট'। যা দেখলে একালের শিশুদেরও চোখ কপালে উঠে যাবার কথা।

বাবা বললেন, পছন্দ হয়েছে মা?

শেফু কাদতে কাদতে বলল, এত সুন্দর জিনিস সে তার জীবনে দেখিনি। আনন্দে সারারাত সে ঘুমাতে পারল না। বার বার বিছানা থেকে উঠে গিয়ে দেখে আসে টি সেট ঠিক-ঠাক আছে কি না। সেই রাতে আমি নিজেও উদ্বেগে ঘুমুতে পারলাম না। আর মাত্র তিন দিন পর আমার জন্মদিন। না জানি কি অপেক্ষা করছে আমার জন্যে। গোপন সূত্রে খবর পেলাম আমার জন্যে দশগুন ভাল উপহার অপেক্ষা করছে। খবর দিলেন মা। মা'র খবর খুবই নির্ভরযোগ্য।

জন্মদিন এসে গেল। গান, কবিতা আবৃত্তির পালা শেষ হবার পর আমার হাতে উপহারের প্যাকেট তুলে দেয়া হল। প্যাকেট খুলে দেখি একটা বাধানো ফ্রেমে দীর্ঘ একটি কবিতা। বাবা ছেলের জন্মদিন উপলক্ষে একটি কবিতা লিখে ফ্রেমে বাধিয়ে নিয়ে এসেছেন। কবিতার প্রথম দুটি চরণ —

সাতটি বছর গেল পরপর আজিকে পরেছে আটে

তব জন্মদিন নয়ত মলিন ভয়াল বিশু হাটে....

বাবা খুবই আগ্রহ নিয়ে জিজ্ঞেস করলেন, কিরে উপহার পছন্দ হয়েছে? অনেক কষ্টে কান্না চাপা দিয়ে বললাম — হ্যাঁ।

তোর মুখ দেখে মনে হচ্ছে পছন্দ হয় নাই।

আমি চুপ করে রইলাম।

বাবা খানিকক্ষণ শান্ত চোখে আমার দিকে তাকিয়ে থেকে বললেন, এই উপহার এখন তোর কাছে সামান্য মনে হচ্ছে। এমন একদিন আসবে যখন আর সামান্য মনে হবে না।

বাবা কবি ছিলেন না। হৃদয়ের তীব্র আবেগ প্রকাশের মাধ্যম হিসেবে তিনি কবিতার আশ্রয় নিয়েছেন। তাঁর অতি আদরের ছোটবোনের মৃত্যুর খবর পাবার পর

তিনি কাদতে কাদতে কবিতা লিখতে বসেছেন। চোখের জলে লেখা সেই দীর্ঘ কবিতা হয়ত শুদ্ধতম কবিতা হয়নি। কিন্তু যে আবেগের তাড়নায় কলম হাতে নিয়েছিলেন সেই আবেগে কোন খাদ ছিল না। বাবার কাছ থেকে প্রথম শিখলাম মনে তীব্র ব্যথা কমানোর একটি উপায় হচ্ছে কিছু লেখা। যে লেখা ব্যক্তিগত দুঃখকে ছড়িয়ে দেয় চারদিকে।

বাবা হচ্ছেন আমার দেখা প্রথম কবি।

আমার দেখা দ্বিতীয় কবি হচ্ছেন আমাদের বড় মামা ফজলুল করিম। তিনিও আমাদের বাসায় থাকতেন এবং এম. সি কলেজে আই এ পড়তেন। আমার মেজো চাচা যেমন প্রতি বছর পরীক্ষা দিয়ে ফেল করতেন বড় মামা ফেল করতেন পরীক্ষা না দিয়ে। পরীক্ষা না দেবার চমৎকার সব যুক্তি বের করতেন। এইসব যুক্তিতে অতি সহজেই মা'কে কাবু করে ফেলতেন।

পরীক্ষার আগের দিন মুখ গভীর করে বলতেন, বুঝু এই বছরও পরীক্ষা দিব না বলে সিদ্ধান্ত নিয়েছি।

কেন? এই বছর আবার কি হল?

গত বৎসর পাশের হার বেশী ছিল, কাজেই এই বৎসর কম হবে। পরীক্ষা দিলে ফেল করতে হবে। আগামী বৎসর চেষ্টা চালাব। ইনশাআল্লাহ।

এই বৎসর পরীক্ষাটা দে, পাশ-ফেল পরের ব্যাপার।

আরে না। পরীক্ষা দিয়ে এনার্জি লস করার কোন মানে হয় না।

বলাই বাহুল্য পরের বৎসর তিনি পরীক্ষা দেন না। কারণ রুটিন খুব খারাপ হয়েছে। গ্যাপ কম। তবুও দিতেন কিন্তু এনার্জি লসের ভয়ে দিচ্ছেন না। বড় মামা সব এনার্জি জমা করে রাখলেন এবং শুভক্ষণে পুরো এনার্জি নিয়ে জনৈক তরুণীর প্রেমে পড়ে গেলেন। প্রেমের আবেগে কবিতার পর কবিতা বের হতে লাগল। আমার উপর দায়িত্ব পড়ল এইসব কবিতা যথাস্থানে পৌছে দেবার। আমি অত্যন্ত নিষ্ঠুর সঙ্গে সেই দায়িত্ব পালন করে যেতে লাগলাম।

তরুণীর বিয়ে হয়ে যাওয়ায় প্রেমে ভাটার টান ধরল। গোটা পঞ্চাশেক বিরহের কবিতা লিখে বড় মামা হৃদয়-যাতনা কামালেন। মজার ব্যাপার হচ্ছে বড় মামার সেই সব কবিতা কিন্তু বেশ ভাল ছিল বলে আমার ধারণা। তিনি এইসব কবিতা প্রকাশ করার ব্যাপারে কোন রকম আগ্রহ দেখাননি কিংবা পরবর্তী সময়ে কবিতা লেখার চেষ্টাও করেননি। তাঁর ভাবটা এরকম, এই সব কবিতা তিনি শুধু দুঃখের জন্যেই লিখেছেন — তৃতীয় কারের জন্যে নয়।

আমি নিজে নানান ভাবে বড় মামার কাছে ঋণী। গল্প বলে মানুষকে মত্তমুগ্ন করে ফেলার দুর্লভ ক্ষমতা তাঁর ছিল। তাঁর এই ক্ষমতা আমাকে বার বার বিস্মিত করত। একই গল্প যখন বড় মামার কাছে শুনতাম তখন অন্য রকম হয়ে যেত। এর

কারণ বুঝতে পারতাম না, তবে কারণ নিয়ে ভাবতাম এটা মনে আছে। জীবনের প্রথম ছবি আঁকা তাঁর কাছ থেকেই শিখি। তিনি হাতি আঁকার চমৎকার একটা সহজ কৌশল শিখিয়ে দিলেন। এই কৌশলে আমি তিন হাজারের মত হাতি এক মাসের মধ্যে ঐকে ফেলি। বাড়ির সাদা দেয়াল পেনসিলে আঁকা হাতিতে হাতিময় হয়ে যায়।

তাঁর একটা সাইকেল ছিল। সারাদিন সাইকেলে করে ঘুরতেন। মাঝে মাঝে আমাকে পেছনে বসিয়ে বেড়াতে বের হতেন। সাইকেল চলত ঝড়ের গতিতে। এই সাইকেল বড় মামার প্রতিভার স্পর্শ পেয়ে একদিন মোটর সাইকেল হয়ে গেল। যখনই সাইকেল চলে ভট ভট শব্দ হয়। লোকজন অবাক হয়ে তাকায়। দেখতে সাইকেল অথচ শব্দ হচ্ছে মোটর সাইকেলের, ব্যাপারটা কি? ব্যাপার কিছই না, দু টুকরা শক্ত পিসবোর্ড সাইকেলের সঙ্গে এমন ভাবে লাগানো যে চাকা ঘুরামাত্র স্পোকের সঙ্গে পিসবোর্ড ধাক্কা লেগে ফট ফট শব্দ হয়। শিশুরা প্রতিভার সবচে বড় সমজদার। আমরা বড় মামার প্রতিভার দীপ্তি দেখে বিস্মিত। আমাদের বিস্ময় আকাশ স্পর্শ করল যখন তিনি হাজার স্টাইক শুরু করলেন। হাজার স্টাইকের কারণ মনে নেই শুধু মনে আছে দরজার গায়ে বড় বড় করে লেখা — “আমরণ অনশন। নীরবতা কাম্য।” তিনি একটা খাটে শবাসনের ভঙ্গিতে শুয়ে আছেন। বাবা পুরো ব্যাপারটায় মজা পেয়ে খুব হাসাহাসি করছেন। বড় মামা তাতে মোটেই বিচলিত হচ্ছেন না। তাঁর হাজার স্টাইক ভাস্ক্যানোর কোন উদ্যোগ নেয়া হলো না। একদিন কাটল, দুদিন কাটল, তৃতীয় দিনও পার হল। তখন সবার টনক নড়ল। মা কান্নাকাটি শুরু করলেন। বাড়িতে টেলিগ্রাম গেল। চতুর্থ দিন সন্ধ্যায় বড় মামা এক গ্লাস সরবত খেয়ে অনশন ভঙ্গ করলেন এবং গভীর গলায় ঘোষণা করলেন — এ দেশে থাকবেন না। কোন ভদ্রলোকের পক্ষে এ দেশে থাকা সম্ভব নয়। তিনি বিলেত যাবেন।

তখন বিলেত যাওয়া খুব সহজ ছিল। দলে দলে সিলেটেরা বিলেত যাচ্ছে। মামারও পাসপোর্ট হয়ে গেল। তিনটা নতুন স্যুট বানানো হল। মামা স্যুট পরে ঘুরাফেরা করেন, আমরা মুগ্ধ বিস্ময়ে দেখি। কাঁটা চামচ দিয়ে ভাত-মাছ খান। দেখতে বড় ভাল লাগে।

শেষ পর্যন্ত বিলেত যাওয়া হলো না। মামা বললেন — আরে দূর দূর, দেশের উপর জিনিস নাই। বিদেশ গিয়ে আমি ঘাস কাটব না-কি? আমি ভালই আছি। বাবা বিস্মিত হয়ে বললেন, তুমি তাহলে যাচ্ছ না?

জ্বি না।

কি করবে কিছু ঠিক করেছ?

আই এ পরীক্ষা দেব। এই বার উড়া উড়া গুনছি মেক্সিমাম পাশ করবে।

পরীক্ষা অবশ্য দিলেন না, কারণ পরীক্ষার আগে আগে খবর পেলেন এই বার কোশেন খুব টাফ হবে। গতবার ইঞ্জি হয়েছিল, এই বার টাফ। টাফ কোশেনে পরীক্ষা দেয়ার কোনো মানে হয় না।

তিনি একটা ক্যারাম বোর্ড কিনে ফেললেন। মামা এবং চাচা দু'জনে মিলে গভীর রাত পর্যন্ত টুকুস টুকুস করে ক্যারাম খেলেন। বড় সুখের জীবন তাঁদের।

আমার জীবনও সুখের, কারণ বাসার প্রধান শাসক বাবা অনুপস্থিত। তিনি প্রমোশন পেয়ে পুলিশ ইন্সপেক্টর হয়েছেন। তাঁকে বদলি করা হয়েছে দিনাজপুরের জগদলে। সেই সময় বর্ডার রক্ষার দায়িত্ব ছিল পুলিশের উপর। বাবা চলে গেলেন বর্ডারে। আমার পূর্ণ স্বাধীনতা। কারোরই কিছু বলার নেই।

সেই সময় দেশে বড় ধরনের খাদ্যাভাব দেখা দিল। ভয়াবহ অবস্থা। হাজার হাজার মানুষ খাবারের সন্ধানে শহরে জড়ো হয়েছে। খালা হাতে বাড়ি বাড়ি ঘুরছে।

সিলেট শহরে অনেকগুলি লঙ্গরখানা খোলা হল। লঙ্গরখানায় বিরাট ডেকচিতে বিচুড়ি রান্না করা হয়। ক্ষুধার্ত মানুষদের একবেলা বিচুড়ি খাওয়ানো হয়।

আমি মন্ত্রমুগ্ধের মত ওদের খাওয়া দেখি। কলার পাতা কেটে লাইন ধরে সবাই বসে। প্রত্যেকের পাতায় দুহাতা করে বিচুড়ি দেয়া হয়। কত আনন্দে কত আগ্রহ নিয়েই না তারা সেই বিচুড়ি খায়। ওদের আনন্দে ভাগ বসানোর জন্যই হয়ত বা এক দুপুরে কলার পাতা নিয়ে ওদের সঙ্গে খেতে বসে গেলাম। সেই বিচুড়ি অমৃতের মত লাগল। এরপর থেকে রোজই দুপুর বেলায় লঙ্গরখানায় খেতে যাই। একদিন বোনকেও নিয়ে গেলাম। সেই মহানন্দে কলার পাতা নিয়ে আমার সঙ্গে বসে গেল। খাওয়ার মাঝামাঝি পর্যায়ে এক ভদ্রলোকে বিস্মিত হয়ে আমাদের দু'ভাই বোনের সামনে এসে দাঁড়ালেন। কঠে রাজ্যের বিস্ময় নিয়ে বললেন — এরা কারা?

ধরা পড়ে গেলাম। কানে ধরে আমাদের দু'জনকে বাসায় নিয়ে যাওয়া হল। আমার মা ক্রমাগত কানতে লাগলেন। লঙ্গরখানায় খাওয়ার অপমানে তাঁর না-কি মাথা কাটা যাচ্ছে। লঙ্গরখানায় আমি পাতা পেতে খেয়েছি এতে লজ্জিত বা অপমানিত বোধ করার কি আছে তা আমি ঐ দিন বুঝতে পারিনি। আজো পারি না।

নিঃসন্তান গনি চাচার জীবনে এই সময় একটা বড় ঘটনা ঘটল। এক ভিথিরি মা ছেলে কোলে নিয়ে এসেছে ভিক্ষা করতে। ফুটফুটে ছেলে। গনি চাচার ছেলেটাকে বড়ই পছন্দ হল। তিনি প্রস্তাব দিলেন, ছেলেটাকে তিনি আদর-যত্নে বড় করবেন, তার বিনিময়ে ভিথিরি মা দশ টাকা পাবে। কিন্তু কোনদিন এই ছেলেকে তার ছেলে বলে দাবী করতে পারবে না। মা রাজি হয়ে গেল।

এই ঘটনা আমার মনে বড় ধরনের ছাপ ফেলে।

এখনো চোখের সামনে স্পষ্ট দেখি, ভিথিরি মা মুখ কালো করে ঘরের বারান্দাতে বসে আছে। গনি চাচার স্ত্রী তার ছেলে কোলে বারান্দায় এসে ধমকাচ্ছেন— কি চাও তুমি? তোমাকে না বলেছি, কখনো আসবে না। কেন এসেছ?

ব্যথিত মা করুণ চোখে ছেলের দিকে তাকিয়ে উঠে চলে যাচ্ছে।

ভিথিরিনীর হাত থেকে বাঁচার জন্যে গনি চাচা কয়েকবার বাড়ি বদল করলেন। কোন লাভ হল না। যেখানেই যান সেখানেই মা উপস্থিত হয়। সারাদিন বারান্দায় বসে থাকে।

শেষটায় গনিচাচা চেষ্টা চরিত্র করে সিলেট থেকে বদলি হয়ে গেলেন মৌলভীবাজার। হতদরিদ্র মার হাত থেকে ছিনিয়ে নিলেন একটি শিশু। আমার তখন বয়স অল্প, খুবই অল্প। পৃথিবীর জটিলতা বোঝার বয়স নয়, তবুও মনে হল— এটা অন্যায্য। খুব বড় ধরনের অন্যায্য। ঐ ভিথিরিনী মার সঙ্গে মাঝে মাঝে আমার দেখা হত। আমি তার পেছনে পেছনে হাঁটতাম। বিড় বিড় করে সে নিজের মনে কথা বলত। নিজের দুপাশে খুঁধু ফেলতে ফেলতে এগুত। হয়ত তার মাথা খারাপ হয়েছিল। একজন ভিথিরিনীর মাথা খারাপ হওয়া এমন কোন বড় ঘটনা নয়। জগৎ সংসারের তাতে কিছুই যায় আসে না। পৃথিবী চলে তার নিজস্ব নিয়মে। সেই সব নিয়ম জানার জন্যে এক ধরনের ব্যাকুলতা আমার মধ্যে হয়ত তৈরী হয়েছিল। অনেক ধরনের প্রশ্ন মনে আসত। কাউকে করতে পারতাম না। প্রশ্নগুলির উত্তর নিজের মনেই খুঁজতে হত।

মৃত্যুর পর মানুষ কোথায় যায় এই প্রশ্নটা একদিন মনে এল। ভাল মানুষেরা বেহেশতে, খারাপ মানুষেরা দোজখে— এই সহজ উত্তর মনে ধরলো না। মনে হল— উত্তর এত সহজ নয়। মৃত্যু সম্পর্কিত জটিল প্রশ্নটি মনে আসার কারণ আছে। কারণটা বলি।

একদিন সিলেট সরকারী হাসপাতালের সামনে দিয়ে আসছি। হঠাৎ দেখি নর্দমায় একটি মৃতদেহ পড়ে আছে। লোকজন ভীড় করে দেখছে। কৌতুহল মিটে গেলে চলে যাচ্ছে। আমিও দেখতে লাগলাম। মৃতদেহ দেখে আমার শরীর কাঁপতে লাগল। কারণ মৃত মানুষটির ঠোঁটে হাসি। তার চোখ বন্ধ কিন্তু হাসির ভঙ্গিতে ঠোঁট বেঁকে আছে। দেখেই মনে হয় কোন একটা মজার ঘটনায় চোখ বন্ধ করে সে হাসছে। আমার বুকে ধুক করে ধাক্কা লাগল।

দৌড়ে পালিয়ে এলাম।

মৃতদেহটির হাসি-হাসি মুখের ছবি নিজের মন থেকে কিছুতেই মুছতে পারলাম না। বিকেলে আবার দেখতে গেলাম। মৃতদেহ আগের জায়গাতেই আছে। তার মুখের হাসিরও কোন হেরফের হয়নি।

পরদিন আবার গেলাম। লাশ সরানো হয়নি। তবে মুখের হাসি আর চোখে পড়ল না। অসংখ্য লাল পিপড়ায় সারা শরীর ঢাকা। লোকটির গায়ে যেন লাল রঙের একটা চাদর। খুব ইচ্ছা করল চাদর সরিয়ে তার মুখটি আরেকবার দেখি। দেখি এখনো কি সেই মুখে হাসি লেগে আছে?

আমি বাসায় ফিরলাম কাঁদতে কাঁদতে। বাসায় ফিরেই শুনি বাবার চিঠি এসেছে— আমরা সিলেটে আর থাকব না। চলে যাব দিনাজপুরে, জায়গাটার নাম জগদল। মৃত মানুষটির কথা আর মনে রইল না। আনন্দে লাফাতে লাগলাম।

“মৃত লোকটির কথা আর মনে রইল না” বলাটা বোধ হয় ঠিক হল না। মনে ঠিকই রইল, তবে চাপা পড়ে গেল। একমাত্র শিশুরাই পারে সব ঘটনা সহজ ভঙ্গিতে গ্রহণ করে ঢাকনা দিয়ে ঢেকে রাখতে। তারা একটি স্মৃতি থেকে অতি দ্রুত চলে যেতে পারে অন্য স্মৃতিতে। সব আলাদা আলাদা রাখা। ঢাকনা দিয়ে ঢাকা। মাঝে মাঝে ঢাকনার মুখ তুলে দেখে নেয় সব ঠিক-ঠাক আছে কি-না। কোন কিছুই সে নষ্ট করতে বা ফেলে দিতে রাজি না।

কষ্টকর স্মৃতি মুছে ফেলার আশ্রয় চেষ্টা আমি শুধু বড়দের মধ্যেই দেখি। শিশুদের মধ্যে দেখি না।

আমার বন্ধু উনু

উনুর সঙ্গে আমার পরিচয় ফুটবল খেলার মাঠে। রোগা টিঙে টিঙে একটা ছেলে। বড় বড় চোখ, খাদা নাক, মাথাভর্তি ঝাকড়া চুল।

দু দলে তুমুল খেলা চলছে। আমি মাঠের বাইরে। গায়ে জুর বলে খেলতে পারছি না। জুর এমন বাড়বাড়ি যে বসে থাকতে পারছি না আবার উঠে চলে যেতেও পারছি না। এমন সময় উনুকে লক্ষ্য করলাম। যে খুব মন দিয়ে ঘাস খাচ্ছে।

সত্যি সত্যি ঘাস খাচ্ছে। দু'আঙুলে ঘাসের কচি পাতা দ্রুত তুলে চপ চপ শব্দে চিবিয়ে খাচ্ছে। আমি অবাক হয়ে বললাম, ঘাস খাচ্ছে কেন?

সে গভীর গলায় বলল, আমার ইচ্ছা।

বলে পুরো সুফি-সাধকদের নির্লিপ্ততা নিয়ে ঘাস চিবুতে লাগল। এমন ভাবে চিবুচ্ছে যেন অতি উপাদেয় কোন খাবার। তার ঝাওয়া দেখে জিবে পানি চলে আসে। আমি কৌতুহল সামলাতে পারলাম না দ্বিতীয়বার জিজ্ঞেস করলাম, ঘাস খাচ্ছে কেন? সে উদাস গলায় বলল, ভাইটামিন আছে।

এরকম একটি ছেলের সঙ্গে বন্ধুত্ব না হওয়ার কোনই কারণ নেই। দশ মিনিটের মাথায় আমরা জন্মের বন্ধু হয়ে গেলাম। সে শিথিয়ে দিল ঘাসের কোন অংশ খেতে

হয়। কোন অংশ খেতে হয় না। দু'টা পাতার মাঝখানে সুতার মত যে ঘাসটা বের হয় সেটাই খাদ্য তবে ডগার খানিকটা বাদ দিতে হবে। ডগাটা বিষ।

উনু আমার চেয়ে এক ক্লাস উপরে পড়ে। আমাদের স্কুলে না, অন্য কি একটা স্কুলে। তার মা নেই, বাবার সঙ্গে থাকে। বাবা প্রতিদিন রুটিন করে উনুকে দু'বেলা মারেন। স্কুল থেকে ফিরে আসার পর একবার, সন্ধ্যাবেলা খেলার মাঠ থেকে ফিরে আসার পর একবার। সেই মারও দর্শনীয় মার। তবে মজার ব্যাপার হচ্ছে মারপর্ব শেষ হবার পরই দু'জন অতি ঘনিষ্ঠ বন্ধু। যেন কিছুই হয়নি।

উনুর বাবা ছোট কোন চাকরী করতেন। বাসার সাজ-সজ্জা অতি দরিদ্র। ঝাঁশের বেড়ার ঘর। পাশেই ডোবা। ময়লা নোংরা পানি। খেলা শেষ করে বাসায় ফিরে উনু সেই নোংরা পানিতে দিব্যি হাত-মুখ ধুয়ে ফেলে।

উনুর বাবাকে মানুষ হিসেবে আমার খুব পছন্দ হল। ছোটদের সঙ্গে কথা বলেন এমন ভাবে যেন তারা ছোট না। তাঁর সমবয়স্ক মানুষ। আমাকে একদিন বললেন, এই যে আই আই চুল্লীগর সাহেব দেশের ভার নিল, লোকটা কেমন? তোমার কি মনে হয় উনিশ-বিশ কিছু হবে?

আই আই চুল্লীগর কে? সে কবেই বা দেশের ভার নিল কিছুই জানি না। তবু খুব বুঝদার মানুষের মত মাথা নাড়লাম। মুখে বললাম, হবে।

উনি দীর্ঘ নিঃশ্বাস ফেলে বললেন, মনে হয় না। সব এক। দেয়াশলাইয়ের কাঠি। ফুস কইরা একবার জ্বলল, তারপর শেষ। চমৎকার সব উপমা আমি উনার কাছে শুনছি। যেমন মেয়ে মানুষ সম্পর্কে তাঁর একটা ছড়া

“মায়ে পুরা
ভইনে খুরা
কন্যায় পাই,
স্ত্রীর কপালে
কিছুই নাই”।

এই ছড়ার অর্থ জানি না। অসংখ্যবার তাঁর কাছে শুনছি বলে এখনো মনে আছে।

উনু একবার আমাকে চিতই পিঠা খাওয়াবার দাওয়াত দিল। তার বাবা চিতই পিঠা বানাবেন। যথাসময়ে উপস্থিত হলাম। উঠানে চুলায় পিঠা সঁকা হচ্ছে। পিতা এবং পুত্র মিলে পিঠা বানাচ্ছে। গল্প-গুজব করতে করতে পিঠা খাওয়া হচ্ছে। ওদের দু'জনকে দেখে যা হিংসা লাগল। মনে হল ওরা কত সুখী। আমার যদি মা না থাকত কি চমৎকার হত।

উনুর কপালের সুখ দীর্ঘস্থায়ী হল না। তার বাবা বিয়ে করে ফেললেন। উনু গভীর হয়ে আমাকে বলল, সৎমার সংসারে থাকব না। দেশান্তর হব।

আমি বললাম, কোথায় যাবে?

এখনো ঠিক করি নাই। ত্রিপুরা, আসাম এক জায়গায় গেলেই হয়।

প্রাণের বন্ধুকে একা ছেড়ে দেয়ার প্রশ্নই উঠে না। ঠিক করলাম আমিও সঙ্গে যাব। বন্ধুর শোকে আমার ভিতরও খানিকটা বৈরাগ্য এসে গেছে।

এক সকালে সিলেট রেলস্টেশন থেকে ছাড়ছে এমন একটি ট্রেনের কামরায় দু'জন উঠে বসলাম। ট্রেন কোথায় যাচ্ছে কিছুই জানি না। ট্রেন ছাড়ার পর পরই আমার মন থেকে দেশান্তরী হবার যাবতীয় আগ্রহ কপূরের মত উবে গেল। বাসার জন্যে খুব যে মন খারাপ হল তা না। প্রচণ্ড ভয়ে অস্থির হলাম এই ভেবে যদি টিকিট চেকার উঠে তখন কি হবে? কান্না শুরু করলাম, ট্রেনের গতি বাড়ার সঙ্গে সঙ্গে কান্নার শব্দও বাড়তে লাগল। কেন জানি বাকি ঘটনা আমার পরিষ্কার মনে নেই। আবছা আবছা মনে আছে। পরের স্টেশনে আমাদের নামিয়ে দেয়া হল। ধবধবে শাদা পাঞ্জাবী পরা এক ভদ্রলোক বাসে করে আমাদের সিলেট শহরে পৌঁছে দেন।

আমার ভেতর থেকে দেশান্তরী হবার আগ্রহ পুরোপুরি চলে গেলেও উনুর ভেতর সেটা থেকেই যায়। প্রতিমাসে অন্তত একবার হলেও সে বাড়ি থেকে পালিয়ে যায়। তিন চার দিন কোথায় কোথায় কাটিয়ে আবার ফিরে আসে।

উনু শুধু যে আমার বন্ধু ছিল তাই না, শিক্ষকও ছিল। জগতের অনেক গুরুত্বপূর্ণ বিষয় সম্পর্কে তাৎপর্যপূর্ণ ব্যাখ্যা আমি তার কাছ থেকে পেয়েছি। যেমন আকাশে প্লেন দেখলেই দৌড়ে গাছের নীচে কিংবা বাড়ির ভেতর ঢোকা উচিত। কারণ প্লেনের যাত্রীরা পেসাব-পায়খানা করলে তা মাথায় এসে পড়তে পারে।

নানান ওষুধ পত্রের টোটকা দাওয়াইও তার জানা ছিল। যেমন মুখে ডিম নিয়ে যে সব লাল লাল পিপড়া হেঁটে যায় ঐ সব পিপড়া দৈনিক পাঁচটা করে খেলে অর্শ রোগ সেরে যায়।

যেহেতু আমার অর্শরোগ ছিল না কাজেই সেই মহৌষধ পরীক্ষা করে দেখা হয়ে উঠেনি।

উনুকে আমি কখনো হাসি-খুশী দেখিনি। সারাক্ষণ সে চিন্তিত ও বিষণ্ণ। শুধু একদিন হাসতে হাসতে দৌড়ে তাকে আমাদের বাসার দিকে আসতে দেখা গেল। জানলাম তার একটা বোন হয়েছে। দেখতে সে নাকি পরীর মত সুন্দর। জন্মের পর পর সে হাসতে শিখে গেছে। সারাক্ষণই না কি হাসছে।

আমি পরদিন সদাহাস্যময়ী উনুর ভগ্নিকে দেখতে গেলাম। উনুর মা শাড়ির আঁচল ফাঁক করে লাল টুকটুকে শিশুটিকে দেখিয়ে খুশী-খুশী গলায় বললেন, নজর লাগাইও না। মাটিতে খুক দেও। যাতে শিশুটির উপর নজর না লাগে সে জন্যেই আমি এবং উনু দু'জনই মাটিতে এক গাদা খু খু ফেললাম। এই ঘটনার খুব সম্ভব এক সপ্তাহের ভেতর উনুর বাবা সন্মাস রোগে মারা গেলেন।

অন্যের দুঃখে অবিভূত হবার মত বয়স বা মানসিকতা কোনটাই তখন ছিল না। কাজেই এই ঘটনা আমার মনে কোন ছাপ ফেলল না। আমাদের বাসায়ও তখন বড় ধরনের সমস্যা। গনিচাচার চাকরি চলে গেছে। এটিকরাপশনের মামলা চলছে তাঁর বিরুদ্ধে। জেল হয়ে যাবে, মোটামুটি নিশ্চিত। তিনি কপর্দকশূন্য অবস্থায় তাঁর স্ত্রী এবং পালক-পুত্রকে নিয়ে আমাদের বাসায় এসে উঠেছেন। গনিচাচার স্ত্রী রাতদিন কাঁদেন। সেই কান্নাও ভয়াবহ কান্না। চিৎকার, মাটিতে গড়াগড়ি। আমরা ছোটরা অবাক হয়ে দেখি।

গনি চাচা উঠেনে পাটি পেতে সারাদিন শুয়ে থাকেন এবং তালপাতার পাখায় হাওয়া খান। দীর্ঘদিন তাঁরা আমাদের বাসায় রইলেন। দু'টি সংসার টানতে গিয়ে মা হিমসিম খেয়ে খেলেন। তাঁর অতি সামান্য ফে-সব সোনার গয়না ছিল সব বিক্রি হয়ে গেল। সেবার ঈদে আমরা কেউ কোন কাপড় শেলাম না। আমাদের বলা হল অল্পদিন পরেই বড় ঈদ আসছে। বড় ঈদে সবাই ডাবল ডাবল কাপড় পাব।

যেহেতু খানিকটা বড় হয়েছি চারপাশের জগত কিছুটা হলেও বুঝতে শিখেছি, সে কারণে মনের কষ্ট পুরোপুরি দূর করতে পারছি না। মন খারাপ করে ঘুরে বেড়াই। আশেপাশের বাচ্চারা বাবাদের হাত ধরে দোকানে যায়। কলরব করতে করতে ফিরে আসে।

মনের কষ্ট দূর করতে উনুর চেয়ে ভাল কেউ নেই। মুহূর্তের মধ্যে সে অন্যের মন-খারাপ-ভাব দূর করে দিতে পারে যদিও সে নিজেকে আগের চেয়েও বিষণ্ণ হয়ে যায়।

উনুকে বাসায় পেলাম না উনুর মা'কেও না। তারা সবাই কোথায় নাকি চলে গেছে। খুব খারাপ লাগল। উনুদের পাশের বাসায় এক ছেলে বলল, উনু জল্লার পাড়ের এক চায়ের দোকানে কাজ করে। বাবাবিহীন সংসারের দায়িত্ব এই বয়সেই সে মাথায় নিয়ে নেয়েছে।

খুঁজে খুঁজে একদিন তাকে বের করলাম। ময়লা হাফপেন্ট পরা। টেবিলে-টেবিলে চা দিচ্ছে। আমি বাইরে থেকে ডাকলাম এই উনু। সে তাকাল কিন্তু দোকান থেকে বেরিয়ে এল না।

বাসায় ফিরে এলাম।

বাসায় খুব আনন্দ। খুব উত্তেজনা। বাবা জগদল থেকে আমাদের নিতে এসেছেন এবং ঘোষণা করেছেন এই ঈদেই আমাদের সবাইকে কাপড় এবং জুতা দেয়া হবে। কেনাও হবে আজ।

আনন্দে লাফাতে লাগলাম।

উনুর কথা মনে রইল না।

জগদলের দিন

আমার শৈশবের অদ্ভুত স্বপ্নময় কিছুদিন কেটেছে জগদলে। জগদলের দিন আনন্দময় হবার অনেকগুলি কারণের প্রধান কারণ স্কুলের যন্ত্রণা থেকে মুক্তি। সেখানে কোন স্কুল নেই কাজেই পড়াশোনার যন্ত্রণা নেই। মুক্তির মহানন্দ।

আমরা থাকি এক মহারাজার বসত বাড়িতে। যে বাড়ির মালিক অল্প কিছুদিন আগেই দেশ ছেড়ে ইণ্ডিয়াতে চলে গেছেন। বাড়ি চলে এসেছে পাকিস্তান সরকারের হাতে। মহারাজার বিশাল এবং প্রাচীন বাড়ির একতলায় আমাদের থাকার ব্যবস্থা। দুতলাটা তালাবন্ধ। শুধু দুতলা নয়। কয়েকটা ঘর ছাড়া বাকি সবটা তালাবন্ধ। কারণ মহারাজা জিনিসপত্র কিছুই নিয়ে যাননি। ঐ সব ঘরে তাঁর জিনিসপত্র রাখা।

ঐ মহারাজার নাম আমার জানা নেই। মাকে জিজ্ঞেস করেছিলাম, তিনিও বলতে পারলেন না। তবে তিনি যে অত্যন্ত ক্ষমতাশালী ছিলেন তার অসংখ্য প্রমাণ এই বাড়িতে ছড়ানো। জঙ্গলের ভেতর বাড়ি। সেই বাড়িতে ইলেকট্রিসিটির ব্যবস্থা করার জন্যে তাঁর ছিল নিজস্ব জেনারেটর। দাওয়াতের চিঠি ছেপে পাঠানোর জন্যে মিনি সাইজের একটা ছাপাখানা।

বাবাকে অসংখ্যবার বলতে শুনেছি — মহারাজার রুচি দেখে মুগ্ধ হতে হয়। আহা কত বই। কত বিচিত্র ধরনের বই।

বাবা অনেক লেখালেখি করলেন, যাতে বইগুলি অদ্ভুত সরকারী পর্যায়ে সংরক্ষণের চেষ্টা করা হয়। তাঁর লেখালেখিতে কোন কাজ হল না। বাবা কতবার যে গভীর বেদনায় বললেন, — আহা চোখের সামনে বইগুলি নষ্ট হচ্ছে, কিছু করতে পারছি না। তিনি ইচ্ছা করলেই সমস্ত বই নিজের সংগ্রহে যুক্ত করতে পারতেন। তাতে বইগুলি রক্ষা পেত। তিনি তা করলেন না। পরের জিনিস, নিজের মনে করার প্রশ্নই আসে না। তিনি হা-ছতাস করতে লাগলেন। চোখের সামনে বই নষ্ট হতে লাগল। হোক নষ্ট, তাতে আমাদের অর্থাৎ ছোটদের তেমন কিছুই যায় আসে না। কারণ আমাদের সামনে অন্য একটি জগৎ খুলে গেছে।

বাড়ির সামনে বিশাল বন। একটু দূরেই নদী। যে নদীর পানি কাকের চোখের মত স্বচ্ছ। নদীর তীরে বাগি মিক করে জ্বলে। নদীটিই পাকিস্তান এবং ইণ্ডিয়ার সীমানা। সারাক্ষণ অপেক্ষা করতাম কখন দুপুর হবে — নদীতে যাব গোসল করতে। একবার নদীতে নামলে উঠার নাম নেই। তিন ভাইবোন নদীতে ঝাপঝাপি করছি, বড়রা হয়ত একজনকে জোর করে ধরে পাড়ে নিয়ে রাখল। আনতে গেল অন্য জনকে। এই ফাঁকে পাড়ে যে আছে সে লাফিয়ে নামল।

বিকেলগুলিও কম রোমাঞ্চকর ছিল না। প্রতিদিনই বাবা কাঁধে গুলিভরা বন্দুক নিয়ে বলতেন — চল বনে বেড়াতে যাই। কাঁধে বন্দুক নেয়ার কারণ হচ্ছে প্রায় প্রায়ই বাঘ বের হয়। বিশেষ করে চিত্তা বাঘ।

বাবার সঙ্গে সন্ধ্যা পর্যন্ত বনে ঘুরতাম। ক্রান্ত হয়ে ফিরতাম রাতে। ভাত খাওয়ার আগেই ঘুমে চোখ জড়িয়ে আসত। কত বিচিত্র শব্দ আসত বন থেকে। আনন্দ এবং আতঙ্কে শিউরে শিউরে উঠতাম।

সবাই ঘুমুতাম একটা ঘরে। বিশাল তিনটা খাট একত্র করে ফুটবলের মাঠের আকৃতির একটা বিছানা তৈরী করা হত। বিছানার উপরে সেই মাপে তৈরী এক মশারী। রাতে বাধরুম পেলে মশারীর ভেতর থেকে নামা নিখিল ছিল, কারণ খুব কাঁকড়া বিছা এবং সাপের উপদ্রব।

কাঁকড়া বিছাগুলি সাপের মতই মারাত্মক। একবার কামড়ালে বাঁচার আশা নেই, এমনি তার বিষ। মৃত্যু সঙ্গে নিয়ে কাঁকড়া বিছা মেঝেতে হেঁটে হেঁটে যাচ্ছে। আমি বিছানায় বসে মুগ্ধ হয়ে দেখছি, এই ছবি এখনো চোখে ভাসে।

আমাদের আশেপাশে কোন জনমানব ছিল না। অনেক দূরে বনের ভেতর একজন কম্পাউণ্ডার থাকতেন। সভ্য মানুষ বলতে তিনিই। তাঁর বড় মেয়েটির নাম আরতী। আমার বয়সী, বিচিত্র স্বভাবের মেয়ে। দেবী প্রতিমার মত শান্ত মুখশ্রী, কিন্তু সেই শ্রীময়ী চেহারার সঙ্গে স্বভাবের কোন মিল নেই। একদিন সকালে আমাদের বাসার সামনে এসে মিহি সুরে ডাকতে লাগল — কাজল, এই কাজল।

আমি বের হয়ে এলাম। যেন কত দীর্ঘ দিনের চেনা। সেই ভঙ্গিতে বলল, বনে কেড়াতে যাবে? উচ্চারণ বিশুদ্ধ শান্তিপূরী। গলার স্বরটিও ভারী মিষ্টি। আমি তৎক্ষণাৎ বললাম, হ্যাঁ।

সে আমাকে নিয়ে বনে ঢুকে গেল। ক্রমেই সে ভেতরের দিকে যাচ্ছে। আমি এক সময় শঙ্কিত হয়ে বললাম, ফেরার পথ মনে আছে? সে আমার দিকে তাকিয়ে এমন ভাবে হাসল যে এরকম অদ্ভুত কথা কখনো শুনেনি। তারপরই হঠাৎ একটা দৌড় দিয়ে উঠাও হয়ে গেল।

আমি ভাবলাম নিশ্চয় লুকোচুরি জাতীয় কোন খেলা। আমাকে ভয় দেখানোর চেষ্টা। আমি খুব স্বাভাবিক থাকার চেষ্টা করতে করতে কাতর গলায় ডাকতে লাগলাম — আরতী, এই আরতী।

তার কোন খোঁজ নেই। এই অদ্ভুত মেয়ে আমাকে বনে ফেলে রেখে বাসায় চলে গেছে।

আমি পথ ঝুঁজে বের করতে গিয়ে আরো গভীরে ঢুকে পড়লাম। একসময় দিশাহারা হয়ে কাদতে বসলাম। জ্বলন্ত কাঠকুড়ানো সাঁওতাল যুবক এই অবস্থায় আমাকে উদ্ধার করে বাসায় দিয়ে আসে।

এর দিন পাঁচেক পর আরতী আবার এসে ডাকতে লাগল — এই কাজল, এই। আমি বের হওয়া মাত্র বলল, বনে যাবে?

আমি খুব ভাল করে জানি, এই মেয়ে আমাকে আবার আগের দিনের মতো গভীর জঙ্গলে ফেলে দিয়ে চলে আসবে। তবু তার আহ্বান উপেক্ষা করতে পারলাম

না। পরে যা হবার হবে। আপাতত খানিকক্ষণ এই রূপবতী পাগলী মেয়ের সঙ্গে থাকা যাক। সেদিনও সে তাই করল। এর জন্যে তার উপর আমার কোন রকম রাগ হলো না বরং মনে হল এই মেয়েটির পাশাপাশি থাকার বিনিময়ে আমি আমার সমস্ত পৃথিবী দিয়ে দিতে পারি। এই মোহকে কি বলা যায়? প্রেম? প্রেম সম্পর্কে কয়েকটা ব্যাখ্যা তো এখানে যাটে না। তাহলে এই প্রচণ্ড মোহের জন্ম কোথায়? আমি জানি না। শুধু জানি মেয়েটির বাবা একদিন তার পরিবার পরিজন নিয়ে কাউকে কিছু না জানিয়ে রাতের অন্ধকারে ইণ্ডিয়া চলে যান। এই খবর পেয়ে গভীর শোকে আমি হাউমাউ করে কাদতে থাকি। মা যখন জিজ্ঞেস করলেন, কি হয়েছে? আমি বললাম পেটে ব্যথা। বলে আরো উচ্চস্বরে কাদতে লাগলাম। পেট-ব্যথার অশুধ হিসেবে পেটের নীচে বালিশ দিয়ে আমাকে সারাদিন উপুড় হয়ে শুয়ে থাকতে হল। বাবা আমাকে দু'ফোটা বায়োকেমিক অশুধ দিলেন। তখন তিনি বায়োকেমিক ওশুধ নিয়ে খুব মেতেছেন। চমৎকার একটা ব্যাগে তাঁর অশুধ থাকে। বারটা শিশির বারো রকমের অশুধ। পৃথিবীর সব রোগ-ব্যাধি এই শিশিতে ঔষধে অরোগ্য হয়। অনেকটা হোমিওপ্যাথির মত। তবে হোমিওপ্যাথিতে যেমন অশুধের সংখ্যা অনেক, এখানে মাত্র বারটা।

বাবার বায়োকেমিক চিকিৎসায় আমার বিরহ-ব্যথা অনেকটা দূর হল। এই পৃথিবীতে কিছুই স্থায়ী নয় এমন মনোভাব নিয়ে বিছানা থেকে নামলাম। কিছুক্ষণের ভেতরই আবার বিছানায় উঠতে হল। কারণ কাঁপুনি দিয়ে জ্বর আসছে। বাবা-মা দুজনেরই মুখ শুকিয়ে গেল — লক্ষণ ভাল নয়। নিশ্চয় ম্যালেরিয়া। সেই সময়ে এই অঞ্চলের ম্যালেরিয়া কুখ্যাত ছিল। একবার কাউকে ধরলে তার জীবনীশক্তি পুরোপুরি নিঃশেষ করে দিত। ম্যালেরিয়ায় মৃত্যু ছিল নৈমিত্তিক ব্যাপার। আমরা প্রতিষেধক হিসেবে বায়োকেমিক ওশুধ ছাড়াও প্রতি রবিবারে পাঁচ গ্রেন করে কুইনাইন খাচ্ছি। তারপরও ম্যালেরিয়া ধরবে কেন?

বাবা এই ভয়ংকর জায়গা থেকে বদলির জন্য চেষ্টা-তদবির করতে লাগলেন। শুনে আমার মন ভেঙ্গে গেল। এত সুন্দর জায়গা, এমন চমৎকার জীবন — এসব ছেড়ে কোথায় যাব? ম্যালেরিয়ায় মরতে হলেও এখানেই মরব। তা ছাড়া ম্যালেরিয়া অসুখটা আমার বেশ পছন্দ হল। যখন জ্বর আসে তখন কী প্রচণ্ড শীতই না লাগে। শীতের জন্যেই বোধ হয় শরীরে এক ধরনের আবেশ সৃষ্টি হয়। জ্বর যখন বাড়তে থাকে তখন চোখের সামনের প্রতিটি জিনিস আকৃতিতে ছোট হাতে থাকে। দেখতে বড় অদ্ভুত লাগে। একসময় নিজেকে বিশাল দৈত্যের মতো মনে হয়। কী আশ্চর্য অনুভূতি।

শুধু আমি একা নই, পালা করে আমার সব ভাই-বোন এবং মা জুরে পড়তে লাগলেন। একজন জ্বর থেকে উঠতেই অন্যজন জুরে পড়ে। জ্বর আসেও খুব নিয়মিত। আমরা সবাই জানি কখন জ্বর আসবে। সেই সময়ে লেপ-কাঁথা গায়ে

জড়িয়ে আগেভাগেই বিছানায় শুয়ে পড়ি।

প্রতিদিন ভোরে তিন ভাই-বোন রাজবাড়ির মন্দিরে চাতালে বসে রোদ গায়ে মাষি। এই সময় আমাদের সঙ্গে দেয় বেঙ্গল টাইগার। বেঙ্গল টাইগার হচ্ছে আমাদের কুকুরের নাম। না আমাদের কুকুর নয়, মহারাজার কুকুর। তাঁর নাকি অনেকগুলি কুকুর ছিল। তিনি সব কটাকে নিয়ে যান কিন্তু এই কুকুরটিকে নিতে পারেননি। সে কিছুতেই রাজবাড়ি ছেড়ে যেতে রাজি হয় নি।

মা, তাকে দুবেলা খাবার দেন।

মাটিতে খাবার ঢেলে দিলে সে খায় না। খালায় করে দিতে হয়। শুধু তাই না, খাবার দেবার পর তাকে মুখে বলতে হয় — খাও।

খানদানী কুকুর। আদব-কায়দা খুব ভাল। তবে বয়সের ভারে সে কাবু। সারাদিন বাড়ির সামনে শুয়ে থাকে। হাই তোলে, কিছুতে কিছুতে মৃত্যুর জন্য অপেক্ষা করে।

এক ভোরবেলার কথা। আমার কাঁপুনি দিয়ে জ্বর আসছে। আমি কস্বল গায়ে দিয়ে মন্দিরের চাতালে বসে আছি। আমার সঙ্গে শেফু এবং ইকবাল। মা এসে আমাদের মাঝখানে শাহীনকে [আমার চার নাম্বার ভাই] বসিয়ে দিয়ে গেলেন। আমাদের দায়িত্ব হচ্ছে তার দিকে নজর রাখা, সে যেন হামাণ্ডি দিয়ে চাতাল থেকে পড়ে না যায়।

মা চলে যাবার পর পরই হিস হিস শব্দে পেছনে ফিরে তাকালাম। যে দৃশ্য দেখলাম সে দৃশ্য দেখার জন্য মানসিক প্রস্তুতি আমার ছিল না। মন্দিরের বন্ধ দরজার ফাঁক দিয়ে প্রকাণ্ড একটা কেউটে সাপ বের হয়ে আসছে। মাটি ছুঁয়ে ছুঁয়ে আসছে। ফনা তুলে এদিক ওদিক দেখে, আবার মাটি ছুঁয়ে ছুঁয়ে আসে আবার ফনা তুলে। আমরা তিন ভাই-বোন ছিটকে সরে গেলাম। শাহীন একা বসে রইল, সাপ দেখে তার আনন্দের সীমা নেই। সে চেষ্টা করছে সাপটির দিকে এগিয়ে যেতে।

আর তখনই বেঙ্গল টাইগার ঝাঁপিয়ে পড়ল সাপটির উপর। ঘটনা এত দ্রুত ঘটল যে আমরা কয়েক মুহূর্ত বুঝতেই পারলাম না কি হচ্ছে। এক সময় শুধু দেখলাম কুকুরটা সাপের ফনা কামড়ে ছিড়ে ফেলেছে। বেঙ্গল টাইগার ফিরে যাচ্ছে নিজের জায়গায়। যেন কিছুই হয়নি। নিজের স্বাভাবিক কর্মকাণ্ডে শেষ করল।

সাপ কুকুরটিকে কামড়ানোর সুযোগ পেয়েছিল কিনা জানি না। সম্ভবত কামড়ানির কারণ কুকুরটি বেঁচে রইল, তবে নড়াচড়া পুরোপুরি বন্ধ করে দিল। দ্বিতীয় দিনে তার চামড়া বসে পড়ল এবং দগদগে ঘা দেখা দিল। এই থেকে মনে হয় সাপ সম্ভবত কামড়েছে। সাপের বিষ কুকুরের ক্ষেত্রে হয়ত তেমন ভয়াবহ নয়।

আরো দুদিন কাটল। কুকুরটি চোখের সামনে পচে গলে যাচ্ছে। তার কাতর ধ্বনি সহ্য করা মুশকিল। গা থেকে গলিত মাংসের দুর্গন্ধ আসছে।

বাবা মাকে ডেকে বললেন, আমি এর কষ্ট সহ্য করতে পারছি না। তুমি বন্দুক

বের করে আমাকে দাও।

বাবা আমাদের চোখের সামনে পরপর দুটি গুলি করে কুকুরটিকে মারলেন। শান্ত গলায় বললেন, যে আমার ছেলের জীবন রক্ষা করেছে তাকে আমি গুলি করে মারলাম। একে বলে নিয়তি।

আমার কাছে বাবাকে পৃথিবীর নিষ্ঠুরতম মানুষদের একজন বলে মনে হল। নিজেকে কিছুতেই বুঝাতে পারছিলাম না এমন একটি কাজ তিনি কি করে করতে পারলেন? রাগে দুঃখে ও অভিমানে রাতে ভাত না খেয়ে শুয়ে পড়েছি। বাবা আমাকে ডেকে নিয়ে বারান্দায় বসালেন।

দুজন চুপ চাপ বসে আছি।

চারদিকে ঘন অন্ধকার। তন্দ্রক ডাকছে। বাড়ির চারপাশের আমের বনে হাওয়া লেগে বিচিত্র শব্দ উঠছে।

বাবা কিছুই বললেন না। হয়ত অনেক কিছুই তাঁর মনে ছিল। মনের ভাব প্রকাশ করতে পারলেন না। এক সময় বললেন, যাও ঘুমিয়ে পড়।

কুকুরটি আমার মনে গভীর ছাপ ফেলেছিল।

আমার মনে আছে — এই নিয়ে আমি কিছু একটা লিখতে চেষ্টাও করেছিলাম। রচনাটার নাম দিয়েছিলাম বেঙ্গল টাইগার কিংবা আমাদের বেঙ্গল টাইগার। সম্ভবত এই রচনাই আমার প্রথম সাহিত্য। বলাই বাহুল্য অতি তুচ্ছ রচনা। কিন্তু হৃদয়ের গভীর যাতনায় যার জন্ম তাকে তুচ্ছই বা করি কি করে?

জগদলে বৈশীদিন থাকা হল না। বাবা বদলি হলেন দিনাজপুরের পচাগড়ে [পঞ্চগড়]। এই জায়গা সম্পর্কে আমার বিশেষ কিছু মনে নেই, শুধু মনে আছে ভোরবেলা বাসার সামনে এসে দাঁড়ালে কাঞ্চনজঙ্ঘার ধবল চূড়া দেখা যেত। মনে হত পাহাড়টা রূপার পাতে মোড়া। সূর্যের আলো পড়ে সেই রূপা চকচক করছে। বাবা আমাদের মধ্যে সাহিত্যবোধ জাগ্রত করবার জন্যেই হয়ত এক ভোরবেলায় ঘোষণা করলেন, কাঞ্চনজঙ্ঘাকে নিয়ে যে একটা কবিতা লিখতে পারবে সে চার আনা পয়সা পাবে। অনেক চেষ্টা করেও কোন কবিতা দাঁড় করাতে পারলাম না। মনটাই খারাপ হয়ে গেল। আরো মন খারাপ হল যখন আমাদের তিন ভাইবোনকে স্কুলে ভর্তি করিয়ে দেয়া হল।

স্কুলে ভর্তি করতে নিয়ে গেলেন বড় মামা। তিনজনই কাঁদতে কাঁদতে যাচ্ছি। এই পৃথিবীর হৃদয়হীনতা কেউই সহ্য করতে পারছি না। বড় মামা উপদেশ দিতে দিতে নিয়ে যাচ্ছেন। — “বিদ্যা অমূল্য ধন।” “পড়াশোনা করে যে গাড়ি-ঘোড়া চড়ে সে” — এইসব।

অমূল্য ধন বা গাড়ি-ঘোড়া কোন কিছুর প্রতি কোন আকর্ষণ বোধ করছি না।

বড় মামা আমাদের চোখের জল অগ্রাহ্য করে স্কুলে ভর্তি করিয়ে দিলেন। শুধু তাই নয়, হেড মাস্টার সাহেবকে বললেন, আপনাদের যদি আপত্তি না থাকে আমি

বিনা বেতনে আপনাদের স্কুলে পড়াব। আপাতত আমার কিছু করার নেই। হাতে প্রচুর অবসর।

হেড মাস্টার রাজি হলেন, আমি খানিকটা আশার আলো দেখতে পেলাম। যাই হোক একজন স্যার হলেন আমাদের নিজেদের লোক এবং অতি প্রিয় মানুষ। স্কুলের দিনগুলি হয়ত খারাপ যাবে না। দ্বিতীয় দিনেই বড় মামা আমাদের ক্লাসে অংক করাতে এলেন। আমি হাসি মুখে চেঁচিয়ে উঠলাম — “বড় মামা।”

মামার মুখ অন্ধকার হয়ে গেল। ছংকার দিয়ে বললেন — মামা? মামা মানে? চড় দিয়ে সব দাঁত খুলে ফেলব। স্কুলে আমি তোমাকে চিনি না। তুমিও আমাকে চেন না। বল ৬ এর ঘরের নামতা বল। পাঁচ ছয় কত?

আমি হতভম্ব।

একি বিপদ। ছয়ের ঘরের নামতা যে জানি না এটা বড় মামা খুব ভাল করেই জানেন। কারণ তিনি আমাদের পড়ান।

তিনি দুনিয়া-কাঁপানো ছংকার দিলেন, কি, পারবে না?

না।

না আবার কি? বল, জ্বি না।

জ্বি না।

বল — জ্বি না স্যার।

জ্বি না স্যার।

না পারার জন্যে শাস্তির ব্যবস্থা হবে। আত্মীয় বলে আমার কাছ থেকে পার পাওয়া যাবে না। আমার চোখে সব সমান। সবাই ছাত্র। ক্লাস-ক্যাপ্টেন কোথায়? যাও, বেত নিয়ে আস।

বেত আনা হল। এবং সত্যি সত্যি বড় মামা ছয়টা বেতের বাড়ি দিলেন — যেহেতু ছয়ের ঘরের নামতা।

স্কুলে মোটামুটি আতঙ্কের সৃষ্টি হয়ে গেল। ছাত্রমহলে রটে গেল ভয়ংকর রাগি একজন স্যার এসেছেন। অতি কড়া, তাঁর ক্লাসে নিঃশ্বাস ফেলা যায় না।

বড়মামার চাকরি দীর্ঘস্থায়ী হল না। স্থানীয় এস. ডি. ও. সাহেবের ছোট ভাইকে কানে ধরে উঠাবসা করার কারণে তাঁর চাকরি চলে গেল। আমরা হাঁফ ছেড়ে বাঁচলাম। বড় মামা আবার আগের মূর্তিতে ফিরে এসেছেন। গল্প করছেন, আমাদের নিয়ে ঘুরে বেড়াচ্ছেন। কোথায় গেলে না—কি রাতের বেলা দাজিলিং শহরের বাতি দেখা যায়। নিয়ে গেলেন।

গভীর রাত পর্যন্ত অন্ধকারে দাঁড়িয়ে শীতে কাঁপছি। দাজিলিং শহরের বাতি আর দেখছি না। উপরের দিকে তাকিয়ে থাকতে থাকতে ঘাড় ব্যথা হয়ে গেল। কিছুই দেখা গেল না। বড় মামা বিরক্ত হয়ে বললেন, ওদের আজ বোধ হয় ইলেকট্রিসিটি ফেল করেছে। আরেকদিন আসতে হবে। অসাধারণ দৃশ্য। না দেখলে জীবন বৃথা।

একদিন সাইকেলের সামনে বসিয়ে আমাকে নিয়ে গেলেন পাহাড়ি নদী দেখাতে। প্রায় চার পাঁচ ঘণ্টা সাইকেল চালিয়ে নালার মত একটা জলধারা পাওয়া গেল। মামা বললেন, তুমি ঘুরে বেড়াও। আমি এই ফাঁকে একটা কবিতা লিখে ফেলি। মামা নদীর পাড়ে বসে রোলটানা খাতায় কবিতা লিখতে বসলেন। দীর্ঘ কবিতা লেখা হল। কবিতার নামটা মনে আছে।

“হে পাহাড়ি নদী”।

বড় মামার এই কবিতা স্থানীয় একটি পত্রিকায় ছাপাও হল। পচাগড়ের দিনগুলি আমাদের কাছে এক সময় সহনীয় হয়ে উঠল এবং ভালও লাগতে লাগল। আমার একজন বন্ধু জুটে গেল যে নর্দমার পানিতে মাছ মারার ব্যাপারে একজন বিশেষজ্ঞ। দুজনে কড়শি হাতে নর্দমায় নর্দমায় ঘুরে বেড়াই। নর্দমায় টেংরা, লাটি এবং পুঁটি মাছ পাওয়া যায়। আমার বন্ধুর পকেটে নারিকেলের মালায় থাকে কেঁচো। সে পকেটে হাত ঢুকিয়ে এক টুকরা কেঁচো নিয়ে মুহূর্তের মধ্যে বড়শিতে গেঁথে পানিতে ফেলে দেয়। দেখতে বড় ভাল লাগে।

শেষ পর্বে শত্বনদী

পচাগড় থেকে বাবা বদলি হলেন রাজ্যমাটিতে।

দেশের এক মাথা থেকে আরেক মাথা। নতুন জায়গা, নতুন হয়ত সেখানে মানুষ, নতুন পরিবেশ। ভাগ্য ভাল হলে দেখা যাবে রাজ্যমাটি খুবই জঙ্গলী জায়গা — স্কুল নেই। বাবাকে জিজ্ঞেস করলাম, স্কুল আছে না কি।

তিনি বললেন, অবশ্যই আছে। স্কুল থাকবে না কেন? রাজ্যমাটি বেশ বড় শহর। খুব সুন্দর শহর।

স্কুল আছে শুনে একটু মনমরা হয়ে গেলাম। অবশ্য সুখ বলে কিছু নেই। কাবাবে হাজি থাকে, চাঁদে থাকে কলংক। স্কুলের যত্না সহ্য করতেই হবে বলে মনে হচ্ছে।

চিটাগাং থেকে রাজ্যমাটি যেতে হয় লঙ্কর মার্কা বাসে। রাণ্ডা অসম্ভব খারাপ। পাহাড়ের গা ঘেঁসে বাস যখন উপরের দিকে উঠতে থাকে তখন বাসের হেল্পার চেঁচিয়ে বলে — আল্লাহর নাম নেন। ইস্টার্ট বন্ধ হইতে পারে।

সত্যি সত্যি স্টার্ট বন্ধ হয়ে গেল। ভবিষ্যৎ-বাণী এমন ফলে গেছে দেখে কণ্ডাকটারের মুখে বিমলানন্দের হাসি। ড্রাইভার বাস থেকে বের হয়ে নিশ্চিত মনে বিড়ি খাচ্ছে। তার নির্বিকার ভঙ্গি দেখে বোঝা যাচ্ছে এটা খুবই স্বাভাবিক ঘটনা। প্রায়ই ঘটে।

বাস কখন ছাড়বে জিজ্ঞেস করতেই সে সুফি-সাধকের মত নির্লিপ্ত গলায় বলল, আল্লাহর হুকুম হইলেই ছাড়বে। আমরা বাসযাত্রীরা বাস থেকে নেমে আল্লাহর

হকুমের জন্যে অপেক্ষা করতে লাগলাম।

মা আমাদের সর্বকনিষ্ঠ বোনটির কান্না খামাতে ব্যস্ত হয়ে পড়লেন। দীর্ঘ ভ্রমণে সে অসুস্থ হয়ে পড়েছে। ক্রমাগত কাঁদছে। বাবা আমাদের নিয়ে বের হয়েছেন প্রাকৃতিক দৃশ্য দেখতে। আমরা হাঁটতে হাঁটতে এগুচ্ছি — এ কোথায় এসে পড়লাম। স্বপ্নপুরীর মত সুন্দর দেশ। চারদিকে পাহাড়ের সারি টেউয়ের মত দিগন্তে মিলিয়ে গেছে। মাথার উপর ঘন নীল আকাশ। বাতাসে কেমন যেন বুনো বুনো গন্ধ। বাস্তব পাশ ঘেঁসে ঘরনা বয়ে যাচ্ছে। কি পরিষ্কার তার পানি। বাসস্থানটা আজলা ডরে সেই পানি খাচ্ছে।

কিছু দূর এগুতেই যে দৃশ্য দেখলাম তা দেখার জন্যে মানসিক প্রস্তুতি ছিল না। হাতীর খেদা থেকে ধরে আনা একপাল হাতী। প্রতিটি হাতীর পা দড়ি এবং শিকল দিয়ে বাঁধা। রক্ত ভয়ানক চেহারা। সব মিলিয়ে সাত থেকে আটটা হাতী। দু'টি হাতীর বাচ্চাও আছে। এরা বাঁধা নয়। ছোট্ট ছোট্ট করছে। দেখতে অবিকল পুতুলের মত। বাচ্চা দু'টি দেখতে মনে হল তারা সময়টা কাটাচ্ছে খুব আনন্দে।

খেদার মালিক এগিয়ে এলেন। বাবাকে বললেন সর্বমোট একশটা হাতী ধরা পড়েছে। দশটা বিক্রি হয়েছে, তিনটা মারা গেছে। এখানে যে কটা আছে সে কটাও মারা যাবে। কোন হাতী কিছু খাচ্ছে না। খেদার মালিক বলল, হাতীর বাচ্চা একটা নেবেন না—কি স্যার?

বাবা কিছু বলার আগেই আমরা চোঁচিয়ে উঠলাম, নিব নিব।

বাবার মূৰ দেখে মনে হল প্রস্তাবটা তিনি একেবারে ফেলে দিচ্ছেন না। বিবেচনামূলক আছে। তিনি নীচু গলায় বললেন — দাম কত?

দাম নিয়ে চিন্তা করতে হবে না। বলতে গেলে বিনা দামে বিক্রি হবে। আপনি চান কি—না বলেন। নিলে আমার উপকার হয়। বাচ্চা দু'টা এখন সমস্যা। ডিসি সাহেব একটা নিবেন বলেছিলেন, এখন বলছেন — না।

হাতীর বাচ্চা শেষ পর্যন্ত কেনা হল না। কারণ এরা এখনো দুগুপোষ্য। প্রতিদিন আধমন দুধ এদের খাওয়াতে হবে। আমরা মন খারাপ করে বাসে ফিরে এলাম। বাবা বললেন, পাহাড়ি জায়গায় আছি — হাতীর বাচ্চা জোগাড় করা কোন সমস্যা হবে না। একটা হাতীর বাচ্চা কেনা যেতে পারে। আগে একটু গুছিয়ে বসি। তোমাদের মন খারাপ করার কোন কারণ নাই। এই বলে তিনি নিজেই সবচেয়ে বেশী মন খারাপ করলেন।

বাস ঠিকঠাক হতে অনেক সময় লাগল। আমরা রাজ্যমাটি পৌছলাম দুপুর রাতে। আমাদের বাসা মূল শহর থেকে অনেকখানি দূরে। একটা পাহাড়ের মাথা কেটে ছটা বাড়ি বানানো হয়েছে। ঐ ছটা বাড়ির একটা আমাদের। অতি নির্জন জায়গা। চারদিকে ঘন বন। অদ্ভুত সব আওয়াজ আসছে বন থেকে। মা ভীত গলায়

বললেন, এ কোথায় এনে ফেললে? বাবার মুখও শুকিয়ে গেল। এরকম বিরান ভূমিতে বাসা, তা বোধ হয় তিনিও ভাবেননি।

বাসা আমাদের খুব পছন্দ হল। পাহাড়ের উপর বাসায় আমরা থাকব এ রকমতো কখনো ভাবিনি। এ রকম বাসায় থাকা মানে আকাশের কাছাকাছি থাকা। কি সৌভাগ্য আমাদের। তারপর যখন শুনলাম আশেপাশে কোন স্কুল নেই, আমাদের স্কুলে যেতে হবে না, তখন মনে হল আমি আনন্দে পাগল হয়ে যাব।

সারাদিন খেলা। নতুন একটা খেলা বের করেছি — পাখি পাখি খেলা। দু'হাত পাখির ডানার মত উচু করে এক দৌড়ে পাহাড় থেকে নীচে নামা। এক সময় আপনি আপনি গতি বাড়তে থাকে — মনে হয় সত্যি উড়ে চলছি — পাখি হয়ে গেছি।

সন্ধ্যার পর বই নিয়ে বসি সেটাও এক ধরনের খেলা — পড়া-পড়া খেলা কারণ পড়া দেখিয়ে দেবার কেউ নেই। শাসন করার কেউ নেই।

বাবা প্রায় সারা মাস ট্যুরে থাকেন। মা সবচেয়ে ছোট বোনটিকে নিয়ে ব্যস্ত। বড় মামাও সঙ্গে নেই। এই প্রথম উনি ঠিক করেছেন আমাদের সঙ্গে আসবেন না। বড়বোনের পরিবারের সঙ্গে ঘুরে ঘুরে জীবন নষ্ট করার কোন মনে হয় না। নিজের পায়ে দাঁড়াবেন।

ছোট ছোট এতগুলি বাচ্চা সামলিয়ে মা'কে একা সংসার দেখতে হয়। তার উপর ভৌতিক সমস্যা দেখা দিল। আমাদের রান্নাখর অনেকখানি দূরে। মা রান্না করার সময় প্রায়ই দেখতে পান একটা ছায়ামূর্তি বারান্দায় হাঁটাইটি করে। তিনি আতঙ্কে অস্থির হয়ে পড়লেন। সন্ধ্যা মিলাবার পরই সবাইকে একটা ঘরে বন্ধ করে হারিকেন হারিকেন জ্বালিয়ে বসে থাকেন। ঘুমতে পারেন না। ঐ ছায়ামূর্তিকে অনেক দেখার চেষ্টা করলাম, সে দেখা দিল না। মা ছাড়া তাকে আর কেউ দেখে না। তবে এক সন্ধ্যায় তার খড়মের খট খট শুনলাম। কে যেন খড়ম পায়ে বারান্দায় হাঁটছে। মা ভয়ে শাদা হয়ে গেলেন। উচু গলায় আয়াতুল কুরশি পড়তে পাগলেন। সারারাত ঘুমলেন না, আমাদেরও ঘুমতে দিলেন না। পরদিন একটা আনন্দের ব্যাপার ঘটল। বড় মামা এসে উপস্থিত। তিনি খুব সিরিয়াস গলায় বললেন, বুঝে ভাববেন না যে আপনাদের সঙ্গে থাকব। দু'দিনের জন্যে এসেছি। আমাকে রাখার জন্যে শত অনুরোধ করলেও লাভ হবে না। আমার নিজের একটা জীবন আছে। আপনার ফ্যামিলীর সঙ্গে ঘুরাই আমার জীবনের একমাত্র উদ্দেশ্য নয়।

মা বললেন, ঠিক আছে দু'দিন পরে চলে যাস।

আগে ভাগে বলে রাখছি যাতে পরে যন্ত্রণা না করেন।

যন্ত্রণা করব না।

দু'দিন থাকব। মাত্র দু'দিন। দুই দিন এবং দুই রাত।

আচ্ছা ঠিক আছে।

মামার সেই দুর্দিন পরবর্তী আট বছরেও শেষ হল না। তিনি আমাদের সঙ্গে সঙ্গেই ঘুরতে লাগলেন।

রাস্তামাটিতে এসে তিনি সঙ্গীতের দিকে মন দিলেন। জারী গান। নিজেই গান লেখেন — সুর দেন। জারী গান একা একা হয় না। তাল দিতে হয়। তাল দেবার জন্যে একদল শিশু জুটে গেল। মামা মাথায় গামছা বেধে একটা লাইন বলেন, আমরা হাততালি দিতে দিতে বলি — আহা বেশ বেশ বেশ।

শুধু বেশ বেশ বললে হয় না, সঙ্গে সঙ্গে মাথাও নাড়তে হয়। মাথা নাড়া এবং হাততালির মধ্যে এক ধরনের সমন্বয় থাকতে হয়। নয়ত, বড় মামা রাগ করেন।

রাতের বেলা গল্পের আসর। লেপের নীচে বসে তুলা রাশি রাজকন্যার গল্প শোনার আনন্দের সঙ্গে অন্য কোন আনন্দেরই তুলনা হয় না।

এক রাতে এ রকম গল্প শুনিছি। হঠাৎ শূনি মট মট শব্দ। তারপর মনে হল চারদিকে যেন আলো হয়ে উঠেছে। ‘আগুন আগুন’ বলে চিৎকার উঠল। আমাদের ঠিক সামনের বাসায় আগুন ধরে গেছে। বাড়ি কাঠের। টিনের ছাদ। পুরো বাড়ি দাউ দাউ করে জ্বলছে। পাহাড়ের উপর পানির কোন ব্যবস্থা নেই। আগুনে বাড়ি পুড়ে ছাই হবে — কিছুই করা যাবে না। অবস্থা এমন যে আশেপাশে সবগুলি বাড়িতেও আগুন ছড়িয়ে যাবার সম্ভাবনা। বড় মামা আমাদের কোলে করে আগুন থেকে যতটা সম্ভব দূরে রেখে আসলেন। আমাদের মাথার উপর ভেজা কমল — কারণ আগুনের ফুলকি উড়ে উড়ে আসছে। চোখ বড় বড় করে ভয়াবহ অগ্নিকাণ্ড দেখলাম। ভয়ংকরেরও এক ধরনের সৌন্দর্য আছে। সেই সৌন্দর্য থেকেও চোখ ফেরানো যায় না। এক সময় না। এক সময় অরাক হয়ে দেখি জ্বলন্ত বাড়ির টিনের চালগুলি আকাশে উড়তে শুরু করেছে। প্লেনের মত ভৌ ভৌ শব্দ করতে করতে একেকটা টিন একেক দিকে উড়ে যাচ্ছে। দ্বিতীয় বাড়িতেও আগুন লেগে গেল, সেখান থেকে তৃতীয় বাড়ি। চারদিকে আগুন নিয়ে ভেজা কমল মাথায় দিয়ে আমরা বসে আছি। মনে হচ্ছে যে কোন মুহূর্তে আগুন আমাদের গ্রাস করবে।

আমাদের এখান থেকে সরিয়ে নিয়ে যাবারও কোন উপায় নেই। কি ভয়াবহ অভিজ্ঞতা।

রাস্তামাটিতে আমরা ছিলাম পাঁচ মাসের মত। অগ্নিপর্বের কিছুদিন পরই বাবা আবার বদলি হলেন বান্দরবন।

হাটহাজারী পর্যন্ত ট্রেনে। সেখান থেকে নৌকায়। সারারাত নৌকা চলল শঙ্খনদীতে। ভোরবেলা এসে পৌঁছলাম বান্দরবন। ঘন অরণ্য-ঘেরা ছোট্ট শহরতলি। অল্প কিছু বাড়ি ঘর। ইট-বিছানো ছোট্ট একটা রাস্তা। রাস্তার দু’পাশে কয়েকটি দোকান পাট।

গ্রামে যেমন সাপ্তাহিক হাট বসে এখানেও তাই। বুধবারে সাপ্তাহিক হাট। পাহাড়ি

লোকজন বুধবারে এসে উপস্থিত হয়। কত বিচিত্র জিনিসই না তারা বিক্রি করতে আনে, বাঁদরের মাংস, সাপের মাংস। মুরং মেয়েরাও আসে। তাদের কোমরে এক চিলতে কাপড় ছাড়া সারা গা উদোম। কি বিচিত্র জায়গা। বান্দরবন অনেকটা উপত্যকার মত। চারপাশেই পাহাড়। এইসব পাহাড়ে আগুন জ্বালিয়ে ধুম চাষ হয়। প্রতি সন্ধ্যায় একটা না একটা পাহাড় জ্বলতে থাকে।

বান্দরবনের বাসায় প্রথম দিনেই এক কাণ্ড হল। রাত ন’টার মত বাজে। বাইরে “হুম হাম হিউ” — বিকট শব্দ। এক সঙ্গে সবাই জানালার কাছে ছুটে এলাম। কি সর্বনাশ একটা রাক্ষস দাঁড়িয়ে আছে। রাক্ষসের হাতে কেরোসিনের কুপী। সে কেরোসিনের কুপিতে হুঁ দিতেই তার মুখ দিয়ে আগুনের হলকা বের হল। আমরা সবাই ভয়ে চিৎকার করে উঠলাম। আমার মা পর্যন্ত ভয় পেয়ে বললেন — “এইটা কি?”

রাক্ষস তখন মানুষের মত গলায় বলল, ভয় পাবেন না। ছোট খোকাখুকীরা ভয় পাবেন না। আমি বহুরূপী। ভয় পাবেন না।

বান্দরবনেই আমার প্রথম এবং শেষ বহুরূপী দেখা। এই জিনিস আর কোথাও দেখিনি। সে প্রতি মাসে দু’তিন বার সাজ পোষাক পরে বের হত। কোন রাতে সাজত ভালুক, কোন রাতে জলদসূ। ভোরবেলা দীন-হীন মুখে বাসায় এসে বলত, খোকা-খুকীরা আম্মাকে বলেন, আমি বহুরূপী। কিছু সাহায্য দিতে বলেন।

তখন আমার খুব কষ্ট লাগত। মনে হত সমস্ত পৃথিবীর রহস্য যার হাতের মুঠোয় — সে কি না দিনে এসে মলিন মুখে ভিক্ষা করে। এত অবিচার কেন এই পৃথিবীতে?

এরকম বুনো এবং জ্বলা জায়গায়ও রাজপ্রাসাদ আছে। মুরং রাজার বাড়ি। দূর থেকে দেখি। কাছে যেতে ভয় ভয় লাগে। মুরংর রাজাকে দেখে দেবতার মত। রাজবাড়ির দিকে চোখ তুলে তাকায় না — এতে না-কি পাপ হয়।

বান্দরবনের সবই ভাল — শুধু মন্দ দিকটা হল — এখানে একটা স্কুল আছে। আমাদের স্কুলে ভর্তি করিয়ে দেয়া হল।

মন পুরোপুরি ভেঙ্গে গেল। স্কুলে আমার একমাত্র আনন্দের ব্যাপার হল মুরং রাজার এক মেয়ে পড়ে আমাদের সঙ্গে। গায়ের রং শঙ্খের মত শাদা। চুল হিটু ছড়িয়েও অনেকদূর নেমে গেছে। আমরা ক্লাস সিলে পড়ি কিন্তু তাকে দেখায় একজন তরুণীর মত। তার চোখ দু’টি ছোট ছোট, গালের হনু খানিকটা উচু। আমার মনে হল চোখ দু’টি আরেকটু বড় হলে তাকে মানাতো না। গালের হনু উচু হওয়ায় যেন তার রূপ আরো খুলেছে।

ক্লাসে আমি স্যারদের দিকেও তাকাই না। বোর্ডে কি লেখা হচ্ছে তাও পড়তে চেষ্টা করি না। এক দৃষ্টিতে তাকিয়ে থাকি রাজকন্যার দিকে। সত্যিকার রাজকন্যা।

আমার এই অস্বাভাবিক আচরণ রাজকন্যার চোখে পড়ল কি-না জানি না তবে একজন স্যারের চোখে পড়ল। তিনি আমাকে বিষ-দৃষ্টিতে দেখতে লাগলেন। প্রতিটি ক্লাসেই তিনি আমাকে প্রশ্নে-প্রশ্নে জর্জরিত করেন, কিন্তু আমাকে আটকাতে পারেন না কারণ ইতিমধ্যে আমি একটা জিনিস বুঝে ফেলেছি — আমার স্মৃতিশক্তি অসম্ভব ভাল। যে কোন পড়া একবার পড়লেই মনে থাকে। সব পড়াই একবার অন্তত পড়ে আসি। স্যার আমাকে কিছুতেই কায়দা করতে পারেন না। বার বার জাল কেটে বের হয়ে আসি।

কোন অধ্যবসায়ই বৃথা যায় না। স্যারের অধ্যবসায়ও বৃথা গেল না, আমাকে আটকে ফেললেন। সমকোণ কাকে বলে জিজ্ঞেস করলেন, আমি বলতে পারলাম না।

রাজকন্যাকে জিজ্ঞেস করলেন। সে-ও পারল না। না পারারই কথা। রাজকন্যার সব সময়েই খানিকটা হুবা ধরনের হয়। স্যার রাজকন্যার দিকে তাকিয়ে বললেন — পড়া পারনি কেন?

রাজকন্যা জবাব দিল না। তার ছোট ছোট চোখ থেকে টপ টপ করে পানি পড়তে লাগল। সেই অশ্রুবর্ষণ দৃশ্যে যে কোন পাষণ্দ্রবীভূত হবে। স্যার দ্রবীভূত হলেন। রাজকন্যাকে বসতে বললেন। আমার জন্যে শান্তির ব্যবস্থা হল। বিচিত্র শাস্তি। বড় একটা কাগজে দেখা হল —

“আমি পড়া পারি নাই।
আমি গাধা”

সেই কাগজ গলায় ঝুলিয়ে দেয়া হল। স্যার একজন দপ্তরীকে ডেকে আনলেন এবং কঠিন গলায় বললেন, এই ছেলেকে সব ক’টা ক্লাসে নিয়ে যাও। ছাত্ররা দেখুক।

আমি অপমানে নীল হয়ে গেলাম। টান দিয়ে গলার কাগজ ছিড়ে স্যারের দিকে তাকিয়ে তীব্র গলায় বললাম, আপনি গাধা। তারপর এক দৌড় দিয়ে স্কুল থেকে বের হয়ে গেলাম। বাসায় ফিরে যাওয়ার প্রশ্ন উঠে না। আমি শঙ্খনদীর তীর ঘেঁসে দৌড়াচ্ছি। আমাকে যেতে হবে অনেক অনেক দূরে। লোকালয়ে আমার থাকা চলবে না। কেউ যেন কোনদিন আমাকে আর না দেখে।

সন্ধ্যাবেলা লোক পাঠিয়ে শঙ্খনদীর তীর থেকে বাবা আমাকে ধরিয়ে আনলেন। আমি আতংকে কাঁপছি। না জানি কি শাস্তি অপেক্ষা করছে আমার জন্যে।

বাবা শান্ত গলায় বললেন, তুমি তোমার স্যারকে যা বলেছ তার জন্যে কি তুমি লজ্জিত?

আমি বললাম — না।

বাবা দ্বিতীয়বার বললেন, তুমি আবার ভেবে চিন্তে বল তুমি কি লজ্জিত?

না।

লজ্জিত হওয়া উচিত। স্যারেরা তোমাকে পড়ান। তোমাদের শাস্তি দেয়ার অধিকার তাঁদের আছে। তুমি আমার সঙ্গে চল। স্যারের কাছে ক্ষমা চাইবে।

আমি বাবার সঙ্গে কাঁদতে কাঁদতে রওনা হলাম। স্যারের কাছে ক্ষমা চাইলাম। আমার ক্ষমা প্রার্থনার পর বাবা বললেন, মাস্টার সাহেব আমার এই ছেলেরা খুব অতিমানী। সে বড় ধরনের কষ্ট পেয়েছে। অপমানিত বোধ করেছে। তাকে আমি কোনদিন এই স্কুলে পাঠাব না। সে বাসায় থাকবে।

কি বলছেন আপনি?

আমার ছেলের অপমান আমার কাছে অনেক বড় ব্যাপার। বাবা আমাকে কোলে নিয়ে বাসায় ফিরলেন। পরদিনই হেডমাস্টার সাহেবকে সঙ্গে নিয়ে স্কুলের সব শিক্ষক বাসায় উপস্থিত। তাঁরা বাবাকে রাজি করাতে এসেছেন যাতে আমি আবার স্কুলে যাই। বাবা রাজি হলেন না। তাঁর এক কথা, আমি তাকে স্কুলে পাঠাব না।

সারাদিন একা একা বাসায় থাকি। কিছুতেই সময় কাটে না। ছোট দুই ভাই-বোন স্কুলে। মা ব্যস্ত। আমার কিছু করার নেই। আমি স্কুলের সময়টা শঙ্খনদীর তীর ঘেঁসে হেঁটে হেঁটে কাটাই।

বাবা মাঝে মাঝে আমাকে ট্যুরে নিয়ে যান। কখনো রাসু, কখনো থানছি, কখনো নাইক্ষ্যংছড়ি। আমাকে সঙ্গে নিয়ে ঘোরার পেছনে বাবার যে উদ্দেশ্য কাজ করছিল তা হল প্রকৃতির রূপের দিকে আমার চোখ ফেরানো। তিনি আমাকে মোটা একটা খাতা এবং কলম দিলেন যাতে আমি কি কি দেখছি তা গুছিয়ে লিখি। একদিন খাতা দেখতে চাইলেন।

যা যা লেখা হয়েছে তা পড়ে বড়ই বিরক্ত হলেন। প্রকৃতি সম্পর্কে খাতায় কিছুই লেখা নেই। যা লেখা তা পড়ে বিরক্ত হওয়া স্বাভাবিক। একটা উদাহরণ দিলেই পরিষ্কার হবে।

মঙ্গলবার

আজ আমরা রাসু থানায় পৌঁছিয়াছি।

দুপুরে ভাত খাইয়াছি। মুরগীর গোসত এবং আলু।

ডাল ছিল। ডাল খাই নাই।

বাবা বললেন, তুমি কি দিয়ে ভাত খেলি তা বিতং করে লেখার কি দরকার? অন্যরা এই খবর জেনে কি করবে?

আমি গভীর গলায় বললাম, অন্যদের জন্যে তো আমি লিখি নাই। আমি লিখেছি আমার জন্যে।

কোনদিন কি খেয়েছিস তার খোজেই বা তোর কি দরকার? এই যে এত সুন্দর জলপ্রপাত তোকে দেখিয়ে আনলাম সেই প্রপাতটার কথা লিখলি না কেন?

জলপ্রপাতের কথা লিখলে কি হবে?

যারা জলপ্রপাতটা দেখেনি তারা তোর লেখা পড়ে বুঝবে জিনিসটা কেমন। যা
দিয়ে নিয়ে আয়। দেবি প্যারিস কি-না।

সেই জলপ্রপাত আমাকে মোটেই আকর্ষণ করেনি। ছোট্ট পানির ধারা উপর
থেকে নীচে পড়ছে। নীচে গর্ত মত হয়েছে। গর্ত ভর্তি ঘোলা পানি। জলপ্রপাতের
একটি জিনিস আমার ভাল লাগল — পানির ধারার চারদিকে সুন্দর জলচূর্ণের জন্যে
অসংখ্য রামধনু দেখা যায়। আমি রামধনু সম্পর্কেই লিখলাম। খুবই আশ্চর্যের
ব্যাপার হচ্ছে — বসন্ত শ্রেণীর একটি বালকের সেই লেখা পড়ে আমার সাহিত্যিক বাবা
মুগ্ধ হয়ে গেলেন। শুধু মুগ্ধ না — প্রায় অভিভূত হবার মত অবস্থা।

জলপ্রপাত বিষয়ক রচনার কারণে উপহার পেলাম — রবীন্দ্রনাথের গল্পগুচ্ছ।
গল্পগুচ্ছের প্রথম যে গল্পটি পড়ি তার নাম মেঘ ও রৌদ্র। পড়া শেষ করে
অনেকক্ষণ কাঁদলাম। তারপর চোখ মুছে আবার গোড়া থেকে পড়া শুরু করলাম।
আমার নেশা ধরে গেল।

বান্দরবন পুলিশ লাইব্রেরীতে অনেক বই।

বাবা সেই লাইব্রেরীর সেক্রেটারী। রোজ বই নিয়ে আসেন। আমি সারাদিন পড়ি।
মাঝে মাঝে অসহ্য মাথার যন্ত্রণা হয়। সেই যন্ত্রণা নিয়েও পড়ি। বিকেলে শত্খনদীর
তীরে কেঁড়াতে যাই।

নদীর তীরেই আমার পরিচয় হল নিশাদাদার সঙ্গে। তার ভাল নাম নিশানাথ
ডক্টারচাঁদ, বাবা পুলিশের এ. এস. আই। নিশাদাদা বিরাট জোয়ান। কয়েকবার
মেট্রিক দিয়েছেন — পাশ করতে পারেননি। পড়াশোনায় তাঁর কোন মন নেই। তাঁর
মন শরীরচর্চায়। নদীর তীরে তিনি ঘটা খানিক দৌড়ান। ডন-বৈঠক করেন। শেষ
পর্যায়ে সারা গায়ে ভেজা বালি মেখে নদীর তীরে শুয়ে থাকেন। এতে না-কি রক্ত
ঠাণ্ডা হয়। রক্ত ঠাণ্ডা হওয়া শরীরের জন্যে ভাল।

স্বাস্থ্যরক্ষার নানান উপদেশ তিনি আমাকেও দেন। কথায় কথায় বলেন —
Health is wealth বুঝলে হুমায়ুন, স্বাস্থ্যই সকল সুখের মূল। তাঁর সঙ্গে যে কোন
গল্প শুরু করলেই তিনি কি ভাবে কি ভাবে জানি সেই গল্প স্বাস্থ্য রক্ষায় নিয়ে
যান। আমার বড় মজা লাগে।

তখন ঘোর বর্ষা।

বৃষ্টি পড়ছে অবিশ্রান্ত। নিশাদাদা ভিজতে ভিজতে আমাদের বাসায় এসে
উপস্থিত। আমার মাকে ডেকে বললেন, মাসিমা মাছ ধরতে যাচ্ছি। খেপ জালে মাছ
ধরব। হুমায়ুনকে নিয়ে যাচ্ছি। একা একা মাছ ধরতে ভাল লাগে না। দর্শক ছাড়া মাছ
ধরা যায় না। ছাত্তা নিয়ে দিন। ছাত্তা থাকলে বৃষ্টিতে ভিজবে না।

নিশাদাদার সঙ্গে ছাত্তা-মাথায় আমি রওনা হলাম। নদীর তীরে এসে মুখ শুকিয়ে
গেল। বর্ষার পানিতে শত্খনদী ফুলে ফেঁপে উঠেছে। তীর স্রোত। বড় বড় গাছের গুড়ি

ভেসে আসছে। এই শত্খনদী আগের ছোট্ট পাহাড়ি নদী না — এই নদী মূর্তিমতী
রাঙ্কুসী।

তাঁর জাল ফেললেন। কি যেন ঘটে গেল। শত্খনদী যেন হাত বাড়িয়ে তাকে
টেনে নিয়ে দিল। একবারের জন্যেও তাঁর মাথা ভেসে উঠল না। ছুটতে ছুটতে,
চিৎকার করতে করতে বাসায় ফিরলাম।

নিশাদাদার লাশ পাওয়া গেল সন্ধ্যায়। সাত মাইল ডাটিতে। আমার সমস্ত
পৃথিবী উলট-পালট হয়ে গেল। পরের অবিশ্রাস্য ঘটনাটি লিখতে সংকেচ লাগছে, না
লিখেও পারছি না।

সেই রাতের ঘটনা।

আমি ঘুমিয়ে পড়েছি। বাবা মাত্র শূশান থেকে ফিরে হাত-মুখ ধুয়ে ঘরে
বসেছেন। মা জেপে আছেন। পুরো ঘটনার আকস্মিকতায় তারা দু'জনই আচ্ছন্ন।
হঠাৎ তাঁদের কাছে মনে হল কে যেন বারান্দায় হেঁটে হেঁটে আসছে। আমাদের ঘরের
দামনে এসে পুনশব্দ খেঁমে গেল। অবিকল নিশাদাদার গলায় কে যেন বলল,
হুমায়ুনের খোঁজে এসেছি। হুমায়ুন কি ফিরেছে?

বাবা তৎক্ষণাৎ দরজা খুলে বের হলেন। চারিদিকে ফকফকা জ্যোছনা। কোথাও
কেউ নেই।

এই ঘটনার নিশ্চয়ই কোন লৌকিক ব্যাখ্যা আছে। বাবা-মা দু'জনই ঐরাত্ত
একটা ঘোরের মধ্যে ছিলেন। অবচেতন মনে ছিল মৃত ছেলেটি। তাঁরা এক ধরনের
অভিষ্টি হেলুসিনেশনের স্বীকার হয়েছেন। এইত ব্যাখ্যা।

আমি নিজেও এই ব্যাখ্যাই গ্রহণ করেছি। তবু মাঝে মাঝে মনে হয় অন্য
ব্যাখ্যাটিই বা ধারণ কি? একজন মৃত মানুষ আমার প্রাতঃ গভীর ভালবাসার কারণে
ছুটে এসেছে অশরীরী জগৎ থেকে। উৎকর্ষা নিয়ে জিজ্ঞেস করছে — হুমায়ুন কি
ফিরেছে?

আমার শৈশব কেটে গেল মানুষের ভালবাসা পেয়ে পেয়ে।
কি অসীম সৌভাগ্য নিয়েই না আমি এই পৃথিবীতে জন্মেছি।

নিশাদাদার মৃত্যুর পরপর আমি অসুস্থ হয়ে পড়লাম। শিশু-মন মৃত্যুর এই চাপ
সহ্য করতে পারল না। প্রচণ্ড জ্বরে আচ্ছন্ন থেকে কয়েকদিন কেটে গেল। মাঝে
মাঝে মনে হত আমি শূন্যে ভাসছি। শরীরটা হয়ে গেছে পাখির পালকের মত।
সারাক্ষণ একটা ঘোর ঘোর অবস্থা। এই ঘোরের মধ্যেই আমাকে দেখতে এল মুরং
রাজার মেয়ে। সহপাঠী রাজকন্যা। আচ্ছন্ন অবস্থায় তাকে সেদিন আরো সুন্দর মনে
হল। পৃথিবীর সমস্ত রূপ যেন সে তাঁর শরীরে ধারণ করেছে।

সে অনেক কথাই বলল। তার কিছুই আমার মনে নেই, শুধু মনে আছে এক
সময় মাথা দুলাতে দুলাতে বলছে — তুমি এত পাগল কেন?

তার এই সামান্য কথা — কি যে ভাল লাগল। সেই ভালনাগায় এক ধরনের কষ্টও মিশে ছিল। যে কষ্টের জন্ম এই পৃথিবীতে নয় — অন্য কোন অজানা ভুবনে।

আমার শৈশবটা কেটে গেছে দুঃখ-মেশানো আনন্দে-আনন্দে। যতই দিন যাচ্ছে সেই আনন্দের পরিমাণ কমে আসছে। আমি জানি এক সময় আমার সমস্ত পৃথিবী দুঃখময় হয়ে উঠবে। তখন যাত্রা করব অন্য ভুবনে যেখানে যাবতীয় আনন্দ-বেদনার জন্ম।

আজ থেকে তিরিশ বছর আগে সিলেটের মীরবাজারের বাসায় এক গভীর রাতে ঘুম ভেঙে গিয়েছিল, দেখি মশারির ভেতর ঠিক আমার চোখের সামনে আলোর একটা ফুল ফুটে আছে। বিস্ময়, ভয় ও আনন্দে আমি চোঁচিয়ে উঠলাম — এটা কি, এটা কি?

বাবা জেগে উঠলেন, মা জাগলেন, ভাইবোনেরা জাগল। বাবা আমার গায়ে হাত বুলাতে বুলাতে বললেন, জোছনার আলো ঘরের ভেতিলেটর দিয়ে মশারীর গায়ে পড়েছে। ভেতিলেটরটা ফুলের মত নকশা কাটা। কাজেই তোমার কাছে মনে হচ্ছে মশারীর ভেতর আলোর ফুল। ভয়ের কিছু নেই, হাত বাড়িয়ে ফুলটা ধর।

আমি হাত বাড়তেই সেই আলোর ফুল আমার হাতে উঠে এল কিন্তু ধরা পড়ল না। বাকি রাতটা আমার নির্ধুম কাটল। কতবার সেই ফুল ধরতে চেষ্টা করলাম — পারলাম না। সৌন্দর্যকে ধরতে না পারার বেদনায় কাটল আমার শৈশব, কৈশোর ও যৌবন। আমি জানি সম্ভব না, তবু এখনও চেষ্টা করে যাচ্ছি যদি একবার জোছনার ফুল ধরতে পারি — মাত্র একবার। এই পৃথিবীর কাছে আমার এর চেয়ে বেশী কিছু চাইবার নেই :

বসুমা, তোমার আঁচল

এখানে বিছাও —

মাথা রেখে শোবো আর দেখব উধাও

মেঘে মেঘে চলে নীলাকাশ।

Thank You For Visiting
www.shopnil.com